

de Librairie des H. M. S. Nigros
TRAICTE

DE LA CVRE
GENERALE ET
PARTICVLIERE
DES ARCBVSADES.

30726

AVEC
L'ANTIDOTAIRE SPAGIRIQUE,
pour preparer & composer
les medicamens.

PAR IOS. DV CHESNE, SIEVR DE
la Violette, Conseiller & Medecin du Roy.



A PARIS,

Chez CLAYDE MOREL, rue S. Iacques,
à l'enseigne de la Fontaine.

M. DCXXV.

30726

Avec Privilege du Roy.

Dr. Dalenon
2023

31758

31758



A TRES-ILLVSTRE,
TRES-PVISSANT ET
TRES-MAGNANIME
Prince, François, fils &
frere de Roy, Duc
d'Alençon, &c. S.



ONSEIGNEVR,

Si tost que i'ay esté aduertý
de la faueur & honneur qu'il
vous a plu me faire, de m'ap-
peller & auoir au nōbre de
vos seruiteurs domestiques :
i'ay tasché (pour ne vouloir estre ingrat á vn si
grād bien) vous faire cognoistre par tous moyēs
la deuotion & inclination que i'auore conceüe,
mesmes auparauant qu'auoir receu vostre com-
mandement, de vous rendre l'obeissance que ie
doy á vostre grandeur par tout droict diuin &
humain, cōme á la seconde personne de la Fran-
ce : de laquelle i'ay cet honneur que d'estre nay
subiet. Et ceste mienne tres-humble & tres-en-

EPISTRE.

cline affection au bien de vostre service, m'est de tant plus accreuë, que i'ay tousiours ouy recommander les rares & admirables perfections que Dieu vous a eslargies dès vostre naissance, le fruit & artëte desquelles s'ont mesme auourd'huy esparfes par tout le mode. Car s'il est vray ce que dit vn poëte Latin, que ce n'est peu de complaire aux grands Princes, quel honneur, quel bien, quelle faueur m'est-ce, que mon petit service soit agreable à vn Prince issu de la tige de tant de grands Roys, si debonnaire, genereux & magnanime? A ceste cause, Monseigneur, desirant par tout moyen vous tesmoigner & faire paroistre le desir qui plus m'affectionne de vous faire tres-humble, tres-agreable & tres-fidele service: i'ay pris la hardiesse pour la premiere espreuue, vous offrir ce mien petit labour d'un liure des Arbusades, & le faire publier sous la sauuegarde vostre nom tres-illustre, afin que s'il a ce bien & cet heur que d'estre approché de vos mains plustost que moy, l'honneur de les vous pouuoir tres-humblement baiser, comme ie le desire suivant vostre commandemēt, il vous plaise croire & vous assseurer que ny moy ny luy ne desirons estre destinez apres Dieu, que pour seruir vostre excellence perpetuellement. Et encore que ce mien present soit de peu de valeur, & mal conuenable

EPISTRE.

à la dignité de vostre grandeur, pour ne parler que des playes & meurtrissures faiçtes par les Arcbusades: si est-ce que l'argument m'a semblé aucunement propre & tendre à vn but semblable à vostre si bonne & loüable intention, moytaschant de donner quelque allegement aux pauvres blessez par mon escrit, & leur presenter quelques medicamens propres pour ceste maladie: & vous Monseigneur, entreprenez d'avantage, à sçavoir de guarir en plus brest temps & plus asseurement, toutes les playes & vlcères de tout l'Estat de la France si miserablement & de si longue main naurée & ensanglantée par les guerres intestines & ciuiles: & ce par le remede d'une bonne reconciliation, paix & vnion de l'un & de l'autre party, que vous recherchez aujourdhuy d'un Zele ardent & affection incroyable. Tellement que preferant le repos de la patrie à vous-mesmes, par la compassion de ses miseres, vous prenez la cause en main de telle sorte, que nous nous pouuons escrire à bon droit, & dire à haute voix, O que bien-heureuse est la France! à qui Dieu a donné vn Prince si genereux: & bien-heureuse est la patrie qui nous a produit vn tel nourrisson, veule seur & excellent remede de paix qu'il vous plaist de rechercher, pour l'entiere guarison de ses maladies, au-

EPISTRE.

trement, presque desesperées. Au contraire mal-
 heureux les ingrats, qui voudront refuser le se-
 cours d'un si grand Medecin, & un medica-
 ment si propre & salutaire. Les Anciens ont
 estimé quelques Princes de Grece du temps de la
 guerre Troyenne, & notamment le poëte Ho-
 mere parle en grand honneur de Podalirius, Pa-
 troclus & Machaon, pour ce qu'ils auoient co-
 gnoissance de la Chirurgie: & introduit l'un
 d'iceux, à sçauoir Patroclus, pensant de sa pro-
 pre main Eurypilus blessé en la cuisse deuant le
 siege, d'une fleche, laquelle il tira de la playe en
 luy appliquant tous les remedes conuenables. Il
 en dit autant de Machaon qui fit le semblable à
 l'endroit du Roy Menelaus, atteint pareillement
 d'une fleche: & demonstre encore que si grands
 Princes ne desdaignoiēt de penser de leur propre
 main les playes des simples soldats. Et afin qu'il
 ne semble que ie me vueille par trop amuser à ce
 qu'on croit n'estre que fable, Plutarque en escrie
 autant de ce grand Empereur Alexandre, lequel
 pensoit de sa main propre les soldats blesez de
 son armée. Ceste recommandation de si sages &
 & vertueux Princes, à dire Vray, m'a d'autant
 plus induit, Monseigneur, à dedier ce liure à
 vostre grandeur, que i'ay cognu par ces tesmoi-
 gnages la Chirurgie pour lors auoir esté en telle

Iliad. II

Iliad. 4

Plutar-
que en
la vie
d'Ale-
xandre.

EPISTRE.

recommandation, & que i'ay estimé qu'à l'exemple de si grands personnages, cela vous seroit non seulement recômandé, mais aussi que la prudence de ces anciens Princes seroit surmontée par la vostre, en ce que non seulement vous nous presentez le remede prompt & assésuré pour guarir toutes nos playes, maux, & calamitez auparauant aduenues, mais d'abondant nous offrez vn preseruatif pour pouruoir par cy apres que tels inconueniens ne puissent plus aduenir. Lon prise & estime à bon droit aucuns des anciens Roys & Empereurs, comme Mithridates, Attalus, Iuba, Ptolomée: & d'autre part Auguste, Tibere, Adrian, Aurelle, Iustin, de ce que non seulement ils auoient grande cognoissance de la Medecine: mais aussi de ce que d'eux-mesmes ils auoient inuenté quelques remedes & medicamens singuliers. Mais vostre loüange volera plus haut, & sera de tant plus eternisée par la posterité, que vous n'aurez seulement inuenté quelque simple remede pour vne maladie particuliere, mais voulu pratiquer vn singulier expedient pour le bien & pacification de toute la France. Qui est cause qu'à bon droit ie me puis avec tant d'autres estimer tres-heureux, de ce qu'il a plu à Dieu nous donner vn tel Prince, lequel iustement nous pouuôs haut loüer comme

EPISTRE.

du tout Zelé au bien, profit & repos vniuersel
de toute sa patrie. Mais pour mon particulier
i'ay plus d'occasion de m'esioir encore ayant ac-
quis pour Seigneur & Maistre vn Prince, &
de faiet & de nom François, tant genereux &
magnanime. Or Monseigneur, tout ainsi que
i'espere que Dieu me fera la grace de pouuoir
vacquer le reste de mes iours à vous faire tout
l'humble service que ie vous doy, i'espere aussi
que vous me trouuerez si prompt à vous ren-
dre en iceluy si grande & fidele obeissance
qu'un naturel François doit au frere de son
Roy, duquel les commandemens ne me seront
moins chers, que ma propre vie.

Monseigneur, Je supplieray cependant en
toute humilité & reuerence nostre Dieu, qu'il
vous vueille accroistre & multiplier ses dons
& graces, avec toute prosperité & gran-
deur.

Vostre tres-humble, tres-obeis-
sant & tres-affectionné ser-
uiteur,

IOS. DV CHESNE.




TABLE DES MATIERES

*principales contenuës en ce liure, recueillies
selon l'ordre des Chapitres : le nombre
signifie la page.*

DU CHAPITRE I.

QVE ces playes, selon aucuns, estans
compliquées seulement de solution
de continuité avec contusion & dila-
ceration, ne requierent que deux for-
tes de remedes en general. 3

Le premier remede est de supputer & mollifier:
ne faut toutefois vser des suppuratifs sans
grande prouidence. 5

Le second remede est de reünir les parties des-
jointes & separées. 9

Que ces playes peuuent estre complicées avec
venenosité & brulure. 11

Que le venin ne peut prouenir de la poudre, en
la mesme page.

Que la bale, considerée en soy, ne peut apporter
aucune venenosité en ces playes, mais que
d'autre part elle peut estre empoisonnée. 17

Que les metaux, par le moyen des trempes di-
uerfes, s'abbreuuent d'une qualité toute con-
traire à la leur. 19

Touchât les effects des mixtions venimeuses. 21

Du moyé par lequel on empoisonne les bales. 23

Que le venin empraint dans la bale ne peut estre
consommé par le feu. 25

Que la brulure jointe avec ces playes, ne pro-
uiuent du boulet. 28

D'où prouient la brulure. 29

Du Chapitre II.

Quelles choses sont à considerer pour co-
gnoistre les indications requises à la cu-
ration de ces playes. 32. 33

Qu'il y a deux sortes de solution de continuité,
à sçauoir manifeste & occulte. 34

Signes de la solution de continuité occulte. 35

Signes du venin compliqué avec ces playes. 37

Comment on cognoistra si la bale a esté enueni-
mée. 38. 39

Signes de la brulure jointe avec ces playes. 40

Pour iuger plus asseurement de ces playes. 41

Quelles playes sont le plus fouuét mortelles. 41

Quelles playes sont plus dangereuses. 42. 43

Quelles choses endommagent ces playes. 43

D'où s'engendrent aux armées les maladies ap-
pellées Pandemiques, & de leur naissance. 44

Quelles playes sont plus guarissables. 45

Chose notable de la guarison du seigneur de

Vins. 46

Du Chapitre III.

DE quelles intentions est prinse la cure de
ces playes. 47

Du regime des blesez. 47

Choses considerables pour bien instituer la ma-

niere de viure des bleſſez.

47. 48

Qu'il ne faut ſoudain chager la couſtume.

48. 49

Pourquoy c'eſt que les Medecins permettent
l'vſage du vin à leurs bleſſez

50

* En quel temps de la maladie l'aſtinenſe eſt re-
quiſe.

51

* Qu'il faut de peur à peu diminuer les viures.

51

Quel air eſt conuenable pour les bleſſez.

52

* Diuerſité des habitations.

52. 53.

* Notable touchant la ſituation de Ferrare & de
celle de Florence.

53

Que les vents rechantent leurs qualitez, ſelon
les lieux par où ils paſſent.

54. 55.

Comment il faudra corriger l'air par trop froid,
ou trop chaud.

56

Du manger & du boire.

57. 58

Du travail & repos.

59

L'vtilité prouenant des frictions.

59

Quel doit eſtre le dormir du malade.

59. 60

Que les perturbations d'eſprit ſont contraires
aux archuſades.

60

Du Chapitre IIII.

Que la phlebotomie & purgation ſont re-
quiſes en ces playes.

61

De quel coſté on doit faire la ſaignée, & quelles
choſes il faut obſeruer en icelle.

62

Pour quelles raiſons la purgation eſt neceſſaire
en ces playes.

63. 64

Quelles choſes il faut obſeruer, quand il eſt
queſtion d'ordonner la purgation.

66. 67

De quels medicaments laxatifs on doit vſer.

67

Descriptions d'aucunes potions conuenables &
propres pour purger les malades selon l'hu-
meur qui les tourmentera. 68. 69. 70. 71
Les effences des purgatifs propres pour les plus
aisez & delicats. 72

Du Chapitre V.

DE la troisieme intention curatiue, qui se
faict par la Chirurgie. 73
Qu'il faut premierement oster toutes choses
estranges. 73
Comment on doit tirer le boulet. 74
De quelle chose le Chirurgien doit estre soi-
gneux en faisant quelque incision. 75
Qu'il ne se faut quelque fois opiniastrer à l'ex-
traction du boulet, mais attendre l'effort de
nature. 75. 76
Que le boulet peut demeurer dans le corps sans
aucun danger. 76
De l'usage des attractifs. 76
Diuerfes opinions touchant le premier appareil
77
Combien sert la fomentation faicte avec l'eau
tiede de fontaine, principalement si on y ad-
iouste de l'huile & du vinaigre. 79. 80
Effects du baume naturel. 81
Que l'huile & le vinaigre resistent à la putre-
faction. 82
Que l'air est contraire à ces playes. 83
Quel doit estre le premier appareil. 84
Deux incommoditez à euitier en liant ces playes
86

Comment il faut pouruoir à l'aimorrhagie des- reglée.	87
Du second appareil.	90
Medicaments pour empescher que ces playes n'acquierent quelque corruption.	92
Qu'il faut donner à ces playes vne chaleur ap- prochante de la naturelle.	94
Medicaments pour remollir & appaiser les dou- leurs.	95
Pour arrester la defluxion des humeurs.	96
Quand il faudra vser des absterfifs.	97
Iniection pour lauer ces playes.	99
Temps de cicatrifer.	100

.Du Chapitre VI.

P our remedier au venin compliqué avec ces playes.	101
Signes du venin compliqué.	102
Description des contrepoisons.	106
Deux indications curatiues pour pouruoir aux playes enuenimées.	108
Medicamens propres aux playes enuenimées.	109
Medicamens attractifs.	111
Qu'il n'est bon d'appliquer soudain des choses froïdes & astringentes sur ces playes jointes avec brulure, & quels medicamens y sont conuenables.	113. 114

Du Chap. I. du second Traité.

P ourquoy les playes jointes avec brisement d'os, sont de difficile curation.	120
Qu'il faut tenter tous bons remedes, auant que	

de couper entierement le membre.	121
Curatiō des playes du test avec fracture d'os.	123
Difference de la fracture du test.	125
Pour cognoistre les fissures du test.	126
Quels medicamens sont requis aux playes de la teste.	127
Lieux esquels on ne doit appliquer les trepanes.	129
Description des medicamēs propres aux playes de la teste, accompagnées de la fracture du crane.	132
Du regime des blesez en la teste.	136
Des signes & iugemens de ces playes.	136

Du Chapitre II.

C omment il faut pourvoir aux playes du visage avec fracture.	138
Medicamens pour appliquer sur la partie brulée & denuée de poil.	140
Pour les taches des grains de poudre.	140
Pour les cicatrices enleuées & rouges.	142

Du Chapitre III.

D eux moyens par lesquels on doit remedier aux Archufades avec fracture des os des bras, des cuisses & des jambes.	144
Quand il faudra retrâcher le mēbre offensé.	145
Double indication que les Chirurgiens se proposent pour l'operation manuelle requise en telles playes, & de leurs remedes.	146. 147.
Les inconueniens qui s'ensuiuent par le moyen des attelles & liaisons fortes, & pour y obuier.	148. 149. 150

Remede catagmatique de l'auteur.	151
De l'usage de la pierre Beinbruch.	153
Iniections propres aux fractures des os.	155
Pour remedier aux os cariez.	156

Du chapitre IIII.

P Articularitez à observer, quand l'arcbusade a donné dedans la poitrine.	158
De quels medicamens on se seruira, si l'arcbusade donne au trauers du corps, & blesse l'os de l'es- pine, ou si le coup est donné du haut en bas.	162
Medicamens conuenables pour les callositez & fistules.	163


Du Chap: V.

Q u'il faut diligemment subuenir aux sym- ptomes, & pourquoy.	164
Pour appaiser la douleur.	166
Quand il faudra vser des narcotites.	167
Pour corriger l'intéperie chaude ou froide.	168
Qu'il faut dès le comencemēt obuier à la fièvre, & quels remedes y feront profitables.	169
En combien de sortes se faict la conuulsion, & conséquemment de leurs remedes.	170
Pour subuenir à la paralyfie.	178
Qu'il faut remedier promptement à la defaillan- ce de cœur, & par quels moyens.	179
Qu'il n'y a symptome plus deplorable, que la gangrene.	180
Signes du sphacele.	181
Commēt il faut remedier tant au sphacele, qu'à la gangrene.	182. 186

Table de l'Antidotaire.

P ourquoy c'est que plusieurs mesprisent les preparations spagiriques.	188
D'où est tiré ce mot Spagirique.	189
Recommandation de l'art Spagirique.	189
La maniere de faire de plusieurs de ce temps, to- talement differente de celle des anciens Philo- sophes.	192
Rhabarbe incogneuë aux Anciens.	194
Que les Anciens se sont seruis de choses viles, sales & puantes, & en ont faict des medica- mens.	195
Medicamens qui se trouuent ordinairement chez les Apoticares, desquels le Chirurgien sui- uant l'armée doit estre pourueu.	198
Descriptions d'autres medicamens qui se pre- parent promptement.	199
Autres medicamens desquels l'art Spagirique enseigne en partie la preparation.	204
De l'vtilité des potions vulneraires.	210
Denombrement des simples, desquels sont com- posées les potions vulneraires.	211
Pour tirer la vertu desdits simples.	212
Plusieurs descriptions desdites potions vulne- raires.	212
Table des medicamens Spagiriques, propres pour les archufades.	216
De la preparation des susdits medicamens.	221

F I N.



TRAITTE' DES AR-

QUEBUSADES ET BLESSURES
d'autres bastons à feu : où il est dis-
puté de l'essence du mal , suiuant la
diuerse opinion de ceux qui en ont
escrit: & de la propre & vraye cura-
tiõ generale & particuliere d'iceux,
par des remedes pris tât de l'ancien-
ne que nouuelle Medecine.

*Diuerſes opinions touchant l'eſſence du mal
des Arquebuſades : & du Venin &
bruſſure conioincts avec icelles.*

CHAP. PREMIER.

PLVSIEURS parauanture
s'emercuilleront de ce que
ie mets en auant ce Traitté
des arquebuſades, veu meſ-
mement que cette matiere a eſté trai-
tée aſſez amplement par mes deuan-
ciers : & qu'il n'y a que peu de iours
que la preſſe nous a produit vn liure de
M. Laur. Ioubert excellent Medecin:
auquel il n'a rien obmis de ce qui ap-
partient à la cognoiſſance de l'eſſence

du mal , laquelle precedant demonstre assez la premiere & vraye indication curatiue , qu'il a pareillement descrite par docte & certaine methode. Tellement que n'y pouuant auoir rien à redire , il semble que ce n'est à moy que superfluité d'en escrire. Ce qui deuroit estre assez suffisant pour rendre ma plume muette en cet affaire , si la grandeur du cas qui merite d'estre examiné par diuers escrits, & vn bon desir qui plus m'affectionne de pouuoir seruir en quelque chose au public , ne me enhardissoit d'autre part à vouloir laisser à la posterité quelque marque du deuoir où ie me suis mis pour seruir à ma patrie : en faueur de laquelle i'ay voulu mettre ce mien liure aussi bien en langue Françoisé que latine. Estimant aussi, escriuant mesme apres les autres, pouuoir enseigner & mettre en auât plusieurs non vulgaires & bõs remedes pour cet effect , que i'ay appris, voyageant, des plus doctes de l'Europe, & experimenté maintes fois pratiquât & suiuant les armées. Et afin que ie ne remplisse mon liure de vains pro-

pos, lequel ie veux estre bref & succinct, ie declareray auant que venir aux susdits remedes, que c'est qu'il me semble de l'essence de cette maladie, apres auoir mis en auant les diuerses opinions de ceux qui en ont escrit deuant moy, pour tascher d'accorder le tout, & ce le plus methodiquement qu'il me sera possible. Entre ceux qui me semblent auoir mieux disputé de cette matiere, sont ceux cy, à sçauoir Boutal, Ioubert, & Ambroise Paré: qui d'un commun accord ont estimé cette maladie des Arquebusades, & autres tels bastons à feu estre compliquée à sçauoir de solution de continuité avec contusion & dilaceration, le plus souuent des muscles, des vaisseaux, & des parties solides, accompagnée de grands symptomes, lesquels se presentans diuers, font prendre aussi diuerses indications curatiues. Or voila les deux especes du mal, desquels ils disent les coups desdits bastons à feu estre principalement composées: pour raison dequoy aussi nous sont proposées deux sortes de remedes en general. L'un pour substituer aux parties dilace-

rées & meurtries, cōme à la chair, aux nerfs, tendons, ligaments, & aux os : & ce à raison de la contusion qui peut estre mesme sans playe manifeste, dite des Grecs Echymose, qui pour cela n'est exēpte de tout peril, mais biē souvent accompagnée de plusieurs grāds symptomes, de grāde quantité de sang espandu entre les muscles, qui se pourrit incontinent, estant hors de ses vaisseaux, de grandes douleurs, d'où s'ensuiuēt plusieurs grādes defluxions, tumeurs, inflammations, & en fin la gangrene, & la mortification de la partie : l'autre, qui est avec playe manifeste plus commune, & dangereuse tāt plus elle est grande & profonde, faite par la balotte, laquelle entrāt de plus grande impetuosité, brise & meurtrit les parties qu'elle rencontre, & par ce moyen le sang qui descend au lieu de la concussion remplissant l'orifice des veines & porosité des autres parties, est là cōdense & espeSSI, & estant abandonné de la chaleur naturelle (qui est esteinte à cause de la resolution des esprits faite, & par la douleur & dilacération

de tāt de parties, & qui s'est retirée à sa source & fontaine, à sçauoir au cœur, pour raison de la frayeur & estonnement qu'on s'imprime apres vn si mortel coup) en est rédu de couleur liuide & noiraistre semblable en cela à vn escharre, lequel se pourrissant facilement, corrompt aussi par consequent les parties subiacentes, & principalement les spermatiques, qui doiuent estre au plus tost conuerties en sanie, ou pourriture suiuant l'opinion des anciens, afin de mieux separer par ce moyen ce qui est desia comme mort, de ce qui est encores sain & en vie. Pour cēt effect on vse premierement des remedes suppuratifs ou mollifiants: l'vsage desquels, bien qu'il soit propre & conuenable aux communes contusions, ne doit estre toutefois appliqué en ces playes sans grande prouidence & indication prise de la dispositiō des corps, du temps, & de la temperature des parties. Car puis que ces playes de leur nature sont propres à receuoir & engendrer vne mer de toute putrefaction, mesme bien souuent avec vermine & puanteur insup-

portable, il ne faut douter que l'usage des fufdits medicamens (la nature defquels eft de pourrir d'auantage) n'augmente & rengrege la maladie, par le moyen des vapeurs malignes qui infectent les principales parties, à ſçauoir le cerueau, le cœur, & le foye: d'où ſ'enſuiuēt auffi cōuulfions, phrenesies avec fièvres cōtinuës, qui bien ſouuent ſont caufe de la mort. Ce qui eft communiqué principalement aux corps mal ſains: la charnure defquels eftant mal difpoſée par la putrefaction qui eft au ſang, il ne faut ſ'eſmerueiller ſi les bleffures en demeurent ou dangereuſes ou de longue & difficile curation. On doit auffi conſiderer pour cet effect le temps ou la diſpoſition de l'air & la temperature des parties. Car qui eſt-ce qui doutera que le vent Auſtral, penetrant meſme iuſques dans la concauité des playes & affoibliffant la chaleur naturelle, ne ſoit plus propre à augmenter les putrefactiōs, & engendrer la vermine, veu que l'experience nous le demonſtre ordinairement, & auffi qu'Hippocr. le teſmoigne au 3.

des Aphorif. & au liure des Epidimies? Ce qui conclud auffi en autre lieu, difant, le fec eſtre plus ſain que humide: demonſtrât par cela toute corruption eſtre cauſée d'une exceſſiue humidité, comme eſtant ſa matiere. A cela auffi nous ſeruirà beaucoup la cognoiſſance du temperament des parties, d'autant que les playes faites à la teſte, au ventre inferieur, & aux parties plus humides, & par conſequent plus ſujettes à putrefaction, bien que contuſes, nous feront uſer de ces remedes ſuppuratifs avec meur & ſain iugemēt, veu les grāds accidens qui en ſuruiennēt le plus ſouuent par vne improuidēce. Car vn Medecin ne ſera iamais excuſable, ſi voyāt ſa playe puante, qui eſt vn mauuais indice, pleine de vermine, d'ordure & de infection, ce qui peut meſme aduenir dès le commencement par le moyen deſdites circonſtances, il ſe contente d'uſer de leurs digeſtifs, qu'ils appellent, alleguant ſa playe eſtre contuſe, & par conſequent deuoir eſtre ſuppurée: veu meſme qu'apperce- uans ces choſes nous deuons auoir re-

cours incōtinent aux remedes de toute autre nature , & qui resistent principalement à la putrefaction, pour pre-
voir aux accidens plus vrgēs, desquels ces choses nous menassent, à sçauoir à la gangrene, & qui pis est au sphacelle, ou totale mortification. Tels sont les sels metalliques & les preparations Spagyriques qu'on fait du cuiure, du fer, de l'argent vif, du souphre, vitriol & arsenic, ainsi que nous dirons en son lieu, quand nous parlerons de la curation: lesquels seruans comme de baume exterieur, par leur chaleur & tenuité incisans les grosses humeurs, qui suffoquent la chaleur naturelle, digerans les icoreuses ou tenues, corri-
geans d'autre part la putrefaction & virulence d'icelles par le moyen de leur salitude & acidité, preseruent lesdites playes des gangrenes & mortificatiōs, & les remettēt (estans mixtiōnez avec des medicamens conuenables comme nous dirōs cy apres) en vne courte voye de guerison, sans douleur aucune. Qui sont remedes plus conuenables qu'un simple precipité, mal preparé, qu'un

Ægyptiac auquel on aura adjousté de l'arsenic & sublimé & semblables: l'usage desquels ie ne pourrois bonnement approuuer, à cause des grandes douleurs (qu'on doit principalement éviter) qu'en souffrent les pauvres malades, à cause de leur malignité, laquelle toutesfois peut estre corrigée par vne vraye & cōuenable preparatiō d'iceux spagyrique, qu'on appelle, au grād soulagement des malades. Voila quand aux premiers remedes qu'on se propose pour la premiere indication, à sçauoir pour la substitution des parties dilacérées & brisées: surquoy le medecin doit estre prudent & biē aduisé pour diuersifier les remedes, suiuant les diuerses affections & occurrences qui se presentent: & pour uoir à tout par bonne methode suiuant l'opinion de Galien. Le deuxiēme remede qui se presēte seruāt à la plus generale indication, est pour reunir les parties qui sont disiointes & separées: ce qui se fait principalement par le moyen du baume radical & naturel contenu en chacune partie, comme principal agent, operant avec ses

vertus, & avec sa nourriture conuenable, qui sert à faire la deuë inuiscation & consolidatiõ desdites parties: lequel baume doit estre aidé du Medecin, s'accordant du tout avec iceluy, cõme avec la cause efficiẽte & principale, & gardant que son action ne soit retardée par quelque empeschement, en ostant les causes exterieures qui luy sont nuisibles, qui peuuent l'irriter, & obuier à ladite consolidation: laquelle il doit aider à faire par vn bon regime, & application des medicaments conuenables. C'est en somme ce que nous demonstret les deux sortes de mal, desquelles, cõme i'ay cy dessus dit, on estime lesdites playes des bastons à feu (ainsi qu'à la verité elles sont le plus souuẽt) estre composées, à sçauoir la solution de cõtinuité, ioincte avec contusion & dilaceration des parties moles, mediocres & solides. Lesquelles deux indications curatiues nous deuoyent seulement contenter, si faulx la correction de si doctes personnages mes deuanciers, nous ne taschions de demonstrier par raison & par experience, que cette maladie

peut estre cōpliquée avec venenosité & brulure contre leur opiniō: lesquelles deux choses ioinctes avec les susdites playes, comme il se peut faire, nous feront proposer autres & diuerſes indications curatiues que les susdites. cependant ie ne veux pas m'opiniaſtrer à defendre, cōtre la verité, ceux qui ont eſtimé le venin prouenir de la poudre, tāt à cause de ſon eſſence, que par ſa trāſmutation: cōme pourroit auoir fait M. Iean de Vigo, au reſte tref-docte & tref-excellent Chirurgien, & de nouveau vn certain Alphōſus Ferrius Medecin Italien, l'opinion duquel a eſté rembarrée bien doctement, cōme ſorte, par Boutal Medecin du Roy, & biē expert en la Chirurgie. Car la compoſition d'icelle poudre demonſtre aſſez clairement aux plus aueugles que ſon eſſence ne peut estre veneneuſe, comme eſtant faite de ſouphre, ſalpeſtre, & charbōs, ſimples qui ne ſont aucunement veneneux, mais au contraire tref-profitables pour la deſtruction de biē grādes maladies, & entre les autres (ſur lequel Alphonſus fonde ſon prin-

*Qu'il y
a venin
& brul-
lure en
ces
playes.*

principal argument) le foupbre, qui eft propre pour les affections des poulmons, principalement eftant bien preparé, comme nous l'auons ja enfeigné en noftre liure de la preparation des fimples metalliques, ce qu'auffi refmoignent affez les efcrits de Galié, Theophraste, Pline, & Dioscoride : & qu'auffi nous le voyons pratiquer ordinairement par toute noftre France, & en plusieurs autres endroits, quand les Medecins empeschez en la guarifon de quelque grande maladie, renuoyent les patiens, les vns aux eaux chaudes de Béarn, les autres à celles d'Aix en Allemaigne : d'autres à celles qui font en Sauoye & en Italie, & en plusieurs autres endroits, fuiuant leur commodité & l'exigence du mal : lesquelles eaux paffans au trauers des minieres, les vnes retiennent de l'efprit de foupbre, les autres de celuy de l'alun, du fer, du vitriol & femblables : qui ne font toutesfois mortelles, mais propres (principalement les fulphureufes) aux paralyfies, fciatiques, grauelles, douleurs anciennes d'estomach, & pour toutes autres

maladies tartareuses, ou faictes des humeurs crasses & viscides, desquelles la cause est resoluë & repurgée avec l'urine par le moyen de la vertu incisive & diuretique, prouenant des esprits des susdits metalliques, ainsi qu'on le voit tous les iours par experience, au grand soulagement de beaucoup de personnes desplorées, & qui ne pouuoient estre secouruës autrement par les communs remedes. Voila quand au souphre qu'on ne peut en façon du monde iuger mortel ou venimeux. Ce qu'on ne peut aussi faire du salpêtre, lequel ie ne trouue estre le Nitre de Dioscoride, & des Anciens, cōme Botal l'a estimé: car il nous le faudroit aller recercher trop loin en Macedoine, ou en Ægypte, ausquelles regions il s'en trouuoit beaucoup anciēnement: en l'une, à cause du terroir propre, & d'un lac nitreux nommé Clytis: en l'autre, à cause de la residence de l'eau du Nil, lequel apres qu'il auoit regorgé en quelque lieu creux, elle attiroit avec le temps, vne substance salée à soy de ladite terre, & par l'ardeur du Soleil elle

venoit à se prendre & espeffir de telle sorte qu'elle s'edurcissoit par fois, si on n'y prouuoit, tout ainsi qu'une pierre. Tel estoit le Nitre qui se trouuoit en Alexandrie, qui estoit aussi le moindre, & different des vrayes marques du bō, qui estoit d'estre subtil, cauerneux, & poreux, ainsi que Pline & Dioscoride le descriuēt. Pour reuenir dōcques à nostre salpêtre, different du Nitre, si ce n'est qu'il symbolise en quelque qualité avec iceluy, cōme pourroyent faire tous sels les vns avec les autres, nous pourriōs dire avec raison la susdite poudre ne pouuoit recevoir aucune venenosité par son moyen, cōme n'estât fait que d'une graisse coulāte par le trauers des vieilles murailles de quelque caue, ou d'un vieil rocher & autre cauerneux (d'où, mesme il se pourroit faire qu'on luy ayt dōné ce nom de salpêtre, comme sel de pierre) ou bien des terres grasses & pourries des estables & vieux cemetieres, desquelles par le moyen des ebullitions de l'eau on tire ledit salpêtre. Lequel on ne peut iuger pl⁹ veneneux qu'un autre sel, veu qu'il

*Plin.
lib. 13.
chap. 10
Diosc.
liure 5.
chap. 89*

sert à la commodité de la vie, ainsi que plusieurs mesme en vsent ordinairement. Et pource que ie croy qu'il n'y a personne qui voulust disputer le contraire, ie pourray conclurre avec tant d'autres excellens Medecins ladite poudre n'estre veneneuse à raison desdits simples: Ny mesme aussi à cause du charbon (troisiesme ingredient) fait de saule, ou d'autre bois sec, lequel n'est nullement veneneux, ainsi que les filles qui ont les pales couleurs, & la maladie appelée *Pique* l'expérimentent: & moins encore les liqueurs desquelles elle est communément arroufée, sont veneneuses, qui sont le vin, ou l'eau de vie. Or voila quant à l'essence de la poudre, laquelle par sa compositiō ne peut estre dite veneneuse, les simples ou ingrediēs ne l'estans aucunement: comme elle ne l'est aussi par sa trāsmutatiō en qualité ignée, veu que la raison nous enseigne que le feu resiste au venin, tant par son actiō, que par sa puissance. Voila pourquoy Alphōsus Ferrius s'abuse grande-

ment de recercher quelque venin en ceste poudre, duquel elle est totalemēt exempte, comme nous l'auons demonstté cōsiderans de près la nature de ces simples. Et l'experience qu'en font les Reistres ordinairement l'en pourroit encor trop mieux desdire, qui en prennent vne bonne quantité avec du vin, apres auoir receu quelque coup, & vsent de cela pour vn singulier remede. D'où pensez vous donc, dira quelqu'un, que le venin puisse estre compliqué en ces playes? car il faut doncques par necessité que ce soit par le moyē de la balotte qui imprime le coup, laquelle estant faicte cōmunément de plomb, ne peut estre veneneuse, veu que ledit plomb est entierement familier à nostre nature, estāt fort propre à la consolidation & exsiccation des vlceres, soit qu'on l'applique avec sa forme & nature metallique, cōme en platines qu'ō fait ordinairement pour abbatre les bords des vlceres cacoethes & malins: où biē qu'iceluy estāt mortifié, on vse de sa chaux parmy les vnguēns & emplastres, ainsi qu'on faict de la ceruse & du minium,

suiuant

fuiuant en cela l'opinion de tous les anciens Medecins : fans que par l'vſage deſſuſdit, on puiſſe apperceuoir quelque ſigne mortel , ou qui denote le venin : veu qu'on peut adjoſter encore que les bales faites d'iceluy plomb demeurent quelquefois vn long temps dans les corps de ceux qui en ont eſté naurez, & ce ſans aucun dommage. Or pour reſpondre à cette queſtion aſſez pertinente : le confeſſe certes que le plomb, par ſa ſimple conſideration ou nature, ne peut apporter quelque qualité veneneuſe aux ſuſdites playes, ſi ce n'eſt que le venin y ſoit transmis, comme à la verité il ſe peut faire. Car il ne faut douter que le plomb (cōbien qu'il ſoit vn corps peſant & terreſtre entre tous les metaux, ne ſoit toutesfois fort rare & ſpongieux, ſuiuant l'opinion de tous les Philoſophes, comme eſtant fait d'vn ſouphre impur & combuſtible, abondant en grande quantité de mercure, touteſois gros, impur, & feculent: d'où luy prouient & la facilité de ſa fuſion, & ſa rarité & molleſſe) ne ſoit fort propre par conſequent à receuoir & ſe

imbiber de quelque liqueur quelle qu'elle soit. Que si le fer qui est plus dense, solide, & moins poreux (comme abondant en bien petite quantité de mercure) peut recevoir quelque qualité veneneuse, comme les fleches envenimées, desquelles les Anciens ont tant parlé, & sur lesquelles ils se sont tant travaillez à rechercher les remedes, nous le demonstrent, il ne faut aucunement douter que le plomb ne soit plus apte à ce faire entre tous les autres metaux, pour les raisons declarées. Or pour demonstrier que ie ne parle desdites fleches envenimées qu'avec tesmoignage, il faut voir ce qu'en escrit Virgile au 9. 10. & 12. de son *Æneide*, Silius en son premier liure, Ouide au 3. de *Trist.* & Homere en son premier liure de l'*Odyf.* Pareillement Theophraste en son 9. liure des plantes chap. 15. tesmoigne qu'en *Æthiopie* se trouue vne racine veneneuse, de laquelle les gens du pays oignent leurs fleches. Pline en tesmoigne autāt des *Scythes* au liure 12. chap. 53. & Paulus *Ægineta* en son 6. l. chap. 88. des *Danois* & *Dalmatiens*. Et gene-

ralement de tous les Barbares, Dioscoride au li. 6. chap. 20. allegue le semblable. Et ne sert rien d'alleguer que le plôb, reiettant mesme sa crasse & ordu-
 re en la fonte, ne pourra receuoir quel-
 que substance d'autre sorte. Car c'est v-
 ne chose ordinaire que tous les metaux
 imparfaicts se nettoient de leur terre
 feculête ou souphre impur par le moyê
 du feu, & par ce mesme moyen se ren-
 dent de beaucoup plus purs, s'affinans
 chacun en leur substance. Par ce moyen
 les preparations du cuiure, de l'estain, &
 du fer mesme se font, lequel fer par sa
 fusion reiete ses feces & ordures qui se
 separent au fonds, & demeure metal
 plus pur & sincere, qu'on appelle A-
 cier, comme Arist. le tesmoigne. Or
 combien que ce soit le propre de ces
 metaux imparfaicts de reietter leur
 crasse & leur ordure par le moyen du
 feu, comme nous auons dict, tant y a
 toutefois qu'ils ne laissent à receuoir &
 s'abbreuer d'une substance estrange &
 aliene mesme de leur nature. Car qui
 est celuy qui doute que l'Acier entre
 les plus solides, ne reçoie vne trem-

*Me.
 teor. 4.*

pe qui l'endurcit, de toute contraire substance? Qui dira que le vinaigre, que la fuye, & le sel, que l'eau de la piloselle, ou des vers de terre, meslée avec le suc des refforts, soient de la substance de fer? Et toutefois trempé dans ces choses la & esteint par plusieurs fois, il se rend si dur, qu'il seroit incroyable, si on ne l'auoit expérimenté. Comme au contraire il se ramolit & se rend du tout traittable, estant esteint par plusieurs fois dans le suc de la cigue, des guimaues, & du saou. Autant en aduienn-il à l'estain, & mesme au plomb, lesquels fondus & esteins par plusieurs fois dans le jus de squilla, l'un y laisse sa strideur, & l'autre, à sçauoir le plôb, pert sa mollesse & noirceur: ce qu'ils ne pourroyent faire s'ils n'auoient retenu quelque peu de l'esprit & vertu des susdites trempes. Ces choses donc demonstrent assez clairement qu'encore qu'ils se purgent de leur crasse par le moyen du feu, ils ne laissent toutesfois à recevoir ou s'imbi-ber d'une substance mesme d'autre sorte. Or ce seroit s'abuser par trop de croire que la meslange des esprits métalli-

ques semblables & alliables, ne peut estre faite tant plus facilement. Car nous voyons que le cuiure se teint & iaunit par l'esprit de la Calamine & de la Tutie, cōme aussi il se blanchit receuāt ce-
 luy de l'Arsenic, de l'Orpin, & sembla-
 bles. Ce qui nous fera conclurre que si
 les metaux (desquels en general on
 peut faire les bales) & entre tous plus
 facilement le plomb, sont aptes à rece-
 uoir toute substance spirituelle, princi-
 palement estāt de leur sorte, desquelles
 (comme de tant d'eaux Mercurielles
 infectes & mortelles qu'on peut com-
 poser, adjoustant les jus des Aconites,
 du Napellus, du Rhododendron, de
 l'Apium risus & semblables, lesquels
 par toute leur substance blessent & cor-
 rōpent la nostre) on peut faire des mix-
 tiōs si veneneuses, qu'il ne faut douter
 que les susdites bales ne les recoiuent,
 & les receuant, ne rendent les playes
 cōpliquées avec telle venenosité, que
 ne faisant que passer, elles en peuuent
 delaisser les marques trop dangereuses,
 quand on n'y donne tel ordre qu'il est
 expedient. Car l'experience nous de-

mōstre qu'il y a aujourd'huy beaucoup de mixtions si veneneuses & mortelles, que si en icelles on trempe le fer d'une flesche ou d'un autre traict & qu'on en soit simplement blessé, pourueu que le sang en sorte, combien que la flesche ne face qu'entrer & sortir, si est-ce que le venin est si subtil & pernicieux que coulant, & s'insinuât des petites veines aux plus grâdes, & de-là aux parties nobles, principalement au cœur, il tuë incontinent celuy qui sera nauré, si on ne luy baille son propre contrepoison. Ce que i'ay bien voulu mettre en auant cōme chose tres-veritable, que i'ay veüe, & beaucoup d'autres grands & excellēs personnages dignes de foy, pour demonstrier les effects admirables & prodigieux qui sōt aujourd'huy en nature: lesquels si on ignore, ne doiuent pour cela estre estimez impossibles. Or i'en parle plus amplemēt dans vn liure des contrepoisons que i'ay entrepris, lequel i'espere donner bien tost au public, auquel i'ēseigneray le vray remede à chose si pernicieuse & mortelle. Que ceux doncques qui ne se peuuent persuader

*Ce liure
a esté
imprimé
depuis.*

telles choses, se fermēt la bouche: qu'ils s'asseurent lescdites playes pouuoir estre veneneuses par le moyen des bales de plomb, qui sont les plus communes, ou de quelque metal dōt on les peut faire: ce qu'ils pourront trop mieux cōprendre, que par vne simple lecture de Galien, quād ils prēdront la peine de voyager par des regions diuerſes, & frequenter plusieurs doctes personnages, & voir à l'œil des diuers effectſ & miracles de nature, qui ne peuuent estre cognus d'un chacun. Or de peur que voguāt en trop grande mer ie ne mēdesuoye de mon propos, ie concluray qu'on peut enuenimer les bales, non pas mettant le venin dans quelque pertuis faiēt en icelles, ainsi qu'aucuns se sont persuadez, mais bien par leurs reīterées extinctions dans lescdites eaux mercuriales, & ius des herbes veneneuses biē choisies, qui peuuent mesme chāger & peruertir toute la substance d'icelles, & faire impressiō de leur maligne qualité (tant ils sont subtils & spirituels) ausdites playes, ne faisant mesme que passer si vīstement par le corps. Ceux-la le croiront encore mieux qui

l'ont veu experimenter sur les bestes: & cette experience, que nous confirmons par raison en nostre liure des Cõtrepoysons, fermera la bouche à ceux qui en voudront disputer le contraire. Mais quand encores ie luy aurois accordé le boulet passant si viftement par le corps, ne pouuoir faire son action si tost, ny l'impression de son venin : n'y a-il pas quelque playe, où il demeure assez longuement, & le venin qui peut estre enclos dans ledit boulet (dont ie croy que nul ne doute) n'a-il pas assez de temps pour pouuoir estre communiqué? Car tant plus il est composé (comme il se peut faire ainsi que nous l'auons dit) d'une substance spirituelle & tres-subtile, tãt plus ses effects sont soudains & subtils: infectant par sa vapeur maligne, cõmuniquée par le moyen des veines, des arteres, & des nerfs, les esprits naturels vitaux & animaux, & lesquels par vne contrarieté il suffoque se meslant avec eux, & par ce moyen on perd la vie qui cõsiste en la viue & deuë actiõ d'iceux. Ces venins aussi si subtils & cõmuniquables, sõt les vrais & les plus pernicioeux,

comme nous le voyons par les morsures des viperes & autres bestes venimeuses. Que si pour dernier refuge on me vient alleguer, comme aucuns ont voulu faire, que le susdit venin empraint dans la bale, peut estre chassé, ou cōsommé par le moyen du feu: ie me seruiray d'un argument pris d'eux mesmes, & duquel ils vsent pour demonstrier ces playes n'estre nullement ioinctes avec brulure, alleguans (comme il est veritable) qu'à grand' peine la bale s'eschauffe tant (ayant atteint mesme vn corps bien dur) qu'elle ne se laisse bien manier avec la main, si on la prend incontinent apres le coup. Tellemēt que ie ne trouue ce feu aucunemēt suffisāt pour pouoir cōsommer ou purifier le venin, qui sera imbu par toute la substance de la bale, & qui sera tant imprimé dedans, qu'il l'aura mesme changée & peruer-tie du tout par la mauuaise qualité. Au reste ie me soucie bien peu de ce qu'on m'alleguera d'Aristote, que le fer des flesches s'eschauffe bien en telle sorte, que mesme le plomb s'ēfōd:veu que l'ex-perience nous demōstre le cōtraite aux

*Auzi
liur. de
Cælo.
chap. 7.*

arquebusades & poussées par le moyen du feu, & d'une plus grande vitesse. Mais quand bien ie cōfesseroye l'opinion d'Aristote estre vraye, toutesfois les exēples que nous auōs cy dessus alleguez des fleches enuénimées, demōstrent assez clairement le venin n'estre osté par ce feu si grand qu'on imagine, & moins encore le peut il estre par vn moindre qu'ō y trouue. Tellement que ie ne diray pas eschauffer seulement, mais quand on fondroit & refondroit la bale, à grand' peine pourroit-on faire oster ceste substance (bien qu'elle soit tres-subtile) tant bien elle est alliée & meslée avec tout le corps metallique, lequel mesme elle aura du tout alteré. Ainsi on ne void pas que l'Arsenic s'esuanoüisse aux premieres fontes, ny l'esprit de la Calamine, ou de la Tutie, meslez avec le cuiure blanchy ou iauny : combien que nous ne les estimons pas du nombre des venins, qui exterieurement & loing des parties nobles sont si mortels, desquels nous auons parlé cy dessus, par toute leur substance & propriété occulte, comme les effects le rendent trop apparent & manifeste.

Or nous pensons auoir assez demonstté clairement & à l'œil que les boulets peuuent estre enuenimez, d'un venin mesme qui en si peu de moment, & en passant si viste peut laisser ses effects, & encore trop mieux s'il demeure dans le corps, comme il se peut faire, & aduient aussi communément: & qui ne peut estre consumé par le feu si petit qu'à grand' peine il les eschauffe. Et ainsi nous concludrons pour la fin par les raisons alleguées, que les playes faites par les pistoles & autres bastons à feu, peuuent estre compliquées avec venenosité, non à raison de la poudre laquelle en est exempte, ainsi que nous l'auons demōstré, mais bien par le moyen de la bale enuenimée, comme peut aduenir. A quoy le bon & expert Medecin & Chirurgien doit prendre soigneuse garde, sans s'opiniastter, que si cela n'aduient ordinairement, que toutesfois il ne se puisse faire: non rant le iour d'une bataille, où le moyen peut defaillir, & par incommodité & par ignorance, mais lorsque quelque mauuaise ame trop sçauante se sera pre-

parée de guet à pens à faire quelque grand coup, où il n'oublie rien qui puisse aider sa mal heureuse, damnable & meurtriere affection. A quoy les Princes & grâds Seigneurs en ce siecle peruers principalement sont plus subjets que les soldats simples, pour l'amour desquels on ne recherche choses si detestables. Nous delaissons cependant de parler de la cognoissance qu'on peut auoir, quand ces playes seront compliquées avec le venin, des signes & indices desquels nous traiterons amplement au chap. de la vraye & methodique curation d'icelles. Car aussi le second poinct & la diuersité qu'on trouue en ces playes nous appelle, à sçauoir la brulure ioincte ou alienée d'icelles.

*De la
brulure
ioincte
aux ar-
quebuzades* Et pour en dire ce qui m'en semble, ie ne puis avec tant d'autres personnages, que reprouuer l'opinion de ceux qui ont escrit ces playes estre ioinctes avec brulure, & ce à raison du boulet, qu'ils pensent tant s'eschauffer par le moyen de son mouuement, & de l'air enflammé qui le pousse, qu'il est idoine, ou suffisant à cauteriser comme ils taschent

pareillement de le demonstrier par les effects qui en suruiennent, qui sont la noirceur, l'escharre, les grandes inflammations, & semblables symptomes propres aux bruslures. Ce que ie ne yeux contester pour eux, sçachant que eu esgard à la bale (laquelle estant cōmunément faite de plomb á grand' peine peut endurer l'ignition ou embrasement sans se fondre) ils ont perdu leur cause par les doctes & viues raisons desduites au long au liur. de M. L. Ioubert tres-docte & tres-excellent personnage, & digne d'estre mis au rang des premiers Medecins, ainsi qu'il le tient aujourdhuy en nostre Frâce. Cependāt i'estime aussi le tout biē cōsideré, qu'il me cōfessera ces playes pouuoir estre ioinctes avec bruslure, non à raisou de la bale tirée d'une arquebusade de bien loin : mais par le coup de la pistole tiré de si prés, ce qui est maintenāt tout ordinaire, que les accoustremēs en sont bruslez entierement : & ce par le seul moyē de la poudre enflammée, laquelle on voit sortir hors du calibre de ladite pistole. Que si on veut dire que ce feu ne va gueres loin, i'alle-

gue d'autre part, qu'il peut se donner de si près, touchant le corps mesme, qu'il se pourra faire sentir deuant que d'estre esuanouy. Mais quelqu'autre plus subtil dira : Les armes & accoustremens mesme ne pourront-ils pas empescher que ce feu ne puisse faire son impression en la partie blessée? Quand aux armes, ie ne doute pas qu'elles n'y resistēt, comme aussi pourra faire vn bon collet de buffle, beaucoup plus encoré que les simples vestemens qui se bruslent, & la chemise mesme, quand le coup est donné de si près que le bout du canon touche la partie. Et ne faut lors douter que l'air flamboyant, poussant & suiuant la balle, qui fait l'ouuerture, ne puisse s'imprimer mesme dans la partie blessée. Mais que respondront ils, si le coup est donné, la pistole touchant vne partie desnudée de tout vestement, comme il se peut faire? Tous les soldats ne portent pas le gantelet en la main, ny l'armet en teste. Et puis, qui est-ce qui me niera que l'ennemy ne puisse porter le bout de sa pistole iusques dans la gorge de son ennemy? dans la main aussi, ou dans la

face descouuerte, selon qu'on se recon-
tre? Ceux n'en pourront seulement des-
dire qui se trouuent aux occasions, trop
mieux que les autres qui en parlent l'i-
maginant, ou l'ayant ouy dire. Or cela
aduenant, & le coup estant donné à des-
couuert, & de si près que le canon tou-
che la partie, comme il se peut faire, &
se fait bien souuent, on m'accordera à
la verité, ces playes pouuoir estre com-
pliquées avec adustion & brulure. Voi-
la pourquoy ceux là s'abusent, qui pen-
sent qu'elles en soyent tousiours exem-
ptes: estimans que le feu prouient de la
seule bale, & faisans les reigles trop ge-
nerales, qui peuuent neantmoins estre
rompues par les exceptions particu-
lières qui y suruiennent, comme nous l'a-
uons dit, & du venin qui peut estre
ioinct avec ces playes & de l'adustion.

Or voila pour conclusion ce qu'il
me semble touchant l'essence de ces
playes, & les diuerses affections qui les
peuvent accompagner, desquelles les
plus communes sont la solution de con-
tinuité avec la contusion & dilacera-
tion: qui nous representent seulement

deux indications curatiues, à ſçauoir le reuinement des parties diſſoiuētēs, & la ſubſtitution des dilacerēcs : leſquelles ioinētēs avec bruſlure, comme nous auōs dit qu'il ſe peut faire, il nous faudra recourir à vne troiſieſme indiatiō, qui ſera d'eſteindre le feu & tirer l'empireume, ou ardeur. Et à vne quatrieſme meſme, à ſçauoir à vn bon contre-poiſon, quand nous penſerons qu'il y ayt quelque venenoſité : obuians touſiours principalement aux choſes plus vrgentes, & recherchant autant de diuerſes indications curatiues, conſeruatiues, & preſeruatiues, qu'il ſe preſente de maux compliquez avec diuerſes cauſes & accidens contre nature.

Des differences, ſignes, & iugemens de ces playes.

C H A P. I I.

CE V X qui conſidereront de près quelle eſt la nature des parties, eſquelles ces playes ſont faites, leur ſubſtance, vtile action, poſition, ſentiment & figure : quelle eſt l'eſſence

sence de la diuision ou solution d'vnité, & quelles sont les propres differences, pourront cognoistre par bonne raison & experience quelles & quantes indications sont requises pour leur vraye curation, faisans correspondre icelles au nombre des affections & maladies presentes: & empeschans tousiours que celles qui ne sont encore en estre, ne suruiennent, suivant l'opinion de Galien en toute sa Methode. Or pour cet effect la cognoissance de ces propres differences doit estre totalement speculée, considerant leur grandeur ou petitesse, profondeur ou cavitè nulle, faites par les boulets, comme cause pro-catarctique de diuerse matiere metal-lique & figure, à sçauoir ronde, longue, platte, grande, moindre, ou fort petite, suivant le calibre de la piece qui tire le coup; qui foudroye & fracasse le corps humain en diuerses manieres, tantost l'enleuât du tout, ou quelque membre particulier: tantost penetrant tout au trauers des cavitèz d'iceluy, ores meurtrissant la chair, les parties nerueuses, & brisant les os, & tantost meurtrissant

seulement la chair sans manifeste ou-
uerture, selon que la balle rencontre, &
que le coup est tiré de près, ou de loin,
d'une ou d'autre piece de calibre : &
que le corps est atteint du tout desnüé,
ou bien reuestu de quelque bonne ar-
mure à l'espreuue qui empesche le plus
souuēt qu'il n'est rien ou bien peu bles-
sé, ou bien pour le moins que la playe
n'est si grande, profonde & dangereu-
se : resistant par sa durescé à la trop
grande & foudroyante, violence de la
balle, principalement le coup n'estant
tiré que d'une arquebuse ou pistole. Or
pour certain toutes ces differences se
rapportent à vn genre, à sçauoir à la so-
lution de cōtinuité qu'on y trouue ma-
nifeste & quelquefois occulte. La ma-
nifeste est demonstree par le sens de la
veuë & de l'attouchement, quand on
voit vne playe apparente avec meur-
trisseure & decoloratiō de la chair, qui
semble estre vn eschare, avec vne dou-
leur pesante, principalement quand les
playes sont avec lesion des parties ner-
ueuses: ce qui nous pourra signifier (a-
ueç le recit du patient qui y sert beau-

coup) la playe estre faite d'un coup de pistole ou semblable. L'occulte solutio de continuité , sans entameure de la peau , est dite Echymose: que nous cognoissons par le sang qui est espandu parmy la chair & le cuir, rendant la partie de couleur liuide, noiraistre, violette, & du tout meurtrie. Ces signes sont les plus communs desdites playes : où on considere la simple diuision compliquée avecques la contusion. Mais d'autant que nous auons demonstté par raison au chap. precedent qu'elles peuuent estre compliquées quelquesfois avec venenosité & adustion, cõtre l'opinion de plusieurs, il faudra que le Medecin s'estudie à discerner par leurs propres signes particulierement chacune desdites affections, qui peuuent estre compliquées avec les susdites playes, à fin de chercher particulierement à chacune son remede, ayant tousiours esgard à l'affection la plus perilleuse, & qui met le patient en plus grand danger: laquelle on ne doit p̄ser selon Galie seulement la premiere ains aussi seule estans contraincts de delaisser souuentefois

pour icelle, non seulement les autres affections ia faites, mais aussi d'en engédrrer de nouvelles pour secourir seulement la perilleuse. Voila pourquoy la cognoissance de ces playes qui sont compliquées avec le venin, lequel peut estre introduict par la balle, cōme nous l'auons démontré assez clairement au premier chap. est totalement necessaire, afin qu'on n'impute la mort qui en pourra suruenir inespérée à la corruption de l'air & autres premieres qualitez: la faute prouenant le plus souuent ou d'ignorance, ou d'opiniaistreté: quand on se persuade contre la verité, ces playes ne pouuoit iamais estre venimeuses, & par ce moyen on oublie les vrays remedes. Ce qu'aucuns attribueront parauenture pour eschappatoire à la repletion ou mauuaise habitude, laquelle ie confesse avec Galien estre vne des grandes causes, qui peuuent incommoder & nuire à toutes playes. Or encore que les signes qui denotent le venin, ayent quelque chose de commun avec ceux des coups des bastons à feu, où il n'y a que la simple contusion

*Au 4.
de la
method
chap. 4.*

compliquée: si est-ce qu'on les pourra discerner encore selon qu'ils sont virgens plus ou moins, suivant la grandeur des accidens qui y suruiennent, & les choses extraordinaires qui bien souuēt les accompagnent. Si doncques la chair est trouuée plus liuide que celle des communes playes des bastons à feu, & comme morte avec decoloration de toute la partie, douleurs insupportables extraordinaires inflammations, avec punction des bords de ladite playe, & endormissement qu'on sent par tout le corps, le tout accompagné le plus souuent de fièvres ardentes, defauts de cœur, & alienations d'esprit: cela démontrera quelque qualité veneneuse estre ioincte avec ladite playe, principalement quand on trouuera qu'il n'y a quelque cause manifeste, par laquelle on deust attendre si grieufs symptomes: comme ie l'ay veu aduenir quelques-fois mesme es playes faites sans aucun brisement d'os, ou dilaceration des parties nerueuses. On pourra encore estre mieux assuré de tout, par la cognoissance de quelques indices exte-

*Signes
du ve-
nin cõ-
pliqué
avec les
playes.*

rieurs qu'on pourra comprendre par le rapport du patient, ou de ses domestiques, ou autres presens, avec les conjectures du lieu, des personnes & de la façon qu'on aura esté blessé. Or entre les signes les plus certains & infaillibles c'est la consideration de la bale, si elle se trouue: laquelle estant partie par le milieu, si on la voit estre obscure, entremêlée d'une couleur violette & rouge, & de toute autre façon qu'on ne trouue les bales ordinaires estans parties, lesquelles demonstrent quelque lueur apres la couppure, on se pourra tenir pour tout assuré ladite bale estre imbuë de quelque venin qui peruertist mesme & change sa substance. Ce que on cognoist principalement par la couleur au dedans du tout mesme alterée, obscurcie & ternie, comme nous auons dit cy dessus. On pourra encore iuger de cela par le moyen du feu, lequel n'est dit sans cause estre fort propre & apte pour la purification de tous venins. Car estans (principalement ceux qui sont plus grands & parfaicts) d'une substance du tout spirituelle, ils sont dechassez

comme estans du tout volatiles, non par quelque chaleur modérée, telle qu'on la sent à la bale poussée (cōme M. Ambroise Paré a pensé) mais par vne chaleur violente, requise à toute sublimation: Ainsi on voit le Mercure, l'Arse-
 nic, l'Orpin, & semblables espritss'es-
 uanoüir: & ne les pourroit on purifier,
 s'ils n'estoient retenus par le froid, au
 col des vaisseaux de leurs sublimatoi-
 res. Si doneques on fait fondre la bale
 suspecte, & qu'estant fonduë on la tiēne
 assez long-temps sur le feu ardent, &
 qu'on voye qu'elle iette vne fumée noi-
 rastre, & puante (de laquelle il se faut
 preseruer) & que le metal sortant de la
 fonte, au lieu d'estre purifié, il soit noi-
 rastre, & du tout terny, & obscur (ce qui
 aduient par la vapeur veneneuse, la-
 quelle en s'exhalant l'environne) ce se-
 ra vn signe infailible du venin impr-
 mé dans ladite bale, lequel peut estre
 compliqué avec la playe, comme nous
 l'auons disputé cy dessus, principalemēt
 suiuant la longueur du temps qu'elle y
 demeurera. Vqila les signes qui deno-
 tent le venin, lequel nous iugerōs estre

*Signes
de la
brûlure*

tant plus perilleux, quand nous verrons tout d'un coup les forces dissipées, & le corps abattu. D'autre part, l'enleueure des vessies, l'escorcheure, la douleur cuisante, & la seicheresse du cuir retiré & endurcy, demōstrent l'adustion compliquée par le moyen de la poudre enflammée. Dequoy on pourra estre mieux aduertit par le recit du patient, qui scaura dire à peu près s'il aura receu le coup de bien près; ce qu'aussi les accoustremens bruslez demonstrent. Et à toutes ces choses le Medecin prendra vne soigneuse garde, comme estans les plus urgentes, & qui peuuent empirer le mal, & empescher la propre guerison, par la multitude des defluxiōs & autres grieux symptomes qui communément les accompagnent, quand si promptement & premierement on n'y obuie par bons remedes: ce que mesme Galien commande au 4. de sa Methodē, chap. v. disant que la cure de l'vlcere, qui est conioinct avec autre affection, de laquelle la curation denoit preceder, n'est pas comme de l'vlcere seul: ains premierement icelle affection doit estre pensée,

& puis apres l'ulcere. 66

Or de ces choses on pourratirer vn *De In-*
 plus assuree iugement, principalement *gement.*
 quand on se proposera deuant les yeux
 la sentence de Galien reiteree plusieurs
 fois en sa Methode au 4. liure chap. 6. à
 sçauoir les maladies estre grandes en
 trois manieres. Pour l'excellence & no-
 blesse de la partie offensée: Pour la ve-
 hement & grandeur du mal: Et pour
 sa malignité. Nous iugerons doncques
 les playes qui penetreront par la sub-
 stance des parties principales du cœur,
 du foye, & du cerueau estre necessaire-
 ment mortelles. Celles des poulmons,
 du diaphragme, du petit ventre, de la
 ratte, des rognons, qui sont aussi parties
 principales d'office, estre le plus souuent
 mortelles: comme celles des intestins,
 principalement des gresles & moins
 charnus, & de la vessie, pour ce qu'elles
 ne peuvent estre reunis, pour estre par-
 ties membraneuses: & par consequent
 celles qui penetrent au trauers de la te-
 ste, de la poitrine, & du ventre inferieur,
 seront tousiours perilleuses, pour les rai-
 sons susdites. Les playes, tant plus elles

sont grandes & profondes, avec dilaceration des nerfs, & brisement des os, tant plus elles sont dangereuses. Principalement celles qui sont faites à la teste avec fracture du test: & celles qui sont près des ioinctures, à cause des grands & diuers symptomes qui les suivent. Les playes où la malignité, & principalement où le venin est compliqué, sont des plus dangereuses, bien qu'elles soient petites en apparence: pource qu'à raison de la contrariété de toute la substance d'iceluy venin, & des qualitez excedentes, non seulement le temperament, mais la propre substance des facultez du corps est totalement peruertie & changée: principalement quand la playe est faite avec entameure de la peau, qui ne peut lors empescher par sa densité (comme elle le pourroit faire autrement, mesmemēt si le venin estoit d'une substance crasse & terrestre) que la contagiō n'infecte les esprits, le sang & les humeurs: & que par ce moyen elle ne soit cōmuniquée aux parties nobles, d'où la mort s'ensuit le plus souvent.

Au reste, on iugera ces playes plus dangereuses, quand elles serōt meslées avec diuerses & grandes affections & symptomes, les corps estans mal-sains. Lors aussi principalement qu'on verra regner en l'armée (chose assez ordinaire) les maladies dites des Grecs Endimiques, causées par le seul moyen de l'air, lequel, cōbien qu'il soit d'une substance tenue & simple & non sujet à la putrefaction, toutesfois ameine subit vne grande mutation aux premieres qualitez, estant infecté de beaucoup d'ordures, infections, & puantises, prouenant de tant de bagages, charongnes des hommes, cheuaux, & autres bestes mortes, destituées de sepulture: d'où l'air estant du tout empuanty & infecté, s'ensuiuent ces maladies populaires & fort communes aux armées. Les grandes permutations & inequalitez prouenant de l'iniure du temps, sont aussi fort dommageables à ces playes, & mettent en danger les blessez: principalement quand l'hyuer precedent aura esté fort sec à cause de la Bize, qui aura regné, & le prin-temps pluuieux

& austral, qui engēdre beaucoup d'humours superflues, lesquelles estans troubles par cette diuersité, se corrompent facilement: d'où les fieures ardentes & pestilentiell'es s'ensuiuent, quand la corruption de l'air si est entremeslée, & les inflammations, gangrenes, & morifications, & en fin la mort, cōme Hippocr, le tesmoigne en ses liures des Epidemi. & au 3. des Aphor. Je n'oublieray la mauuaise, & desordonnée façon de viure ordinaire, non seulement des simples soldats suiuan's le camp, mais des plus grands Capitaines, qui sont contrains le plus souuent de manger ce qui leur est présenté, soit froid, ou chaud, cuit ou creu, bon ou mauuais, force legumes à demy pourris, force fruiçts: ayans pour breuuage le plus souuent des eaux telles, qu'elles sont mesme corrompues, ou des vins tournez, frelatez: & ce à toute heure, sans attendre aucune concoctiō, contre le naturel de plusieurs, qui en est peruer'ti & changé. De laquelle mauuaise façon de viures s'engendrent aux armées les maladies appelées par les Medecins Pandemiques,

fort nuisibles à ces playes : entant que par ce moyen le sang est cortompu, les humeurs vitiées, ce qui les rēd plus malignes & accompagnées de plus de diuers accidens. Mais on iugera au contraire les playes, plus elles seront esloignées de ces choses, & des parties nobles, & sans grande dilaceration, ou de nerfs, ou des os, ou sans quelque malignité, tant moins d'agereuses, mais plus guérissables. Or quand mesme le Medecin aura iugé la playe entierement mortelle, si ne faut-il pourtant abandonner le patient, comme vn homme du tout perdu & desespéré: ains le faut secourir de prompts & bons remedes, estimant que nature, principalement bien aidée, fait quelquesfois des miracles. Dequoy les Empiriques scauent trop mieux faire leur profit, au dōmage & honte de toute la Medecine: entreprenans de guerir, ou en faire au moins tout deuoir, ceux lesquels souuētefois par le moyē d'icelle nature, ils releuent du tombeau, cōme abandonnez par les Medecins, & ce à leur grande ignominie, & gloire perpetuelle des

autres. Ce qui est aduenü n'agueres, ainsi que i'ay entendu au Seigneur de Vins, deuant la Rochelle, lequel estant blessé au trauers du corps d'une arquebusade, par laquelle on estimoit que la substance du foye auoit esté offensée, fut abandonné, & iugé totalemēt mort: & neantmoins, receut entiere guerison par le secours de certains Gentils hommes, qui entreprindrent de ce faire par des medicaments assez domestiques. Voila vne exēple suffisant pour demonstrier les effects merueilleux de nature, qui trompe bien souuent le iugement des plus doctes Medecins, qui ne doiuent pourtant estre destituez de bons & extremes remedes, mesme pour les maladies extrêmes & mortelles: Estimāt avec Corn. Celsus, qu'il est plus cōuenable d'appliquer quelque remede, que de n'en essayer du tout aucun, mesme au maladies du tout desesperées.

De la cure desdites playes.

C H A P. I I I.

LA cure de ces playes est prise de deux generales intentions, &

d'vne particuliere, à sçauoir de la diete, ou regime de viure, de l'euacuation des humeurs, & de la Chirurgie, ou operation manuelle. Et afin que nous pour-
 suiuiions le tout par ordre & par bonne & facile methode, nous parlerons pre-
 mierement de la diete, ou du regime de
 viure que doiuent tenir les blesez, fort
 vtile, & entierement necessaire, pour la
 curation de ces playes.

La façon & vraye maniere de viure *Du re-
 gime*
 des blesez, cōme des autres maladies, est comprise en la deuë administration
 des six choses non naturelles: Et pour-
 ce aussi la consideration particuliere
 qu'on doit auoir de la sorte du mal sert
 de beaucoup, comme celle du temps,
 des forces, de la nature & complexion
 du blezé, & coustume d'iceluy, tant en
 son manger qu'en son boire, ainsi que
 Hippocr. l'enseigne fort amplement en
 son liure de la diete aux maladies ai-
 gues. Car s'il faut auoir esgard aux ma-
 ladies, nous sçauons que les chroniques
 & longues, requierent autre façon de
 viure que les aigues, laquelle mesme
 doit estre changée suiuant le commen-

cement, augmentation, estat, ou diminution d'icelles. Il ne faut aussi douter que le tēps & les diuersitez des saisons (les vnes estans froides, les autres chaudes, les vnes pluueuses & humides, & les autres seiches) ne nous doiuent amener quelque changement en la maniere de viure, cōme aussi la diuersité des contrées. Je croy aussi qu'on m'accordera que la nature & complexion du malade doit estre considerée (d'autant que les corps mal sains, tāt plus ils sont nourris, tāt plus on leur fait tort) comme aussi on doit auoir esgard aux forces d'iceluy, suiuant lesquelles on se range non seulement à la façon de viure, mais aussi à l'administration de tous autres medicamens. Or quād à la coustume, ie pense qu'il n'y a personne qui doute que ce ne soit vne chose fort considerable, veu mesme que toutes soudaines mutations sont tant plus dommageables & perilleuses, qu'elles aduenient outre la coustume & cōstitution des personnes, comme Hippocr. le cōclud, & la raison mesme le demōstre. Car quand on voudra, sans auoir esgard

*Hippocr.
au liur.
de la
maniere
de viure
aux
malades
aigues.*

esgard à ces choses, ordonner à tous les
blessez des arquebusades, generalemēt
vne vie estroite, cōme on fait ordinai-
rement, sans considerer que les vns ont
de coustume de manger non seulemēt
trois & quatre fois le iour, mais aussi à
toutes heures: & que les autres ne se
peuvent passer, mesme estans sains de
boire du vin, sans se faire tort, il ne faut
douter que quand nous viendrons à v-
ser subitemēt de quelque façon de vi-
ure austere, qu'il n'en aduienne ce que
Hippocr. cōclud au lieu dessus allegué:
parlant de ceux qui ayans accoustumé
de māger deux ou trois fois le iour, s'ils
ne disnent, ils s'en trouuent debiles: cō-
me il aduient tout au contraire à ceux
qui mangent plus, & en autres heures
qu'ils n'ont accoustumé. Et aussi il nous
faut apprendre, suiuant la docte senten-
ce du mesme autheur, ce qui sera vtile
pour le regime du blessé, par la façon
de viure qu'il aura accoustumée en san-
té. Car il faut tousiours conclure que
nature se plaist aux choses accoustu-
mées & qui luy sont familiares, lesquel-
les, mesme sont plus asseurées, saines, &

profitables, bien qu'un peu contraires à nostre intentiõ, que les autres ordonnées mesme pour le mieux, toutesfois avec vne grãde mutation & subtil chãgement du tout contraire & ennemy de nature. Voila pourquoy les Medecins Allemans, voire les plus doctes, se conforment à ceste coustume, permettant l'vsage du vin à leurs blesez, lesquels ils penseroient autrement estre desia prests d'estre mis au tõbeau, l'eau leur estant fort contraire: ainsi que ie l'ay veu pratiquer en France, & plus heureusement en Allemagne, où les vins sont oligofores & plus petits, sans comparaison, qu'en France. Cependãt ie ne veux pas inferer par ces choses, qu'il ne faille ordonner aux blesez autre façon de viure que la leur accoustumée en santé, sçachant que ie parlerois trop sottement: mais i'entens que les Chirurgiens n'ordonnent vne vie si austere que d'aueuns ont accoustumé: mais que la qualité & quantité des viures soit réglée par eux, suiuant le tẽps de la maladie: car en l'estat les choses estans plus vrgentes, où les inflamma-

tions & les douleurs sont plus grandes, il ne faut que les viures soyent donnez en grande abondance, ains l'abstinence y est fort requise. Il se faut aussi regler suiuant les saisons de l'année, où les ventres sont plus chauds aux vnes qu'aux autres, & les concoctions plus faciles, suiuant la complexion des blesez. Car on permettra des choses aux pituiteux & phlegmatiques, qu'on defendra aux sanguins & bilieux, ainsi que Galien en parle traittant du regime des blesez en sa Methode. L'aage aussi doit estre consideré, comme les forces & la coustume du patient, ainsi que nous l'auons dit: & faut ordonner le regime dès le commencement non si estroit, mais le diminuer peu à peu iusqu'à la fin de l'estat de la maladie: en telle façon toutesfois que le patient puisse subsister, par la regle des choses susdites, qui doit estre necessairement obseruée. Et apres que ces choses auront esté premiere-ment bien considerées, nous viendrons à la deuë administration des six choses non naturelles pour accomplir nostre premiere intention, qui est la façon du

viure conuenable, laquelle nous est entièrement demonstree par icelles.

De l'air

L'air doit estre esleu sec & temperé, d'autāt qu'il est requis tel à toute solution de continuité, qui doit estre reunie par l'exsiccation. Et encore que quelqu'un me puisse alleguer sur ce propos, comme est-il possible de pouuoir ordonner vn air exsiccatif, veu qu'il n'y a rien en nature plus humide que luy, suivant l'opinion des Philosophes, & qu'il surpasse l'eau mesme en humidité, bien que ceste-cy soit plus apparēte, mouillant les choses trempées en elle à cause de son espaisseur, ce que l'autre ne peut faire en telle sorte pour la grande tenuité de ses parties? Je respondray que il peut estre corrigé, & esleu tel qu'il sera plus propre pour accomplir nostre intention qu'un autre. Car ie croy qu'il n'y a persōne qui doute qu'entre les habitations pour cet effect seulement considerables, que les vnes ne soyent plus chaudes, plus froides, plus seches, plus humides que les autres: ce qui aduiuent tant à cause des contrées diuerses, comme on void les regions septen-

*Arist.
au 2. des
Meteor*

trionnales estre froides, & celles du Midi chaudes, selon que le Soleil est plus ou moins esloigné d'icelles : qu'aussi à cause de la situation des lieux & places, les vnes estans constituées dessus les mōtaignes, les autres près des mares, des estangs & riuieres : desquelles diuersitez la qualité mesme de l'air d'alentour est peruertie & changée. Les personnes mesme de l'Asie sont de toute autre nature que celles de l'Europe, ce qu'Hippocr. attribüe à la diuersité & mutation des temps, qui rendent la nature des regions plus rude. Voila pourquoy mesme aujourd'huy nous voyons les habitans aux montaignes, ou près des riuieres, ou près de la mer estre dissemblables, & d'autre nature, que ceux qui habitent aux villes, ou aux champs. Et puis que dira-on de la situation de Ferrare, & de celle de Florence, en l'une desquelles toute playe faite en la teste est mortelle, & en l'autre celle des iambes est incurable ? Voila pourquoy le bon Hippocr. parlant de ces choses allegue que le vent de Midy, dit Auster, rechange ses qualitez, selon les regions

*En son
liure
qu'il intitule
de aëre,
loc. &
aquis*

par lesquelles il passe, plus ou moins, chaudes, froides, ou d'autre qualité. Car il dit qu'il vient premierement des regions froides & glaciales (desquelles principalement les vents ont leur origine, ainsi qu'Arist. le tesmoigne au 2. des Meteores:& qui sont mesme de telle nature que les Septétrionnales, d'où la Bize soufflé si froide, comme ceux qui en sont les plus proches la sentent) & puis passant par la voye du Soleil, & soufflant par le Midy, qu'il s'eschauffe tellement, perdant sa frigidité que mesme il brulle les plantes, & rend seches & arides les personnes qui habitent au pays de Lybie: de-là trauersant par la mer & humant de son humidité, il perd ceste grande siccité, acquise, & se rend autant humide, qu'on l'experimēte en toute l'Italie, & en nostre France, principalement en Languedoc. Et voila pourquoy nous l'estimons tant contraire à ces playes, d'autant qu'il leur apporte par vne telle humidité ioincte avec la chaleur, vne mer d'infection & pourriture, comme i'ay dit cy dessus. On en peut dire autant de la Bize, laquelle on

essaye en certains lieux plus saine & resistente aux putrefactions, & en d'autres d'un effect tout contraire : & mesme lors qu'elle regne, on void pulluler les pestes, & autres maladies causées de putrefaction, ce qu'on doit attribuer & à la diuersité des regions, comme i'ay dit, & à la constitution des lieux, ou places assises près des lieux aquatiques, marecageux, & semblables: par lesquelles la propre qualité des vents peut estre alterée & changée, & les corps par ce moyen rendus plus humides & abbrevuez de superfluitez. Or ces choses estās bien considerées, comme aussi les saisons du temps & de l'année le doiuent estre (lesquelles sont differentes en elles mesmes, à cause de tant de diuerses mutations qui iournellement aduiennent & qui rechantent mesme la qualité de l'air) on en choisira vne propre à nostre intention pour vne habitation conuenable. Et d'autant qu'il est impossible de pouuoir si exactement choisir vne demeure à souhait pour les patients, lesquels on est contrainct (estans trauallez de la douleur, & par la gran-

deur du mal, de laisser sur les lieux mesmes, où ils ont esté blesez, sans oser les transporter gueres loin : il faudra sur tout fuir, s'il se peut faire, les lieux où l'armée aura seiourné long-temps, l'air d'iceux estât tousiours suspect de cōtagiō, & les lieux aussi aquatiques & rendans l'air nubileux & trouble. Au contraire il faudra choisir ceux là qui en sōt esloignez & qui l'ont pur & serain. Il faut aussi que les chambres ayent plustost le regard sur le Septentrion que sur le Midy. Que si l'air nous semble par trop froid, qu'il soit corrigé par le feu, lequel on pourra faire en ladite chambre, y iettāt dessus des parfums de mastic, de roses, graine de geneure, & autres sēblables : & sa trop grande chaleur en tēps d'Esté, soit temperée par irorations d'eau, & de vinaigre, par la iōncée esparse, ou bien par les fueilles de vigne & de saule. Et ainsi on pourra trouuer vn air conuenable, & propre pour lesdits blesez, lequel il faudra corriger selon les parties blessées : veu que les playes de la teste & des ioinctures craignent plus l'air froid, lequel les pe-

netre plustost, que ne font celles des autres parties.

Quand au manger, il doit estre distribué selon les temps du mal, comme Hippocr. l'enseigne, suiuant aussi la complexion du blesé, afin que rien ne soit subitement innoué, qui pourroit nuire beaucoup plus que profiter, comme ie l'ay dit cy dessus. Cependant que les viandes soyent d'un bon suc & peu nourissantes, principalement iusques à la fin de l'estat du mal, où il est expedient de moins nourrir, qu'apres. Que le pain soit leué & bien cuit : qu'on permette les petis oiselets, comme griues, & autres, avec le ius d'orange, du limon, ou la sauce verte, afin d'aiguiser l'appetit : & la panade aussi faite avec un bon bouillon d'un poulet, cuit auparavant avec la bourrache, la buglosse, l'oseille, les laitues & semblables : duquel bouillon il pourra mesme vser le matin pour auoir bon ventre : les pruneaux aussi sont fort propres pour cet effect, comme aussi les raisins de damas confits entre deux plats, l'orge mondé bien cuit, le lait d'a-

Du manger & du boire.

mandes , ou auenant , lesquelles sont fort conuenables, principalement pour le commencement , où lors les bleffez desgoutez ne peuuent rien aualer , qui ne soit liquide. Apres l'estat du mal, on permettra les perdrix , les poulets , & chaponneaux , quelque bon hachis de mouton avec son ius , & celuy de limon : & toutes autres viandes de facile concoction , & de bonne nourriture. Les pauvres se contenteront de quelque panade avec le veau , & le mouton , des pruneaux , raisins , & de quelque poulet : chacun selon sa portée & commodité. Cependât qu'on defêde toutes viâdes de mauuaise digestion & nourriture , & grossieres , tous oiseaux de riuere & marefcageux , le bœuf , & sur tout le pourceau , les chairs salées , les choses mordicâtes , & toutes espisseries. Leur breuage sera la ptisane , le bouchet , ou l'eau filtrée & cuite , à ceux mesme qui seront plus sanguins & bilieux : aux autres , & à ceux mesmement qui n'auront accoustumé de mettre de l'eau dâs leur vin , vn vin claret , ou tenu , bien trempé leur sera permis , mesme des le

commencement, si quelque fièvre, ou inflammation desia suruenue ne l'empesche.

Quand au trauail & repos, il faut practiquer le Prouerbe des Italiens. *La gamba al letto, & la man al petto.* Disans avec Hippocr. en son liure des vlceres, que le reposest totalement conuenable à toutes playes, & par consequent le trauail dommageable. Ce seroit aussi vne grande folie d'ordonner l'exercice à ceux qui ont si grand besoin de repos, & lesquels bien souuent ne se scauroient mouuoir. Il est vray que les frottemens des parties saines faits en leur lieu, & principalement des opposites seruiron de reuulsion, preseruans la descente des humeurs à la partie blessée, & pourrôt aussi exsecher les superfluitez & humeurs qu'engendre le repos. Ainsi que l'enseigne Hippocr. en son liure de la Diete. Quant au dormir il le faut laisser prendre, quand le patient y est disposé, sachant qu'il est fort requis pour la concoction en toute maladie, & qu'il fortifie les vertus perduës à cause des haimorrhagies, ou

flux de sang, douleurs, & autres symptomes qui aduiennent à telles playes. Si est-ce qu'il faut auoir cet esgard, à sçauoir qu'il soit moderé, si les playes sont interieures, & venimeuses, tât pour la crainte d'une plus grande descente d'humeurs à la partie, que pour preuoir que le venin qui se retire au dedans par le dormir, ne se saisisse des parties principales.

Toutes perturbations d'esprit sont fort contraires, & sur toutes le courroux, d'autant qu'il rend les humeurs plus fluides & subtiles, d'où s'ensuit vne plus grande quantité de defluxions, & d'inflammations, & tels autres accidens à la partie blessée.

I'ay obmis l'inanition & repletion, d'autant que i'en veux toucher à part & dire mon opinion au chap. qui s'ensuit.

De la seconde intention, à sçauoir de l'euacuation des humeurs faites par la phlebotomie, & par la purgation.

CHAP. IIII.

CE n'est pas sans cause que Galie allegue en sa Methode ceste senten-

ce prise d'Hippocr. à sçauoir que le Medecin doit estre imitateur non seulement de nature, mais aussi des choses qui sont vtils, quād elles viennent de leur propre & naturel mouuement : d'autāt que c'est de son deuoir de suppléer au defaut d'icelle, & de preuoir aux accidens qui luy peuuent suruenir les plus nuisibles: & ce par les indications prises de la grandeur de la maladie, qui sont deux, la phlebotomie, & la purgation, lesquelles principalement sont requises & necessaires aux playes des arquebusades, que nous pouuons nommer entre les grandes maladies par toutes les trois manieres. Il est dōcques tres-necessaire de tirer du sang en ces playes, cōme en toutes autres, mesmement dès le commencement, afin d'empescher la descente des humeurs à la partie affligée, & pour la garder qu'elle ne soit molestée de quelque phlegmon: & ne faut attendre la concoxion du malade, & que le cōmencemēt & estat d'iceluy soit passé, suiuant la sentēce d'Auicenne, qui repugne en toute façon à la raison & à la doctrine d'Hippocr. disant que si on veu

esmouuoir quelque chose que ce soit au cōmencement. Or ceste mission du sang doit estre faite par les parties contraires, lors principalement qu'il n'y aura aucun soupçon du venin compliqué avec lescdites playes : car alors les euacuations reuulsives sont defenduës, d'autant qu'il le faut attirer par les scarifications de la partie mesme, ou des parties inferieures & esloignées, & garder qu'il ne gaigne, comme c'est sa nature, les parties nobles & principales, comme nous le dirons, traittant de la cure particuliere de ces playes. L'heure de la mission du sang sera le matin, si on n'est pressé par quelque flux de sãg, ou autre accident: deuant laquelle heure il sera mesme expedient de faire prendre quelque clystere commun, pour euacuer les excrements des intestins. Cependant il faut obseruer en ceste mission du sang, non seulement la grandeur de la playe, mais aussi la plénitude de tout le corps, selon laquelle on fera moindre ou plus liberale mission d'iceluy. L'aage sera aussi obserué, comme la saison, le lieu de l'habitation,

& autres choses considerables, que ie laisse à la prudence du Medecin expert, qui pourra voir ce que Galien en escriit particulièrement en son liure de la mission du sang.

Galien au quatrième liure de sa Methode enseigne fort bien que la purgation en ces playes se doit faire, aussi bien que la mission du sang: & ce pour deux raisons, c'est à sçauoir pour la grandeur du mal & l'abondance des humeurs vitées & corrompues, disant ainsi: La purgation se fait bien à propos, non seulement en la cacochymie, mais aussi (comme la mission du sang) ou pour sa trop grande abondance, ou bien pour la grandeur de la maladie: ainsi la purgation s'ordonne tant pour l'abondance de quelque autre suc, comme aussi pour la violence & grandeur de la maladie. Ceux là donc sont inexcusables, qui méprisent ce remede, cōme s'il ne seruoit de rien, ou au moins de bien peu à la guerison de ces playes: veu que la raison & l'experience demonstret le contraire à ceux, lesquels (ensuiuant Hippo. & Galien comme leurs Capitaines) ont

*De la
purga-
tion ne-
cessaire
en ces
playes.*

traitté avec methode la cure d'icelles.

*Au lin.
des vl-
ceres.*

Car la purgation par le bas (comme dit Hippocras) est tres-vtile à beaucoup d'vicerés, & d'auantage aux playes de la teste, & à celles du ventre tant inferieur que superieur; & à celles des ioinctures. Qui plus est, il adiousté que la purgation est necessaire aux playes qui ont besoin de cousture, & à celles qui sont phagedeniques, & qui sont de longue guerison, & à toutes celles qu'il faut lier. Lequel remede doit estre donné au cōmencement & subit apres la mission du sang: en partie pour attirer les humeurs qui decoulent à la partie blessée vers l'opposite, ce que les Grecs appellent reuulsion (comme si la playe est faite aux parties superieures, on purge par les inferieures, que si elle est aux inferieures, on le fait par le vomissemēt & par les parties superieures) en partie pour euacuer la defluxion desia enracinée & adherante en quelque mēbre par les parties plus voisines, ainsi qu'Hippo: & Galien l'enseignēt. Que si quelqu'un met en avant, suiuant l'opinion des anciens Medecins, que la purgation n'est

*Voyez
Oribas.
en son
liure 7.
chap. 22*

n'est vtile aux corps sains, & ausquels les excremens n'abondent, comme on peut presumer que ceux-là des soldats le sont le plus souuent (car autrement ils ne pourroient supporter tant de maux) & ce pour les estonnemens de teste qui s'en ensuiuent, les tournoyemens qui les tourmentent, & qu'ils se vuident trop à coup & avec violence, en purgeant ce qui profite à nature, d'autant que le médicament cherchant à mettre dehors l'humeur requise, & ne la trouuât, il liquefie la chair & le sang, & attire ce qui en est sain & entier. Toutesfois d'autant que si la purgation estoit omise, il seroit à craindre qu'ils ne tombassent en maladies & plus grâds symptomes, c'est à sçauoir en fièvres, inflammations, grandes douleurs, resteries & autres tels accidens, lesquels accompagnent le plus souuent ces playes, la purgation des humeurs des-jà esmeuës sera necessaire, à fin mesme de preuoir aux accidens qui pourroyent aduenir: & aussi afin de remettre par ce moyen en bon estat, non seulement la partie offensée, mais aussi tout le corps.

Puis doncques que la punition est tres vtile en ces grandes playes, il la faudra faire avec vne bonne consideration & vn meur aduis : car il est expedient qu'on aye esgard à l'estat & constitutiō du blessé, à la coustume de faire, à son aage, au temps, & au lieu. Et pareillement il faudra considerer à d'aucuns, & auoir esgard semblablement tant à l'humeur abondante en eux, comme aussi à la partie offensée : lesquelles choses nous bailleront certaine indication de l'humeur qu'il faudra purger, par quel moyen, & par quelle partie. Et lors sur tout qu'on choisisse les purgatifs, qui puissent estre offerts sans aucun dāger : n'estant d'aduis qu'ō se serue de ces violents, qui estoient en vsage du temps de Hippocras & Galien, d'autant qu'ils sont d'une faculté fort chaude : & par consequent engendrent des fièvres, esmeuent le sang, & preparent la playe à receuoir quelque inflammation & tumeur. Entre lesquels l'Ellebore, la Colocynthe, & autres semblables, n'estans pas mesme preparez, sont compris : mais on pourra se seruir bien à propos de la

Casse, de la Manne, de la Rhabarbe, du Sené, du Polypode, de l'Agaric, & principalement de leurs effences : lesquels medicamens non violens peuvent estre donnez avec plus de seureté aux playes fraisches, comme les autres sont plus vtils pour les vlceres vieux & malins, Au reste, d'autant que les purgatifs ne font telle operation qu'il seroit requis, selon la diuerse complexion d'un chacun (car il y en a d aucuns qui se purgent avec difficulté, d'autres lesquels ayans pris un petit breuage voident en abondance, & les autres l'ayans seulement senty) il faudra se donner garde de ne presenter aucune medecine aux malades, que premierement on n'ait bien cognu leur naturel. Que si l'euacuatiō est retardée par la matiere fecale espessie & retenue dans les intestins, il faudra premierement esmouuoir le ventre par quelque medicament lenitif, qui sera prins par la bouche, comme par un bol fait d'une once de casse avec un peu de sucre, & de la semence d'anis, ou bien par un clystere, duquel s'esuit la description.

Prenez feuilles de mauues, de violet-

tes, mercuriales, betes, de chacune vne poignée : des grandes semences froides, & anis, de chacun vne once: orge, fleurs de camomille, bourrache, & lis d'estag, de chacun vn pugile : faites de tout vne decoction de la quantité d'vne liure, dedans laquelle dissoudrez de casse extraite avec fueilles de Sené, du Diaprunis simple, ou Tryphere Persique, de chacun six drach. miel & huile violat, de chacun deux onces. Meslez le tout & en faites vn clystere.

Le four ensuiuant il faudra faire prendre quelque medicament au malade, lequel sera composé, selon qu'il sera travaillé de l'abondance, ou de la pituite, ou de la cholere, ou de quelque autre humeur. Car la purgation se fait plus tost, & est plus profitable, quand par icelle l'humeur tourmentant le malade est euacuée.

*Portion
pour les
phleg-
matiq.*

Pr. racines d'iris, d'agrimoine, de pimpinelle, d'acore, de cha. trois drach. racine de mechoacam, polypode recēt de chesne, de la mouëlle de la semence du saffran bastard, de chacun demie once : anis, passerilles, regalisse, de cha-

un deux drach. de la veronique, betoine, scabieuse, de chac. vne poignée: des fleurs cordiales, de chac. vn pugile: des feuilles de Sené, deux drach. Dedans la decoction, faite comme il appartient, & coulée, mettez infuser deux drach. d'agaric trochisé: puis dissoudrez en l'expression vne once de syrop rosat solutif: Et pour les robustes y pourrez adiouster vne drach. & demie, ou deux de Diaphœnicon.

Pr. racine & feuilles de cichorée, de l'endiue, oseille, laitues, pourpier, veronique, de chacune vne poignée: passerilles, deux drach. iuiubes, prunes douces, quatre de chacun: semences de melons, cuseute, citrons, pourpier & anis, de chac. vne drach, & demie: fleurs cordiales, de chac. vn pugile: de santal citrin, vne drach. En la decoction faite & coulée pour vne dose, ferez infuser trois drachmes de rhabarbe choisie, deux drachmes de myrabolans citrins, & vn scrupule de canelle. Dedans l'expression vous dissoudrez du syrop de cichorée avec rhabarbe, & du rosat solutif, de chacun vn once. Meslez le tout

*Portion
pour les
choléri-
ques.*

& en faites vne potion à laquelle vous adiousterez pour les robustes deux drach. de l'elect. Rosat de Mesué ou de l'elect. de citr. solutif.

*Portion
pour les
melan-
choliq.*

non

si

de

de

Pr. racin. d'eupa. de Mesué ou gratiole & tormétille, de chacune demie once : polypode, cabaret, tamarindes de chac. trois drach. de la semence d'anis, & passerilles mondées de leurs grains, de chacun deux drachmes : de la veronique, scabieuse, borrache, buglosse, fumeterre, ceterac, polytric, de ch. vn pugille : de canelle demie drachme, d'epithyme, fleurs de violette & de genest, de chac. vn pugille. Faites de tout vne decoction, en laquelle mettez infuser demie once de fucille de Sené. Puis dans l'expression dissoudrez du syrop de pesches, & de fumeterre composé, de chacun demie once, & en ferez vne potion. Et pour ceux qui serôt de forte complexion, adioustez y de la confection Hamech, ou du diapolypode deux drachmes.

Mais quand non seulement vne humeur, mais toutes ensemblement sont en abondance & entremeslées & espari-

dues par tout le corps (ce qui aduient le plus souuent) il faudra se seruir du suivant médicament purgatif, principalement s'il y a quelque crainte du venin.

Pr. racines de tormentille, angelique & gentiane, de chacune trois drachmes: d'acorus & pimpinelle de chacun deux drachmes: polypode de chesne, de la mouëlle de la semence du saffran bastard, de chacun demie once: de l'endiuë à large fueilles, cichorée, veronique, agrimoine, ceterac, houblon, fumeterre, de chac. demie poignée: regalisse, passerilles, de chac. vne drachme & demie: des prunes de damas, quatre en nombre: semences d'endiuë, oseille, citrons & pourpier, de chacun vne drachme: semence d'anis, vne drachme & demie: des fleurs cordiales, de genest & tamaris, de chac. vn pugille: fueilles de fené trois drach. Faites vne decoction, de laquelle prenez quantité suffisante pour vne dose, en laquelle mettrez infuser deux drach. de rhabarbe, d'agoric trochisque quatre scrupul. En l'expression dissoudrez vne once de syrop rosat solutif. Vous pourrez reiterer la-

Potion

conue-

nable

pour

purger

toutes

les mal-

uaises

hu-

meurs.

dite potion (comme les autres aussi) s'il en est besoin.

On pourra preparer beaucoup d'autres medicaments purgatifs par la prudence & bon aduis d'un expert Medecin, & les reiterer, la maladie estant en sa force, pourueu que le malade les puisse porter, & qu'il semble qu'on les puisse donner à propos. Or d'autant qu'entre les plus delicats, & ceux qui sont riches, il y en a qui ont en horreur ces medicaments, on se seruira des extractions & preparations spagyriques des simples purgatifs, cōme de la Rhabarbe, de l'Agaric, du Sené, & semblables, & mesme de l'Ellebore bien preparé, desquels vne bien petite dose, ou quelques gouttes, feront autant d'operations sans aucune perturbatiō, qu'une grande quantité de potion qu'on ordonne communément, & que les pures malades prennent à grand cōtre-cœur: lesquelles extractions pourront estre données, ou chacune à part, ou bien meslées, suiuant l'exigēce des humeurs qui abōderōt. Desquels simples j'ay enseigné suffisamment la preparation en

Les essences des purgatifs propres pour les plus aisés & delicats & qui esmeuvent le ventre sans aucune perturbation, mesme celle de l'Ellebore.

DES ARQVEBVSDES. 73
mon liure de la preparation spagyrique
des medicaments vegetaux au chapitre
des purgatifs.

*De la troisieme & generale intention cura-
tiue qui se fait par la Chirurgie. Et en
premier lieu du premier appareil.*

C H A P. V

IA y montré dès le commencement
qu'il se faut proposer deux indica-
tions curatiues en la guerison des playes
faites par les bastons à feu (si on consi-
dere en icelles la seule contusion, &
non pas la qualité veneneuse, ou la
bruflure conioincte) c'est à sçauoir la
suppuration & la generation d'une
nouuelle chair. Or afin que cela se face
comme il faut & d'un bon ordre, &
qu'on puisse atteindre le but proposé,
il faut remarquer certaines indica-
tions qu'on nomme subalternes. Des-
quelles la premiere veut que la bale
soit prise & amenée dehors, & toutes
les petites pieces des corselets, les petis
morceaux des vestemens, les osselets

du tout brisez & séparez, les grumeaux de sang, & telles choses semblables, qui aduient exterieurement, soient arrachées & tirées hors sans douleur, s'il se peut faire: que si quelqu'une de ces choses est bien avant dans la partie blessée, qu'elle soit tirée hors avec les doigts, ou avec un tire-bale, ou bien avec les becs de grue, ou corbeau, & semblables, desquels ferrements on pourra voir une diuersité de façons dans le liure de Maistre Ambroise Paré excellent Chirurgien. Or la bale se tire, ou du lieu par lequel elle est entrée, après auoir fixé & avancé le corps du blessé (comme Hippocrate commande) en la mesme façon qu'il estoit lors qu'il receut le coup: ou bien s'il ne se peut soutenir, estant dans une chaire, ou dans le lit, qu'il imite luy mesme au plus pres qu'il pourra, comme il estoit constitué lors qu'il fut blessé. Quelquefois aussi la bale est tirée par la partie en laquelle la force du canon l'aura poussée, pour autant qu'elle s'y est preparée le chemin & la sortie, laquelle il faudra agrandir, s'il est besoin, avec une lancette, ou

raisoir, afin que plus facilement la bale soit tirée hors, & qu'une moindre inflammation s'en ensuiue, principalement si on la trouue avec la sonde, & qu'elle soit enracinée dans la chair, sans auoir trauersé près des grandes veines & des lieux nerveux. Car alors il luy faudra faire vne autre sortie par quelque incision, qui se fera plus aisément, s'il reste quelque peu de chair entière de l'autre costé, & si par l'atouchement des doigts on sent la bale, & que rien n'empêche de la faire. Or sur tout, le Chirurgien doit estre soigneux tousiours (ainsi que Celsus l'escrit, traitant de la maniere de tirer les flesches) de n'offenser aucun nerf, ny quelque grande veine, ou artère en faisant quelque incision. Que s'il y a quelque dāger qui se presente, ou que la bale soit tellement cachée qu'on ne la puisse trouuer, il sera plus expedient de la laisser là, iusques à ce que nature la mette hors volontairement, que vouloir s'opiniastrer à l'extraction d'icelle. Car qu'est-il besoin d'adiouster à vne grande playe encore vne plus grande, & tourmenter ou pluf-

*Liure 7
chap. 5.*

toft bourreler le malade en vain de telle forte? Veu meſme que la bale a eſté tellement & ſans danger cachée aux corps de pluſieurs, que la playe ayant eſté cicatриſée, elle eſt ſortie volontairement par quelque apoſtème qui ſuruenoit long-temps apres. Au reſte, ceſte premiere intention ſ'accompliſt auſſi avec des medicaments attirans dehors les choſes exterieures (deſquels l'vſage n'eſt à deſpriſer) principalement ſ'il y a quelque ſouſpeçon que la bale ayt eſté enuenimée : car alors il faut tirer les choſes exterieures promptement. Voila pourquoy les attractifs plus violens ſont lors plus neceſſaires, deſquels on doit vſer ſur le champ, afin de preuoir que le venin ne penetre au dedans, & qu'il ne ſe faiſiſſe des parties principales : comme au contraire lors qu'il n'y a aucun ſouſpeçon de venin, les attractifs plus gracieux & benins ſont tant plus requis que les autres. De quoy nous traiterons plus amplement au chap. des playes ioinctes avec venenoſité. Or apres auoir mis fin à ceſte premiere intention, c'eſt à ſçauoir apres auoir tiré

toutes les choses interuenues & dom-
mageables hors de la playe le mieux
qu'on aura peu, il nous conuient main-
tenant traiter des medicaments topi-
ques, & du premier appareil. Car il est
tout notoire que l'opiniõ tant des Me-
decins, que le commun vsage & prati-
que des Chirurgiens qui suiuent le cãp,
est diuerse touchant cet effect. D'au-
tant qu'aucuns d'eux appliquent à tou-
tes playes indifferemmẽt le cautere, ou
quelque medicamẽt caustique ou scha-
rotique, & ce dẽs le commencement &
pour le premier & plus prompt reme-
de. Les autres les huiles d'oliue & de
fureau bien chauds. Les autres prissent
pour cet effect la theriaque, les autres la
terbentine, les autres l'huile faite de pe-
tis chiens vn peu tiede. Mais le plus sou-
uẽt la plus part d'eux se sert de charpis,
& estoupades trẽpẽes dans de l'oxycrat,
& chargẽes du medicament qu'ils font
auec vn blãc d'œuf, & la poudre astrin-
gente, desquelles choses ils remplissent
la playe & en enuolopẽt les enuirs d'i-
celle: & sõt encore de cet aduis qu'il ne
faut bouger cet appareil de 24. heures,

craignant, comme ils disent, quelque haimorrhagie, ou flux de sang. Mais les doctes, & ceux qui sont plus experts, pourront iuger sainemēt, combien ceste coustume ordinaire est dangereuse & pernicieuse. Car tels medicaments sont emplastiques d'une substance crasse & terrestre, & d'une faculté astringente: & pource ils se sechent soudainemēt, & causent par ce moyen de grandes douleurs, d'autāt qu'ils compriment & reserrent par trop la partie offensée: d'où aussi s'en ensuiuent de plus grandes defluxions, inflammations & autres symptomes, pour autant qu'ils ferment les pores & ouvertures de la peau, retiennent les humeurs qu'elles ne s'exhalēt, & les rendēt plus crasses. Car tout ainsi que le suif, la resine, la poix, la cire, le beurre, & toute matiere fluide s'endurcit par le froid, & ne se rend tant traitable par ce moyen à celuy qui la manie avec les doigts: ainsi par l'application de ces medicaments froids, les humeurs sans doute s'espeussissent & s'exhalent, ou resoluent avec difficulté: & la peau estant ainsi reserrée, les esprits

sont suffoquez par la maligne exhalation des humeurs qui y est retenuë, d'où survient à plusieurs que la partie se gangrene, & qu'elle se mortifie totalement. Que si la faute d'autres remedes & que aussi la necessité vrgente contraigne les Chirurgiens d'vser de ces communs remedes pour estancher l'haimorrhagie, & grande defluxion de sang) combien que cela aduienne peu souuent en ces playes) neantmoins il faudra qu'ils en vsent prudemment: & s'ils ont le loisir, qu'ils les rechangēt trois & quatre fois, ou pour le moins que leur appareil appliqué soit trépé bien souuent de quelque oxyrhodin tiede; pour preuenir les susdits inconueniens. Au reste, il m'a semblé bon de ne passer sous silence, comme plusieurs se seruēt aujourd huy non seulement pour le premier appareil, mais pour la guerison totale de ces playes, de la simple eau de fontaine tiede, à laquelle les autres y adioustent de l'huyle & du vinaigre, & lauent avec icelle les playes, & en trépent leur charpis & estoupes, avec vn si heureux succes, que plusieurs esmerueilliez de cela

estimēt qu'il se face par quelques charmes, ou bien attribuent le tout à la vertu des paroles. Mais ceste pratique neantmoins peut estre approuuée par la vraye experience, fondée & conioincte principalement avec la raison: d'autāt mesme que si l'autorité peut auoir quelque lieu, Celsus au liu. v. chap. 26. escrit que les playes simples sont fort soulagées par le moyen de l'eau froide, & assure qu'elle y sert de beaucoup estāt appliquée en quelque façon que ce soit: & mesme en autre lieu il approuue l'eau tiede: car elle appaise les douleurs, empesche les inflāmations, & arreste les defluxions: lesquels symptomes, ainsi que chacun sçait, doiuent estre empeschez dès le commencement. D'auantage puis que selon Hippocr. les playes cōtuses doiuent estre hastiement suppurées, il est tout cuidēt que la fomentation de l'eau tiede fait ces effects; tant par les escrits des anciens Medecins, comme aussi par l'experience. Puis dōcques que ces choses resistent aux premiers & grands assauts qui suruiennēt à ces playes, il ne faut trouuer estrange si
 puis

*Au 8.
chap. x.*

puis apres nature faisant son deuoir (cōme celle qui a en soy & la cause efficiente, & le baume naturel, par lequel & les os rompus sont recolez, & la separation de l'vnité reioincte) remplit les playes de chair, & les amene en fin à cicatrice, pourueu que l'art preste la main à nature, à sçauoir que le Medecin luy aide, se donnant garde que la playe ne soit offensée par les causes exterieures, & que la faculté curatrice du baume naturel ne soit empeschée, mais puisse faire son deuoir, & ce en nettoyant la playe de toutes ordures qui luy font empeschement, par linimens & autres moyens conuenables. Au reste, ie prise l'opinion de ceux qui estiment qu'il faut adiouster à l'eau simple du vinaigre & de l'huyle: duquel remede i'ay entendu que le Seigneur de Vins, duquel i'ay parlé cy dessus, a esté guery par quelques Gentils-hōmes Italiens, avec plusieurs autres, lors qu'il fut blessé deuant la Rochelle. Car ce medicament ainsi meslé empesche les symptomes, comme la douleur, la defluxion, l'inflammation, & resiste à la putrefaction, à

laquelle il faut sur tout auoir esgard: & ce en toute diligence, veu que ce genre de playes y est fort suiet, de peur que vne gangrene ou sphacele s'en ensuiue. Or il est tout clair que le vinaigre d'une part resiste à la corruption par cecy, que si on confit quelque chose dans luy, il la contregarde qu'une mousse ou crasse ne la couure. Ainsi en est-il de l'huile, lequel versé sur le vin, ou autre liqueur garde qu'il ne s'esuete & se tourne, car il empesche que l'air n'y entre, & repousse au loin les exhalatiōs qui pourroyent engendrer quelque putrefactiō: & d'autant plus i'estime son vsage, que ou bien appliqué en vnction, ou prins par le dedans, il amortit la force du venin, lequel peut estre meslé quelquefois avec ces playes, ainsi que desia ie l'ay enseigné. Ce qui me fait approuuer l'opinion de ceux qui mettent incontinct des huiles bouillants dans la playe, car cela ce fait bien à propos: en partie d'autant qu'ils font que la playe se relaschant par le moyen de l'huile, les mauuaises humeurs & vapeurs malignes se dissipent & resoluent plus facilement:

en partie aussi pour autant qu'ils empêchent en ce faisant que la concavité de la playe ne soit offensée par la subtilité de l'air : auquel entre autres choses, il faudra prendre garde, afin que la playe ne soit exposée long-téps à iceluy, mais au plustost qu'il sera possible, qu'elle soit reserrée. Car ceux-là expérimentent assez que l'air engendre putrefaction, lesquels en fermēt en vn vaisseau de terre toutes sortes de fruiets, & apres l'auoir fermé de son couuercle & bien lutté, afin que l'air n'y puisse aucunement entrer, le descendent au profond d'un puits : & ainsi ces fruiets ne se corrompent ny flapissent nullement, d'autant qu'ils ne sentent l'air en aucune façon : & par ainsi demeurent frais & sains, comme s'ils auoyent esté tout freschement cueillis. Or i'ay bien voulu escrire en passant les susdites choses, à fin que chacun sçache que plusieurs sont gueris non point par enchanteimens, comme la populace estime, mais par remedes, desquels, si aucuns ignorent la raison, toutefois ils sōt fondez sur icelle, cōme nous l'auons demōstré : & non

point pour defendre les Empiriques, & ceux-là qui ne font point consciēce de mettre en hazard la vie & les corps des hommes, & comme dit le Prouerbe, de essayer l'art de la poterie au danger du vaisseau: veu mesme que c'est mō auis, qn'ils soyēt deschassēz & fuis d'vn chacun, puis que par leur faute & presumption, l'art de la Medecine, qui doit estre exaltée iusqu'au bout, est aujourd'huy, & ceux là qui en font profession, haye & mesprisée. Mais afin que ie ne me desuoie par trop de mon premier chemin & propos cōmencé, il me semble qu'il sera tres bon que soudain on mette dans ces playes de bastons à feu, des huiles de guy de pommier, de celuy de boüillon blanc, ou de mille pertuis ou celuy des œufs, qui soyent appliquez chaudement, desquels tu pourras voir la description en mon Antidotaire mis sur la fin du present traitté: & lesquels les Chirurgiens doiuent auoir preparez tousiours: car ils addoucissent biē fort, & amollissent & appaisent les douleurs, & sont fort propres à guerir ces playes: en defaut de ceux-cy, il faudra se seruir

des huiles de sureau (lequel est approu-
ué par Ioubert) de lin, des vers de terre,
de lis, de camomille, & de terebenthine.
Que si on n'en peut recouurer pas
vn de tous ceux-cy, il se faut contenter
du beurre fondu, & de la terebenthine
simple: & cependant faudra oindre les
charpis du medicament qui s'ensuit.

Vnguent magistral.

Pr. suif de bouc & colophoine, de
chacun trois onces, mouëlle de pieds
de bœuf, & œsype, de chacun deux on-
ces & demie: beurre frais, deux onces:
sucs d'esclaire & de centaurée, de cha-
cun vne once: huiles de guy de pōmier,
& de cire, autant qu'il conuiendra pour
former vn vnguent: duquel tu prendras
trois onces: du precipité dulcifié & pre-
paré à nostre maniere, du crocus vene-
ris bien fait, de chac. trois drach. messe
le tout & en oingt les tentes & setons, si
leur application est requise.

Les poudres doiuent estre parées,
lesquelles les riches pourront porter
dans leurs coffres, & en defaut de l'vn-
guent precedent, on pourra les mesler
avec du beurre simple: & dudit vnguent

magistral tout seul on fera vn emplastre assez grãde pour enuironer & couvrir les parties prochaines de la playe. Les drapeaux, coïsinets & bandes doiuent estre imbuës du simple oxyrhodin tiede, fait de vinaigre rosat, huile rosat, & huile de guy de pommier. Il faudra aussi appliquer sur les parties plus lointaines le defensif qui s'ensuit.

Medicament defensif Pr. de bol Armenien preparé, sang de dragon, & coraux rouges, de chacun demie once : du crocus Martis, deux drachmes: grains de myrthe, vne drachme & demie : huile rosat omphacine, quatre onces : vinaigre rosat, deux onces : cire, vne once & demie. Melle le tout, & en fais liniment.

Cependant on obseruera soigneusement en liant ces playes, que les bandes ne soyent trop lasches, de peur que ce qu'elles contiennent n'eschappe : & ne faudra aussi les serrer si fort qu'elles en causent douleur, & par consequent esmeuent quelque defluxion, & parfois vn phlegmon, d'où en fin puisse suruenir quelque gangrene, cōme Celsus escrit pouuoir aduenir par ce moyen en

son liure 5. chap. 26. Il faudra donc estre tellement soigneux, qu'euitât ces deux incommoditez, on puisse receuoir les deux commoditez qu'elles apportent. Cependant qu'on trempe souuentefois les bandes susdites de l'oxyrhodin mentionné cy dessus & qu'on renouelle l'appareil dès le commencement, de douze en douze heures, si ce n'est qu'on craigne quelque flux de sang, à cause de la rupture de quelque grande artere, ou veine. Que si l'haimorrhagie est desfreiglée, il y faut pouruoir vistemment, & deuant toutes choses : ce qui se fera aisément par les medicaments suiuians, tât appliquez sur la partie, que pris par le dedans. Cependant ie ne suis d'aduuis qu'on l'arreste, que premierement vne bonne quantité de sang ne soit escoulée de la playe, pour euitier l'inflammation.

Vnguent arrestant le sang.

Pr. du crocus Martis bien reuerberé, du crocus Veneris, de chacun deux onces : huile de guy de Pommier simple, tant qu'il en faudra : soit formé en vnguent.

Ce medicament arreste le flux de sang, si bien qu'il est presque incroyable: & prepare aussi la playe à vn meilleur estat: car il digere toutes les humeurs superflües, conforte la partie & resiste fort à la putrefaction.

Autre Unguent pour le mesme.

Pr. du crocus Martis, vne once: de la chaux de coquilles d'œufs, & du colchotar, de chacun demie once: de la cendre de grenouilles brülées deux drachmes: melle le tout avec huile de guy de pommier.

Vn autre aisé à faire, & non moins profitable.

Pr. du colehotar préparé avec du vinaigre, deux onces: de la chaux des coquilles de limaçons, demie once: du beurre frais, quatre onces: soit fait vn-
guent, ou au lieu de beurre les mellerez avec vn blanc d'œuf.

Il sera aussi fort vtile d'vser de potions aux grandes haimorrhagies, desquelles les descriptions sont telles.

Portion pour ceux qui ont plus de moyens.

Pr. de l'huile de crocus Martis & de l'essêce de couraux, de chacun vn scrup-

pule : de l'eau de semence de grenouilles, ou d'eau de roses, autant qu'il en faudra pour vne potion.

*Vne autre pour les simples soldats,
mais approuuée.*

Pr. du crocus Martis préparé à nostre façon, vn scrupul. de la chaux de coquilles d'œufs, demie drach. syrop de roses seches & de myrthille, de chacun vne once : & avec de l'eau de fleurs de pautot rouge, faits vn breuuage, que le malade prendra trois heures deuant que manger : & luy faudra donner vn orage mondé, auquel il y aura de l'eau rose, & de la semence de pautot, sur tous vers le soir.

Au reste, il n'y a medicament plus excellent pour arrester le sang coulant de tous costez, & pour appaiser toutes douleurs, & reprimer les defluxiōs, que nostre Laudanum, si on en préd vne pilule de la grosseur d'un grain de poiure : l'vsage duquel ne peut estre assez estimé pour ces playes, outre vne infinité d'autres cōmoditez lesquelles ie tairay pour cette heure, d'autāt que i'e ay parlé suffisamment en ma responce au trait-

*proprie-
tez du
Lauda-
num.*

ré qu'a fait Auber Vandomois, touchât l'origine & matiere des metaux. Or apres que toutes ces choses auront esté premierement bien executées, il faudra alors venir à la suppuration, & puis apres à la mondification & exsiccation, afin que la chair viue puisse naistre, qui ne soit plus molle qu'il ne faut, ny plus dure aussi, & qui ne croisse outre mesure: & finalement oster de bonne heure toutes les petites pieces des os brisez, s'il y en a quelques vnes, d'avec celuy qui est entier. Et premierement quand à la suppuration, elle doit estre hastée en ces playes, de peur que le venin enclos dans icelles, & la sanie cachée ne soyent cause d'un plus grand danger: d'autant aussi que par ce moyen les fièvres, les douleurs, & tous symptomes s'appaisent plus facilement selon l'opinion de Hippocras. Or pour cet effect la plus part des Chirurgiens se seruent de digestifs, qu'ils appellent, au second appareil, faits de iaunes d'œufs, d'huile rosat, & de terebenthine: lesquels pour parler à la verité, ie ne puis approuuer, d'autant qu'ils pourrissent incontinent, &

rendēt la playe puāte, ce qui est vn tres-mauuais signe. Les autres vsent d'eau & de miel meslez, & vn peu chauds, de beurre, & de semblables suppurations, avec lesquelles choses ils fōt bouillir de la farine de froment passēe, en y adioustant bien peu de saffrā. Les autres approuuent le tetrapharmaque faict de poix, de resine, de cire, & de graisse, auquel Corn. Celsus donne le premier lieu pour faire suppurer: & desquelles choses aussi le Macedonic se compose en y adioustant de l'encens, duquel plusieurs vsent avec vn heureux succez. Les autres prisent merueilleusement le Basilicon, pour autant qu'il est fort bon suppuratif, & qu'on en trouue tousiours aux boutiques des Apoticaire. Les autres louēt l'vnguent Dialth: & celuy qu'ils nomment Resomptif, d'aucuns, l'emplastre Diachilon simple, & des mucilages, ausquels ils adioustent de l'huile de lis. Et par le moyen de tous ces medicaments ils conuertissent bien tost la chair dilacerēe, froissēe, & meurtrie par la bale, en pourriture, suiuan Hippocr. en cela. Car il escrit qu'il faut necessairement que la chair meurtrie

soit changée en bouë , à fin que par ce moyen la playe soit tant moins molestée de phlegmon: & telle est l'opinion non seulement dudit Hippocr. mais aussi de tous les anciens Medecins. Desquels suppuratifs ie ne peux qu'approuver entierement l'vsage: car puis qu'ils entretiennent la force & substance de la chaleur naturelle, & qu'ils changent les humeurs corrompûs en vne meilleure qualité, & conuertissent bien tost le sang corrompu en pourriture, ils ne peuuent pour ces raisons que remettre la playe en meilleur estat. Mais toutes-fois il faut soigneusement regarder, que l'on ne vienne à vser mal à propos desdits suppuratifs, ainsi que desia ie l'ay touché au commencement de ce liure, afin que par leur moyen la playe n'acquiere, quelque corruption, à laquelle par l'vsage desdits medicaments elle est plus sujette. Voila pourquoy à fin que cela n'aduienne, il sera bon d'adiouster à chacune once du medicament suppuratif, vne drachme de nostre précipité (lequel poids mesme il faudra augmenter, si la playe rend quelque gran-

de puanteur) afin que le medicament puisse agir avec plus grande efficace, & sans aucun danger. Car par ce seul moyen la suppuration n'est retardée, ains deuient de bonne sorte incontinēt, & la partie blessée est preseruée de putrefaction, & de gangrene, à laquelle principalement elle est lors fort sujette, ainsi que ie l'ay veu par experience. Et m'a semblé que ce ne seroit hors de propos, si en faueur des moins experts, ie baille icy quelque description des remedes, desquels i'vse pour cette intention. Les tentes doncques, & les setons, & tout ce qui sera mis dans la playe, soyent engraissez de l'vnguent qui s'ensuit.

Vnguent bien aisé à faire.

Pr. de l'vnguent Basilicum surnommé grand, selon la description de Mesué, deux onces: du beurre frais, vne once: du precipité préparé à nostre façon, deux drachmes & demie: soit fait vnguent.

Autre Vnguent.

Pr. cire neuue, resine, poix nauale, de chacun quatre onces: suif de bouc, &

mouëlle des iambes de veau, de chacun deux onces: æsype, vne once: huile d'oliue, ou de lin, ou de guy de pommier, vne liure. Soit formé en vnguent.

Addition.

Prenez d'iceluy, deux onces: de nostre precipité, deux diachmes: meslez le tout. C'est vn excellent remede, duquel mesme on doit charger les emplastres, sans adiouster du precipité, lesquels on mettra sur les bords de la playe: ou,

Pr. terebenth. de Venise, & miel de cha. demie liure: 12. iaunes d'œufs: Le tout estât bien meslé ensemble, faites le cuire au feu, tant qu'il deuienne en façon de bouillie. Vous pourrez assurément vser de cet vnguent (lequel les Paracelsistes appellent *Calcmatum magnum*) au lieu de digestif: car estant préparé en cette sorte, il resiste grandement à la putrefaction, & si est fort propre pour suppurer ces playes. Or d'autant que c'est le propre de nature, & de la chaleur naturelle, & non point des medicaments de faire la suppuration, il faudra donner vne chaleur, quoy que s'en

soit, approchante du tout de la naturelle, laquelle il faudra entretenir avec du coton, & laine surge, & linges enuelopans la partie blessée, ou bié avec quelque cataplasme: par lesquelles choses les playes, selon Gelsus, sont fort soulagées. Il sera bon aussi de tremper les *Liu. 5.*
bandes & compresses dans le médicament fait d'huile rosat & eau rose, auquel on pourra adiouster bien peu de *cha. 26.*
vinaigre. Car il faut vser d'iceluy en petite quantité, d'autant qu'il retarde la suppuration. La suiuite fomentation est fort excellente, de laquelle ie me sers tousiours.

*Fomentation emolliente & appaisante
les douleurs.*

Pr. des fueilles de guy de pommier avec leurs fruiets detaillez bien menu, trois poignées: des racines & fueilles de guimaues, des mauues, violettes, de cha. deux poignées: semences de lin, & fenegré, de chac. deux onces: fleurs de camomille, & melilot, de cha. deux pugill. Faites les cuire dans du laiët, & en vsez.

Jamais ie n'ay esté abusé en ce medi-

cament: car il oste les inflammations, appaise bien fort les douleurs, & en contregardant la substance de la partie, il rend la playe en fort bon estat, ce qu'on cognoist par la pourriture louable qui y suruient, quand on en vse. Or du marc de ladite fomentation on peut faire vn cataplasme, en y adioustant de la farine de lin & de senegré, de chacune deux onces: œsype & mouëlle de pieds de veau, de chacun vne once & demie: trois iaunes d'œufs: six grains de safran: huiles rosat, & de guy de pommier autant qu'il en faudra. Qu'on en applique sur la playe, en telle sorte que les parties prochaines en soyent enuëloppées: & quant à celles qui sont plus esloignées, à fin d'arrester la defluxion des humeurs, il les faudra oindre de l'vnguent fait de bol, ou bien du suuant.

Cataplasme.

Defensif fort bon.

Pr. de la poudre de roses rouges, & de myrthilles, de chac. vne drachme: bol armenien, terre sigillée de chac. six drach. sucs de plantain & de morelle, de chac. vne once: vinaigre rosat deux onces:

onces; huile rosat omphac. & de myrthill. de chacun demie once: faire deux onces: soit fait vnguent.

Au reste, il faut vser de ces medicaments, changeant deux fois le iour l'appareil, comme nous l'auons desia dit cy dessus, iusqu'a ce que l'apostume apparaisse estre assez louable, à sçauoir blanche & aucunement égale: car alors il faudra se seruir des abstersifs, parmy lesquels on pourra mesler tousiours de nostre precipité, toutesfois en plus grande quantité, d'autant qu'il attire fort bien l'ordure hors de la playe, & qu'il resiste à la corruption.

Vn bon deterfif bien aisé à faire, pour les simples soldats.

Pr. del'vnguent dit Aureum, deux onces: terebenthine, & miel rosat, de chacun demie once: farine de feues, deux drachmes: borras, vne drachme: precipité en poudre, trois drachmes. Mesle le tout.

Autre approuué pour les grands.

Pr. suc de curage & de grande consolidate, de chacun deux onces: huiles de terebenthine, d'encens, myrrhe, & far-

cocolle, distillez à la maniere spagyrique, de chac. trois drachmes: racine d'aristolochie ronde, vne drachme & demie: cire blanche, vne once: huile de mille-pertuis composé, autant qu'il en faudra.

Addition.

Pr. du susdit, vne once: & y adioustez du précipité vne drachme, Meslez les & en oingnez les charpies.

L'vnguent du petum, de nostre description, est aussi fort profitable pour cet effect, duquel vous trouuerez la composition en mon Antidotaire.

L'usage du cataplasme sus mentionné sera plus propre, si vous y adioustez des farines de feues, ers, orge, & lentilles, quand il faudra plus dessecher, & obuier à la putrefaction. Le Cerat qui s'ensuit y est aussi fort profitable.

Cerat.

Pr. de l'emplastre Diachalciteos, six onces: de l'huile de guy de pommier à suffisance & en faites vn cerat que mettrez sur la playe.

Mais d'autant que ces blessures sont le plus souuent si profondes, que ny les

DES ARQVEBVSADÉS. 99
medicaments, ny les tentes n'y peuuent
paruenir, il faudra faire cette iniection
suiuante avec la firingue.

Pour les soldats.

Pr. de la peruenche du petum, cu-
rage, betoine, de chac. vne poignée: des
fleurs de millepertuis & bouillon blâc,
de chac. vn pugil. racines des deux ari-
stolochies, de chacune demie once: en-
cens, myrrhe, sarcocolle, & iris de Flo-
rence, de chac. deux drachmes. Faites
de tout vne decoction avec du vin blâc,
de laquelle ferez iniections dans la
playe, quand vous la penserez. Cepen-
dant prenez garde, que rien du tout
n'en demeure dans la cavité d'icelle:
car il suffit que la playe en soit lauée.

Pour les riches.

Pr. de la veronique, pyrole, peruen-
che, betoine, agrimoine, & grande
consolide, de chac. vne poignée: raci-
nes de aristolochie ronde, & iris, de
cha. vne once. Faites la decoction avec
le phlegme de vitriol.

Addition.

Pr. de cette decoction, estant coulée,
demie liure, meslez y parmy des huiles

de myrrhe, & mastic, distilez, de chac. trois drach. huile de terebenthine, demie once: meslez le tout, & en vsez comme dessus.

Après que la playe aura esté nettoyée, comme il appartient, il faut qu'elle se remplisse de Chair, ce qui se fera si de iour en iour on amoindrit les tentes: & ce non pas par les medicaments, mais par la seule operation de nature, & en fin en peu de temps la cicatrice s'y fera, pourueu qu'on augmente le poids de nostre precipité dans les vnguens: ou bien nous vserons du remede qui s'ensuit.

Poudre propre à cicatrizer.

Pr. chaux de coquilles d'œufs bien calcinées, demie once: borras & alun brulé, de chac. vne drachme: de crocus Martis, vne once: mettez le tout en poudre subtile, & vous en seruez.

Que si la playe ne peut supputer par les moyens susdits, & qu'il semble que vne gangrene, & la mort de toute la partie s'en doive ensuiuir (ce qu'on pourra cognoistre par vne grande puanteur, & par la couleur de la partie affe-

Éc, qui sera noirastre, violette ou liuide) il faudra appliquer soudainement des medicaments propres à cette corruption, desquels tu trouueras la description en leur lieu au chap. de la gangrene: & preuoir aussi & aller au deuant des symptomes, s'il en suruient quelques vns, comme à la douleur, au phlegmon, & aux autres, ainsi qu'il sera enseigné cy après. Il reste maintenant à traiter des playes qui sont compliquées avec venenosité & adustion.

Des playes faites par bastons à feu, compliquées avec venenosité & brulure.

CHAP. VI.

IA Y desia traité de la curation des playes, ausquelles la seule solution de continuité avec contusion & dilacération des vaisseaux est considérée: il faut maintenant parler du venin & de la brulure, qui peuuent estre meslez parmy ces playes, ainsi que nous l'auons touché par cy deuant. Or en ce cas il faut auoir recours à vne troisiè-

me indication s'il y a du venin : c'est à sçauoir à quelque excellent contrepoison qui luy puisse resister , & l'attirer hors de la playe le plustost qu'il sera possible, en amortissant sa force: de peur que penetrant par le dedans peu à peu, il n'infecte les principales parties, & dissipe leur force & leur substance. Ce qui se fera en partie par des medicaments topiques appliquez tant sur la partie blessée, que sur le cœur: en partie aussi par des medicaments pris par la bouche. Car si la chair de la playe est plus liuide que celle des autres playes communes, & comme morte, avec vne decoloration de toute la partie , avec pointes aux bords d'icelle , & inflammation & douleurs plus grandes que de coustume, & avec vn estonnement de tout le corps, alienation desprit, & fièvres ardentes: & si toutes ces choses aduiennent, principalement sans quelque cause bien manifeste , ce sont des signes qu'il y a du venin : & pource aussi, le plustost qu'on pourra, il faudra subuenir à vn si grand mal, laissant en arriere toutes les autres intentions, qui ne

*Signes
du ve-
nin cõ-
pliqué.*

font si dangereuses. Car tout ainsi que le nocher pense à se sauuer soudainement, & tasche & par voiles, & par rames de prendre quelque bon port, lors qu'il est agité d'une tempeste fort grande, & que tous les vents soufflent roidement de tous costez, & luy sont contraires: tout ainsi le Medecin bien versé & experimēté doit donner quelque vtile remede à vn mal si proche, & tascher en toute façon d'amortir sa force le plustost qu'il pourra, & ce, deuant que le venin ayt penetré & pris racine entierement, & qu'il ait saisi le cœur, & les principales parties, vers lesquelles il s'achemine hastiuement. Car mesme en ces choses-là le prompt secours troppe bien souuent, mais le retardement est tousiours nuisible. Si donc on iuge par ces signes & autres coniectures que la playe est compliquée avec venin, qu'on ayt soudain recours aux antidotes, avec meure deliberation & qu'on aduertisse les parens, ou familiers du malade (ainsi que Celsus nous en admonēste) du danger de mort prochain, auquel il est, ou que la playe est bien

dangereuse, ou du tout guerissable: afin qu'aduenant que le mal surmonte tout le deuoir qu'on aura fait, on n'en accuse nostre ignorance ou tromperie, & que l'art en soit deshonoré. Au reste, apres auoit ordonné vne bonne maniere de viure, & qui resiste aux venins, il faudra sur le champ auiser si la maladie requiert la seignée, ou bien la purgation; ce qu'il faut faire de bõne heure & auëc bõne cõsideration. Qu'on regarde aussi quelle euacuation dès le cõmencemēt, & en premier lieu doit preceder: ou biē celle par sueur, ou par vomissement, ou flux de ventre, ou bien par l'incision de la veine, pour vider les mauuaises humeurs, deuant qu'elles s'espandent par les veines, & s'attachēt entierement aux arteres: & à fin aussi que les conduits & souspiraux estans par ce moyen relaschez & ouuerts, ces fuligineuses & malignes vapeurs, par lesquelles le cœur seroit oppressé, passent & sortēt dehors. Et cela se doit executer principalemēt, si le venin est desja espandu par tout le corps, & si on cognoist que le patient est plethorique &

remply d'humeurs: car alors comme ecrit Paulus au liure 5. chap. 2. l'euacuation est fort vtile, mesme par l'ouuerture de la veine. Il faudra puis apres ordonner des choses qui defendēt & preseruent le cœur, comme est la Theriaque & le Mithridat pris dans du vin, ou avec quelque decoction de la racine d'angelique, tormentile, gentiane, bistorte, semence de citrons, de vinette, des herbes de melisse, veronique, & pimpinelle, à laquelle on pourra adiouster le syrop de limons, ou bien mesler les susdits Antidotes avec vne decoction cordiale. Bref, il faudra proceder tout ainsi que nature le requerra, & qu'il semblera au Medecin estre vtile, lequel y doit estre bien aduisé, & regarder de pres sans fouruoyer aucunemēt du vray but. Au reste, i'ay estimé que ce ne seroit hors de propos si en faueur de la posterité ie baillois la description d'vn remede bien aisé à faire, lequel estant donné, chasse tous venins, ainsi qu'on l'a essayé maintefois: & combien qu'il soit fort aisé, toute fois il doit estre tenu bien cher, pour estre vn certain

antidote bien profitable.

Contrepoison excellent & approuué.

Pr. racines d'asclepias, vne once : racines de valeriane & tormentille, de chacune demie once : racine de poly-pode de chesne, deux onces : racine de angelique cultiuée, quatre onces : racines d'angelique sauuage & de guimauues, de chac. deux onces : d'orties, vne once : racine de thymelée, vne once & demie : racine de scabieuse & petite valeriane, de cha. demie once. Lesdites racines doiuent estre arrachées entre le 15. iour d'Aoust, & le 8. de Septembre, lesquelles il faut tailler en morceaux, & les mettre dans vn pot de terre vitré, biē luté par tout, avec vne bonne quantité de vinaigre, & qu'elles trempent ainsi l'espace de douze heures : puis les faire cuire par l'espace d'une heure & demie : & les ayant retirées du vinaigre qui restera apres la decoction, les faut dessecher, en sorte qu'ō les puisse mettre en poudre. Ce qu'estant fait y adiouster trenre fucilles de l'herbe de Paris (autrement dite Raisin de renard) avec douze de ses grains, mis pareille-

DES ARQVEBVS ADES. 107
ment en poudre. La dose est d'une
drachme prise avec du vin blanc.

*Autre contrepoison qui se fait
promptement.*

Pr. du Mithridat & de la bonne the-
riaque, de chacun demie drachme : des
perles préparées & couraux rouges, de
chac. vn scrupule: du bol armenien, de-
mie drachme: du syrop de limons, vne
once : de l'eau de buglosse, & de sca-
bieuse à suffisance. Faites en vne potiõ,
laquelle vo⁹ reitererez, s'il en est besoin.

Vne autre pour ceux qui ont de quoy.

Pr de l'or de vie, & de l'essence de
perles, de chac. six grains: de l'essence
de couraux, huit grains: de la terre si-
gillée bien choisie, vn scrupul. Faites en
vne potion avec quantité suffisante de
nostre eau theriacale, laquelle il faudra
prendre incontinent. Elle defend &
preserue merueilleusement le cœur de
tout venin & contagiõ. Les epithemes
aussi appliquez sur le cœur y sont fort
bõs, faits avec des perles, santsaux, cou-
raux, camphre, & eaux cordiales.

D'avantage Galien au liure 13. de sa
Metho. a esté traduis qu'õ prit deux in-

dications curatiues pour guerir ces playes enuenimées : l'une qui attirast hors le poison, l'autre qui amortist & appaisast la douleur qui en est procédée. Il prouuoioit à la premiere indication par des eschauffans & attractifs, par des ventoses, scarifications, & finalement par brulures faites, ou par le cautere ardent, ou par quelque médicament caustique. Et paracheuoit la derniere indication par des médicaments qui pouuoient alterer la qualité par vne autre qualité cōtraire, comme par refrigerans, si vne extrefme chaleur tourmentoit le malade, & par des eschauffās, s'il endureoit du froid à la partie offensée, & mesme par tout le corps. Quant aux anciens Medecins ils estoient d'aduīs qu'on appliquast à la playe enuenimée du sel, des oignons, de la rue, de la moustarde, du glan, des noix, du dictamne, du souphre, & semblables médicaments propres pour attirer. Ils vsoient aussi de ligatures & scarifications faites avec la lancette, afin qu'une plus grande quantité de sang corrompu coulast de la playe: dequoy Pau-

lus Aëtius, Actuarius, & Cornelius Celsus grands Medecins & dignes d'estre louez à iamais, ont escrit amplement. Mais d'autant qu'ils n'ont eu cognoissance ny de ces playes de bastons à feu, ny de tous les remedes qui leur sont propres, ny parauēture des venins desquels la bale peut estre empoisonnée: il m'a semblé bon de mettre en auant des remedes non vſitez, propres pour la guerison d'icelles, l'vſage desquels la posterité ne pourra assez estimer. Si doncques par les signes susdits il y a quelque souſpeçon que le venin ſoit compliqué avec la playe, il faudra pour le premier appareil, apres auoir tiré toutes choses estranges, s'il se peut faire, scarifier les bords de la playe avec vne lancette, & y appliquer des ventoses & oindre le charpis de l'vnguent ſuiuant, & le mettre dans la playe.

*Paul.**liu. 6.**chap. 2.**Aët. tet.**4. ser. 1.**c. 48.**Act. 1.**6. c. 11.**Cor. 1. 6**c. 27.*

Vnguent pour playes enuenimées.

Pr. de l'vnguent Macedonic, deux onces: de l'huile de myrrhe & de terebenthine, de chac. deux drach. de nostre précipité, vne drach. & demie: du beurre d'arsenic fixé & dulcifié demie

once: de l'huile d'Antimoine, deux drach. de la cire quelque peu: soit formé en vnguent. Il ne se peut desirer médicament plus excellent que cestuy-cy pour attirer des playes quelque venin que ce soit, & les en nettoyer entièrement. Pourtant aussi les Chirurgiens doiuent estre tousiours pourueus d'un tel médicament: duquel quand ils auront experimenté la faculté en ces playes principalemēt, & en tous autres vlcères malins, & de difficile guerison, tant plus ils en feront cas, veu mesme qu'il opere sans causer aucune douleur, ou au moins bien petite.

Vn autre plus excellent.

Pr. de l'huile de Mercure corporel, vne drach. & demie: huile de souffre tiré par le moyen de la terebēthine, trois drach. d'arsenic dulcifié, deux drach. meslez le tout parmy du beurre non salé, & en soit fait vnguent: duquel vous mettrez sur la playe, comme a esté dict, avec les carpids & tentes: car il est fort bon aux playes enuenimées, à la gangrene, au chancre, & aux vlcères phagedeniques & malins. Et à l'entour de

la playe mettez cet emplastre suiuant.

Medicament attractif.

Pr. de l'ammoniac, & du bdellium desfaits & dissouts en vinaigre rosat, de chacun deux onces: du galbanum, demie once: de la mumie, encens, & mastic, de chacun trois drachmes: de cāphre, deux drach. des deux sortes de couraux, de l'aimant préparé, du bitume, ambre iaune, de chac. demie once: racines d'aristoloch. serpentaire & roseau, de chac. deux drach. & demie: cire, poix nauale, de chac. trois onces: d'alabaistre, trois drach. huiles de terebenthine & d'œufs, de chacun parties esgales, & autant qu'il en faudra pour former vn cerat. Ce medicament bien préparé attire le venin, & met hors la bale, & les petites pieces de fer, des os, des vestemens & du bois.

Autre attractifs fort excellent.

Pr. de la gomme extraite (comme il sera dit) de la seconde escorce du tilleul, deux onces: de l'aimat préparé, vne once: ambre iaune, demie once; d'opopanax laué avec eau de serpentaire, trois drach. de terebenth. & cire à suffisance

pout former vne emplastre.

Vn autre Specifique.

La langue d'un Renard arrachée en temps opportun, préparée comme il appartient, & desseichée, attire hors la bale des plus profondes parties, sans aucune douleur : mais auant que l'appliquer sur la playe, il la faut laisser tremper quelque peu de temps dans la decoction d'aristolochie & serpentinaire faite avec du vin rouge.

Cependant on ysera du defensif suivant, lequel mis sur la partie blessée, seruira de beaucoup.

Pren des fleurs de bouillon blanc, de mille pertuis, & roses, de chacun deux pugill. de fueilles de ruë & iusquiamé, de chacun vne poignée, de camphre, demie once : cuits le tout dans du vinaigre en le reduisant en forme de cataplasme. Il empesche que la partie ne soit molestée du phlegmon, & appaise la douleur.

On pourra appliquer ces médicaments deux fois le iour, desquels on ysera iusques à ce qu'on cognoisse que tous les grands symptomes auront cessé : car
alors

alors il faudra traiter la playe, comme si elle estoit contuse, l'entretenir ouverte le plus long temps qu'on pourra, afin que la pourriture virulente s'escoule tousiours, & qu'il n'en reste aucunement. Mais apres que le tēps sera passé, qu'il ne faut plus rien craindre, & que tout le venin sera dehors, il faudra peu à peu sōder la playe & en fin la cicatrizer avec les medicamēts à ce conuenables, comme nous l'auons escrit cy dessus. Que si la playe pour la qualité mortifere du venin, est entierement dangereuse, & ne puisse estre guerie par medicaments, ce ne sera hors de propos, si apres auoir bien consideré le tout, on en retrēche & coupe la partie blessée, s'il se peut faire aisément. Et cecy suffise quant aux playes enuenimées. Or d'autant qu'il me faut maintenant traiter de la brulure, qui se trouue souuentefois compliquée avec les playes, ie ne puis nullement approuuer l'opinion de ceux qui sont d'aduis d'appliquer soudainement sur les parties ainsi offēses des choses qui soyent fort froides, & astringentes: car elles reserrēt au lieu

d'attirer & mettre hors cette ardeur & bruslure, & mesme l'imprimēt d'auantage dās les parties, & augmētēt le mal : & sur tout le vinaigre, duquel toute fois la plus grāde part se sert le plus souuēt.

Tetra

4. ser. 2.

c. 26.

Car par sa faculté astringente il reserre les vaisseaux ouuerts, & empesche le flux de sang, comme Aëtius l'enseigne.

Mais au lieu de tout cela, la saumure & les eaux salées par vne faculté soudaine ostēt plustost ceste force du feu, & l'empyreurne des parties, appaisent les grandes douleurs, & empeschēt que les vessies ne se leuēt, principalemēt si les parties bruslées sont couuertes soudainemēt d'un linge bien deslié, trépé dedās

Orib.

syn. li. 7

chap. 6.

Paul.

lib. 4.

chap. 11

l'eau salée. Mais Oribasius & Paulus aussi ont esté d'aduis qu'il faut nettoyer moderémēt les parties bruslées: & pour cet effect ils ont fort loué la terre de Chio, & celle de l'Isle Cimole, & celle de Crete, & toute autre estant legere, meslée avec du vinaigre qui ne soit fort, ou avec de l'eau, car elles estouffēt le feu mesme par leur consistance. Les modernes approuuent l'vnguent fait de chaux lauée par sept fois, & meslée

avec huile rosat, & mise sur la brulure. Les autres ont leur recours aux hiebles cuits dans du vin, & preparez en forme de cataplasme, & à semblables choses, qui mettent dehors, dissipent, & résoluent par leur chaleur l'empyreume empraint en la partie. Car de mesme façon le feu sert de remede au mal causé par luy mesme, la partie brulée luy estant approchée: d'autant que par la resolution, apres auoir osté l'empyreume, il appaise la douleur. Or quand à moy i'ay vû souuent avec bonne issuë des remedes suiuan, qui sont fort faciles à preparer.

Vnguent approuué, pour les simples soldats.

Pr. huile de sureau & de noix; de chacun deux onces: huile d'œufs, demie once: suif de cerf, & mouëlle de pieds de taureau, de chacun vne once: quatre oignons cuits, & vn peu de cire: soit fait vnguent, duquel vous mettrez sur la brulure.

Autre.

Pr. huile de lard, & huile de beurre, de chacun demie once: suc de la secon-

de escorce de sureau vne once: suc des fucilles & frui&ts de lierre, deux onces: huile de sureau, quatre onces: salpestre, deux drach. Le tout cuise ensemble iusqu'à ce que les sucz soyent consommez, & faites en puis apres vn linimēt avec vn peu de cire, lequel est fort propre pour oster la brulure. L'eau suiuan-
te y est fort profitable.

Eau distillee pour la brulure.

Pr. du phlegme de vitriol & d'alun, de chacun demie liure: des fleurs de bouillon blanc, & fucilles de lierre noir, de cha. vne poignée: limaces, grenouilles, escreuisses, ou cancrs de riuere, de chac. dix: distilez le tout dans vn alambic de plomb avec assez grand feu: fomentez avec cette eau le lieu brulé cinq ou six fois le iour.

L'eau tirée de la semence de grenouilles, meslée avec le phlegme de vitriol, y est fort profitable. Mais il n'ya meilleur medicament pour esteindre l'empyreume causé par la poudre, que ce linimen qui s'ensuit: car il empesche toutes inflammations & appaise merueilleusement la douleur.

Pour les grands.

Pr. du sel * doux tiré du plomb, vne
 once: camphre, vne drach. huile de iau-
 nes d'œufs, deux onces: beurre préparé,
 quatre onces: meslez le tout, & en fai-
 tes liniment, duquel oignez toute la
 partie bruslée, trois ou quatre fois le
 iour.

* Les
 Spagy.
 rigues
 le nom-
 ment
 ainsi.

Mettez aussi sur les parties plus esloi-
 gnées ces remedes, pour empescher la
 descente des humeurs, & l'inflamma-
 tion.

Vnguent Nourri magistral.

Pr. du suc des fueilles de lis d'estang,
 de la grande ioubarbe & iusquiamo, de
 chacun deux onces: des eaux de la se-
 mence de grenouilles & des fleurs de
 bouillon blanc, de chacun vne once:
 de litarge, ou bien (& qui sera meilleur)
 de son sel, deux onces: de l'huile de guy
 de pommier & rosat omphacin, de cha.
 trois onces & demie: vinaigre rosat, vne
 once: demenez le tout longuemēt, selō
 l'art, dans vn mortier de plomb avec le
 pilon pareillement de plomb, tant qu'il
 deuiēne en forme de Nourri, & en vsez
 pour vn defensif. Or ces medicaments

topiques sont fort propres pour les bruslures: mais d'autant que ces accidens peuuent aduenir bien souuent aux corps mal habituez, & remplis de mauuaises humeurs, qui seroient de tant plus sujets à tous inconueniens, comme à grandes douleurs & defluxions, d'où les fièvres pourroient s'en ensuiure, & à la fin la mort (ainsi que l'on voit tousiours les vaisseaux freslez & entr'ouuerts estre plus facilement accablez par le naufrage) il faudra premierement preuoir à toutes ces choses, & par soigneuse administration de viure, & par l'euacuation desdites humeurs, faite par quelque medicament propre, & aussi par la saignée, si le cas le requiert, & que le corps soit plethorique, & abondant en humeurs.

A quoy le Medecin expert doit soigneusement prouuoir, comme aux plus grandes causes de toutes celles, qui peuuent incommoder aux playes, ainsi que Galien l'enseigne: & doit iuger prudemment de tout l'euuenement, sans mespriser les choses grandes, & exalter les moindres, de peur qu'il ne

*Liur. 4.
de sa
Metho.
chap. 1*

semblent auoir fait outre sa portée: se
 proposant tousiours deuant les yeux la *Liur. 5.*
 sentence de Celsus, à sçauoir qu'un *cha. 26.*
 mal qui sera petit de soy, ne vienne
 plus grand par sa faute & negligence.

I iiii



DES CVRES PARTI-
CVLIERES DES ARQVEBV-
fades, selon la diuersité des parties
offensées: & des accidens ou sym-
ptomes qui y suruiennent.

Des playes avec brisement d'os.

CHAP. PREMIER.

LE vulgaire estime les arque-
busades de tant plus diffi-
cile curation, si elles sont con-
iointes avec brisement des
os. Et ce non sans cause, principalemēt
quand les grands os des bras, des cuissēs
& des iambes sont tellement brisez que
la mouëlle en apparoist: d'autant que
cela n'a peu aduenir sans vne grande
dilaceration des nerfs, des veines, & ar-
teres, qui portent le sentiment, la vie, &
la nourriture à chacune partie: & des-
quelles choses estans destituées, la cor-
ruption s'en ensuit, & le plus souuent la
mort totale d'icelle partie qui sera si

fort offensée. A quoy le Medecin & Chirurgien doiuent prendre de tant plus soigneuse garde, que l'exigence du cas le requiert, pour ne rien omettre de ce qui appartient à vne entiere curation: laquelle on doit tenter avec tous bons remedes, plustost que desesperant d'icelle, couper du tout ledit membre (chose deplorable) mesme dès le commencement, & la partie n'estant encore mortifiée. Et ne dis cecy sans cause, sçachant que nature estant aidée cōme il faut, fait de merueilleux effects, & trompe le plus souuent le iugement des plus doctes, comme ie l'ay veu aduenir és dernieres guerres à plusieurs: & mesmement à vn gentil-homme nommé le Capitaine la Brosse, lequel fut blessé d'un coup de mousquet au bras droit, en telle sorte que tout l'auant-bras en fut brisé entièrement, mesme iusques à sa teste qui est inserée au haut du palleron où commence la ioincture, qui fut la seule occasion, que les Chirurgiens n'oserent retrécher le membre, cōme ils l'auoient proietté & conclu, & comme ils l'euf-

*histoire
memo-
rable.*

sent fait autrement, s'ils eussent peu) craignans d'heure à autre la mortification totale de la partie, à cause du grand brisement de tout ledit os) pour preuoir à vn si eminent danger de mort. Toutefois le pauvre malade duquel on n'attendoit de iour en iour que la mort, tât la playe estoit cōpliquée de diuers symptomes, fut guery, mesme sans perdre la partie de laquelle il s'est depuis aidé aucunement. l'escriis cecy pour donner courage aux ieunes Chirurgiēs de tenter par tous moyens secourables & souverains remedes, de preseruer quelque partie qui fera ainsi fort offensée, plustost que d'essayer dès le cōmencemēt la cure par le retréchemēt d'icelle: laquelle à mon aduis ne se doit faire qu'apres vne certitude de la mortification presente, & ce encore avec vne deuë prediction & protestation. Je sçay bien qu'õ m'alleguera que les forces sōt plus grandes au commencement, lesquelles sont requises pour cet effect, & qu'elles diminuent par la longueur du mal, ce qui peut rendre suspect le retardement. Mais l'attente d'vne plus gran-

de, parfaite, & entiere guerison est plus considerable és choses mesmes presque desesperées : car c'est se proposer du tout ce qui n'est encore aduenu, & estimer comme impossible ce que nature aidée & secouruë, comme il faut, parfait à la fin heureusement, contre nostre esperance & commun iugement : ainsi que desia ie l'ay demonstré par exemple : ou à tout le moins (si la necessité nous presse tant) cela se fera par le bon aduis & cōmun iugement des doctes, pluſtoſt que par la simple opinion de quelque téméraire, qui le pratiquera autrement. Or pour reuenir aux blessures faites avec fracture ou brisement des os : il m'a semblé estre expedient de commencer par celles qui aduiennent à la teste, comme estans les plus dangereuses : tant à cause de la preeminence du cerueau contenu en icelle, qu'aussi d'autāt qu'elles ne peuuent recevoir les ligatures, qu'ō dit estre deuës & conuenables à toutes fractures, & inuentées pour repouſſer ce qui afflue, & empêſcher par conſequent les phlegmōs, & purger la ſanie, & ce qui est cō-

*Des
playes
du test
avec
fracture
d'os.*

tenu és parties affligées: sans lesquels remedes nul des autres os ne pourroit estre gardé sain, ainsi que l'enseigne Galien au 6. de sa method. C'est pourquoy aussi il est necessaire, quand icelles fractures aduiennent à la teste, de desnuer & descouvrir quelque partie de la fracture, ce qu'on nomme trepaner, afin de pouuoir nettoyer & dōner issuë à la sanie, qui autrement corromproit les mēbranes, & le cerueau, d'où la mort pourroit ensuiure. Il faut doncques pour exemple, & pour plus grāde intelligence nous proposer quelque vn qui sera nauré d'une arcbusade, ou autre baston à feu à la teste: & premiere-ment considerer si la playe est manifeste au sens, ou occulte avec la seule cōtusion sans entamure du cuir: ce qui peut aduenir quelquesfois par la resistance que l'armet en teste y fera, lequel s'enfonçant, comme il pourra aduenir, froissera neantmoins le crane sans entamure manifeste. Or ces choses bien cognues par les moyens ordinaires, il faudra faire vne suffisante incision, & cōuenable en cas qu'il n'y ait point ou-

uerture apparente, & la remplir avec des estoupes chargées d'un reſtrinſtif fait avec le ſang de dragon, l'encens, le maſtich & le bol meſlez avec vn blanc d'œuf, afin que le lendemain les oriſſes de la playe ſoient dilatez, & qu'on puiſſe mieux cognoiſtre & iuger de la fracture: Laquelle aduient en pluſieurs ſortes, quelquefois avec exciſion de la premiere table ſeulement, ou bien de toutes les deux avec eleuatiō & réuerſement de l'os frappé: qui eſt meſme quelquefois du tout ſeparé & emporté. Ce qu'on appelle fracture avec dolure. Quelquefois ladite fracture aduient avec fiſſure ou fente apparente que les Grecs nomment *παγμα*, & quelquefois elle eſt occulte au ſens, tant elle eſt petite, qui eſt dite pour cela des Latins Capillaire ou Pileuſe, & des Grecs *τεχνος* laquelle penetre encore, ou toutes les deux tables du teſt, ou ſeulement la premiere qui n'en eſt ſi dangereuſe. Quand doncques la fracture nous ſera par ces propres ſignes manifeſte, & que nous penſerōs que la playe faite par le coup receu, ou biē que nous aurōs faite avec

*Ti pour
ras voir
les au-
tres dif-
ferences
de la
fract du
teſt au
vi. liu.
d'Aeg.
cha. xc.
me con-
tentant
de ces
deux
que ie
propoſe
pour
exēple
ſeulement.*

le rasoir, ainsi qu'il a esté dit cy dessus, est assez dilatée & ample pour faire les operations requises, il faudra en premier lieu tirer ce qui sera grandement rompu & brisé, & toutes les choses qui comprimeront les meninges. Que s'il y a d'auenture quelques grâds fragmēs (comme il aduient souuēt) il ne les faudra point poursuiure iusqu'à la fin à les tirer, comme nous enseigne Galien, d'autant qu'il nous doit suffire que l'ouerture en l'os soit si grâde, que la sanie & la pourriture seulemēt en puisse estre nettoyée. Or voila ce qu'il faut premierement obseruer, quāt aux fractures du crane qui sont manifestes & penetrantes avec excision. Quant aux autres qui sont avec vne simple fente en l'os, dite fissure, elles requierēt vn homme bien expert pour les cognoistre seulement, d'autant que bien souuēt on y est trompé par le sens de la veue & de l'atouchement. Les Anciens vsoient en ce cas, la fente estant capillaire, d'vn medicamēt noir, lequel delaissant vne trace noire en l'os, denotoit qu'il estoit fédu: l'encre pourroit bien seruir à cet

*An 6.
de sa
Methode
cha. 6.*

effect, meslée avec du mastic. Le tartre calciné iusques à la noirceur, y fera fort propre. Les modernes vsent d'un cataplasme, ou médicament restrictif, qu'ils mettent sur l'os, & là où il apparoit estre plus sec (à cause d'une vapeur chaude, qui passant à trauers de la diuision desseche le linimēt, ou cataplasme) la fracture, ou scissure est démontrée. Ce qu'estât apperceu, il faut estre tant plus diligent à sçauoir par moyens à ce requis & signes ordinaires, si ladite scissure penetre toutes les deux tables ou lamine, ou si elle est tant seulement simple. Car ne penetrant point iusqu'à la partie interieure, il suffira de racler avec la rugine ou autres instruments propres iusques à l'entier de l'os, pour le rendre vni: & puis poursuiure la totale guerison de la playe avec l'vsage des medicamēts propres aux arquebuses, desquels no⁹ auons parlé au premier liure. Obseruant seulement cela, que les playes de la teste ne veulēt estre humectées d'aucune liqueur, suiuant Hippocr. en son liure Des playes de la teste, mais au contraire, les medicamēts

exsiccatifs & cephaliques sont fort requis pour estre appliquez sur ledit os fendu, ou en forme seche, estans seulement reduits en poudre, ou bien meslez avec du miel rosat. Les susdits cephaliques sont composez des poudres de farrazine, d'encēs, de Myrrhe, de glaycul, de la racine de panax & semblables. Le mercure aussi bien precipité meslé avec le miel rosat & la farine de la vessie noire, est vn singulier remede pour cet effect, & aduance l'exfoliation des os. Mais si d'auenture l'adite fente penetre iusqu'au dedans, il faudra donner ordre deuant que le troisieme iour soit passé, de trepaner, ou faire suffisante ouuerture audit os, cōme dit Hippocr. pour empescher l'inflammation, & donner issue à la sanie, & pour la pouuoir oster du tout. Ce qui doit estre fait avec grande cōsideration & instrumens à ce necessaires, desquels on pourra veoir les diuerses figures au liure que M. Ambr. Paré a escrit des playes de la teste. Or apres que l'operation manuelle requise en la fracture du test sera faite, il faudra diligemment obseruer (quand l'os bran-

branflera, & qu'il fera presque entièrement coupé par la trepane, si la membrane est encore fort ioindte & attachée audit os, car lors il ne sera requis de l'arracher du tout, de peur que la violēce & l'air mesme exterieur ne l'offense, ains faudra cesser, & attēdre qu'il se separe de soy-mesme. Que si ladite membrane est du tout separée (ce qui aduient bien souuēt aux arquebusades, à cause de l'impetuosité du coup) & que l'on voye l'inflātion presente, & autres mauuais accidens, qui communement l'accompagnent, il faudra faire l'ouuerture totalement, deuant mesme qu'elle se corrompe, si on est appelé à temps pour ce faire. A quoy le Chirurgien doit estre bien expert & aduisé pour sçauoir cognoistre les lieux où il faut appliquer les trepanes. Car on ne le doit faire sur les cōmissures, ou coutures du test : mais aduenant que la playe soit faite en icelles, il faut sans les toucher aucunement, faire l'ouuerture par les deux costez, & au lieu qu'on estimera le plus cōuenable pour donner issue à la sanie d'un costé & d'au-

*Les
lieux
où on
ne doit
appli-
quer les
Trepan-
es.*

tre. Qu'on s'abstienne aussi de faire ou-
 uerture à l'endroit des sourcils & vers
 les parties inferieures du crane, d'autant
 qu'il seroit à craindre que le cerueau
 pour sa pesanteur, ne sortist par icelles:
 celle aussi vers les tēples est defenduë,
 à cause du muscle temporal & des vais-
 seaux qui y sont. Ce que Galien a ex-
 pressément denoté au 6. de sa Methode
 chap. 6. par ces mots: D'auantage, dit il,
 ie pense qu'il pourroit aduenir (si on fai-
 soit vn grand pertuis aux os, lesquels sōt
 à costé) que le cerueau sortiroit dehors
 par ceste partie: outre plus aux costez,
 il y a en plusieurs lieux explantation
 d'aucuns nerfs, lesquels ne sōt à mespri-
 ser. Mais (adiouste il d'auantage) aux
 parties superieures de la teste, il n'en
 sort vn seul nerf, le moindre que ce
 soit: pour nous demonstrier qu'en icel-
 les les ouuertes s'y font avec moins
 de danger. Or après que l'ouuerture
 conuenable a esté faite ainsi que nous
 l'auons dit, les Chirurgiens communé-
 ment appliquent sur la membrane des-
 couuerte vn *santal, qu'ils appellēt, le-
 quel les vns trempent seulement dans

*C'est
 vne pie-
 ce de
 taffetas
 rouge.*

de l'huile rofat, & l'appliquent chaude-
 ment: les autres y adioustent quelque *de la*
 partie de miel rofat, & les autres vsent *gran-*
 de miel rofat, seulement, craignans que *deur de*
 par l'humectatiō de l'huile la membr- *la mē-*
 ne ne se putrefie: ils chargent aussi les *brane*
 charpis & plumaceaux, vers les pre- *des cou-*
 miers iours pour remplir toute la ca- *uerte.*
 uité de la playe, les vns de digestifs,
 qu'ils appellent ainsi, & desquels nous
 auons desia parlé, ou bien du macedo-
 nic, ou du basilicon: les autres d'un me-
 dicament fait de l'emplastre de betoi-
 ne, dissout & mis en forme d'unguent,
 avec huile rofat: ou au moins ils vsent
 de ce medicament apres le troisieme,
 ou quatriesme appareil: d'autant que
 suivant Hippocras la membrane estant *En son*
 desnuee elle doit estre bien tost net- *lin. de*
 toyee & dessechée, de peur que par la *playes*
 longueur du tēps elle ne s'enfle & pour- *de la*
 risse. Et quand le temps du phlegmon *teste.*
 est passé, ils mondifient & font produi-
 re la chair, & cicatrisent en fin la playe:
 ce qui se fait avec les exsiccatifs & ce-
 phaliques, comme a esté dit cy dessus.
 Cependant il m'a semblé, que ce ne se-

roit hors de propos si ie mettois en auant quelque description des remedes propres pour les playes accompagnées de la fracture du crâne. Et premiere-ment pour mettre sur la meninge incontinēt qu'elle sera descouuerte, pour le premier appareil.

Pren. miel rosat, deux onces: huile de jaunes d'œufs, vne once: meslez le tout & y trempez vostre fantal, ou bien les plumaceaux bien dessiez, & les appliquez chaudement sur la membrane.

Ou bien afin d'auoir vn medicament bien tost prest.

Pren miel rosat deux onces: huile rosat, vne once: terebenthine bien lauée, vne once & demie: meslez le tout ensemble & en vsez avec le fantal, comme a esté dit cy dessus.

Dans le quatriesme ou cinquiesme appareil, il n'y faudra point mesler d'huile rosat, ny celuy d'œufs, ains on vsera du miel rosat, & de l'huile de millepertuis simple; meslez ensemble en esgale portion.

Le septiesme iour estant passé, on se

seruira des remedes qui s'ensuiuent, propres pour estre appliquez sur la meninge descouuerte.

Pr. miel rosat, deux onces : terebenthine, vne drachme : eau de vie x. gouttes : Meslez le tout ensemble : & faites chauffer ledit linimēt dans vne escuelle & y trempez le fantal & des carpis bien desliez, lesquels mettrez chaudement sur la meninge descouuerte, & tiendrez tousiours aupres vn rechaud plein de braise, pour la crainte de l'air froid qui y pourroit nuire.

Ou bien à ce mesme effect, pour les plus aisez.

Pr. miel rosat, deux onces : huile de myrrhe selon nostre description, demie drachme : huile de terebenthine distillée par le bain avec l'eau de vie, vne drach. meslez le tout ensemble, & en vsez comme desia a esté dit, quand la partie ne sera molestée de phlegmon. Ce medicament est fort propre à preseruer la membrane de toute putrefaction, & est aussi fort conuenable aux fractures du crane,

Cependant vous vſerez au commencement de l'vnguēt magiſtral , que i'ay deſia deſcrit en la page 85. duquel vous mettrez à l'entour des os , & remplirez le creux de la playe , & en chargerez les charpis & plumaceaux , y mettant encore par deſſus vn emplaſtre du meſme vnguent. Cependant pour mondifier, vous vſerez du medicament qui ſ'enſuit, lequel y ſera fort propre.

Pour les moindres.

Pr. poudre de myrrhe, de ſarcocolle, & iris de Florence, de chacun deux drachmes: mumie, vne drachme & demie: racine de conſire & de ſaraſine, vne drach. farine de veſſe noire, deux drach.& demie: miel roſat & terebenthine lauée avec l'eau de betoine, de chacun tant qu'il en faut pour rendre le tout en forme d'vnguent.

Pour les plus riches.

Pr. de l'vnguent de petum de noſtre deſcription, trois onces: huile de myrrhe, trois drac. huile d'ambre iaune, dit ſuccinum diſtillé & purifié comme il faut, deux drachmes: poudre de ſarraſine, vne drachme; faites vnguent.

Quand la meninge sera couuerte, & qu'il sera besoin de dessecher d'auantage, il faudra adiouster sur vne once dudit vnguent vne ou deux drach. de nostre precipité, qui seruira à faire tōber plustost les petites pieces des os, & à tirer les excrescences, ou superfluitez de la chair, qui y suruiennent : & vsera-on de ce medicament, iusques à la fin de la vraye & entiere cicatrification. On mettra aussi vn emplastre de betoine par dessus, ou de Gratia Dei, ou du Diadictamnum de Galien, ou bien celuy qui s'ensuit, pour faire tenir lesdits charpis.

Emplastre Capital, ou Cephalique.

Pr. suc de peruenche, de chelidoine, & de la grande conside, de chacun vne once : mumie, myrthe, sarcocol. iris, de cha. six drac. racine de sarrasine, demie once : ambre iaune puluerisé, deux drach. & de terebenthine & miel, de chacun trois onces : crocum Martis du plus subtil, trois drach. cire tant qu'il faut pour reduire le tout en forme d'emplastre.

Et à cause de l'inflammation, ne sera

mauuais d'imbroquer les enuiron de la playe (vers les premiers iours) avec l'huile rofat , & y faudra appliquer des cuiffinets & des ligatures conuenables. Et d'autant que le froid est fort cōtraire & dommageable à ces playes , il y faudra auoir esgard par tous moyens requis & necessaires.

*Le regi-
me.*

Au reste , la maniere de viure doit estre tenuë: quant à l'vsage du vin, il est à craindre, comme aussi toutes les viandes qui engendrent des vapeurs & fumées. Il ne faut oublier les euacuations tant par la mission du sang , que par le bas, s'il est de besoin. Cependant il se faut proposer tousiours deuant les yeux la sentence d'Hippocr. à sçauoir que la moindre des playes de la teste ne doit estre mesprisée, combien qu'elle ne soit qu'avec entamure du cuir , pour les diuers & grāds symptomes qui y suruiennent. Et pour cette cause, il faudra estre prudent à bien pronostiquer, afin d'euiter la calomnie à laquelle ceux qui se meslent de la medecine sont le plus souuent subjets.

*En son
liur. des
playes
de la
teste.*

*Des si-
gnes &
iugemēs*

Les playes doncques qui sont faites

sur les cōmissures sont fort à craindre, & celles du deuant de la teste, & mesmement des temples, ou des costez de la teste, plus que celles des autres parties du derriere, cōme l'enseigne Hippocrates au mesme liure. Et tant plus la fracture & brisemēt de l'os sera grād, tant plus la playe doit estre douteuse, principalement si les meninges sont offensées: d'autant que le coup receu des bastons à feu est si grand, qu'il esbranle non seulement ce qu'il touche, mais aussi les parties lointaines avec vn grād estonnement du cerueau & assoupissement de tout le corps, ce qui est vn mauuais indice. A quoy il faut prendre vne soigneuse garde; pour pouoir mieux vser des remedes, & rapporter plus assëurément aux amis tout le succez du mal,

Ceux qui doiuent mourir de ces playes, ou bien meurent à l'instāt qu'ils ont receu le coup, ou tost apres, suiuant la violence du coup & ainsi qu'il aura rencontré. Quelquesfois la fièvre saisissant les moins blesez à mort ils meurent le septième, ou l'vnzième, ou le dix-

septiesme iour. Or en ceux-cy deuant que mourir la playe deuient comme liuide, de laquelle il en sort bien peu de sanie puante, & l'os se monstre noirastre, & des pustules apparoissent à la langue, & quelque rougeur sur les yeux, & autres tels signes qui demonstrent la mort estre prochaine, qui aduient bien souvent avec conuulsion & resueries.

Des playes du visage avec fracture.

CHAP. II.

LES blessures qui sont faites au visage avec fracture des autres os de la teste, comme de l'os dit Basilaire, ou des machoires, n'ont besoin d'autre curation, que d'une liaison conuenable, & application des remedes propres pour les playes contuses avec brisement d'os. A ceste cause il faudra au premier appareil par tous moyens tirer dehors la bale, si d'auenture elle est adherente dans la partie blessée, & toutes les choses estranges: & mesmement les pieces des os qui seront separez &

qu'on pourra tirer sans violence: car autrement il faudra attendre que nature les iette hors d'elle-mesme, ou par l'entrée, ou par la sortie de la bale, comme il viendra à point: laquelle il faudra aider par des medicaments propres, ou urât, s'il est besoin, les bords de la playe avec le fer, & les espōges preparées, ou autrement: & vsant des remedes que nous auons desia descrits en nostre premier liure, propres pour l'entiere guérison, ainsi qu'on verra estre expedient. Au reste, il me semble, que ce ne sera hors de propos de toucher quelque chose de la difformité qui aduiét à cause de ces playes, à laquelle on doit auoir esgard, & sur tout, de celles du visage, tant à cause que c'est la partie qui rend la personne plus honorable, & qu'elle est plus suiette à tous inconueniēs, pour estre découuerte. Si dōcques il aduient que le coup soit donné de si près que la barbe en soit brulée & le cuir escorché, il faudra auoir recours aux medicaments que i'ay descrit au chapitre de la brulure: & entre autres ce remede facile y est fort conuenable,

d'autant qu'il empesche que les vessies ne s'esleuent, & fait engendrer le poil, comme vn grand personnage m'en a asseuré pour l'auoir experimenté.

Pour le commun.

Pr. des porreaux, & estans cuits sous la braise, exprimez en le ius, duquel vous oindrez la partie bruslée, & desnée de poil deux ou trois fois le iour.

Autre experimenté.

Pr. ius de porreaux & d'oignōs blācs cuits sous la braise, de chacun deux onces: eau de semence de grenouilles, vne once; huile de guy de pommier, & cire blanche tant qu'il en faut pour en former vn liniment: duquel la partie bruslée & desnée de poil sera ointe deux fois le iour.

Que si d'auenture les grains de la poudre, comme il aduient souuent, tiennent au cuir, il faudra tascher à les oster promptement avec la pointe d'vne grosse aiguille, ou avec quelque autre ferrement poinctu & puis mettre dessus le liniment qui s'ensuit.

Pour les taches des grains de la poudre.

Pr. du beurre, lequel apres qu'il sera

fondue, iettez le dans de l'eau tirée de la semence de grenouilles, ou dans celle des escreuices, tirée ainsi que nous l'en-
seignerons, reiterant cela dix ou douze
fois, & iusques à ce que le beurre de-
uienne blanc comme lait.

Prenez donc de ce beurre ainsi pre-
paré trois onc. huile de moyeux d'œufs
fait suiuant nostre description, vne onc-
ce: meslez le tout ensemble & en for-
mez vn linimēt, duquel oindrez les par-
ties tachettées de ladite poudre, d'autāt
qu'il est fort singulier à cet effect. Il est
fort propre aussi pour tirer l'empyreu-
me & l'ardeur de la partie bruslée.

*Autre médicament excellent pour
les plus aises.*

Pr. huile de lithargue demie once:
eau tirée des escreuices; deux drach;
baume fait du plomb; vne drach. eau
de nenuphar, trois drach. meslez le tout
ensemble, avec du beurre escrit cy de-
uant, & en vsez quatre ou cinq fois
le iour. Au reste, sur la fin, il sera bon
d'vser des vnguens qui s'ensuiuent, &
lesquels addoucissent fort le visage, &
l'embelissent.

Pr. vnguent citrin, deux onces: sperme de Baleine, vne drachme: huile rosat & de lis, de chacun demie once. meslez le tout.

*Autre pour le mesme effect &
meilleur.*

Pr. de la pomade, deux onces: mucilage de semence de psyllium tirée avec l'eau rose, vne once: camphre, vn scrupule: huile d'amandes douces, demie once: meslez & en vsez trois ou quatre fois le iour.

Et pour les cicatrices enleuées & rouges, il faudra vser du medicament fait comme s'ensuit.

Pr. huile de litarge, deux drach. huile de tartre, & baume de pomb, de chacun vne drach. camphre, vn scrupule: sperme de Balaine, vne drach. huile d'œufs, deux onces. Meslez le tout & en vsez.

L'huile de Talcy est fort excellent, duquel les plus riches pourront vser.

Si d'auenture à cause de l'os osté, les bords de la playe se retirent & deuiennent durs & calleux, ce qui empesche que la cicatrice ne se face, il faudra

auoir recours à ce que i'en escriray particulièrement cy apres. Et cecy suffira quant aux playes faites en la teste, avec fracture.

Dee Arcbusades avec fracture des os, des bras, des cuisses, & des iambes.

CHAP. III.

AVreste, ces playes avec fracture aduiennent souuent aux bras, aux cuisses, & aux iambes: tant à cause que ces os, comme estans des plus grands, sont rencontrez plustost par la bale, que pour ce que ces parties sont desnüées le plus souuent d'armure, qui resisteroit à la violēce du coup, qui par ce moyen brise plus facilement tout ce qu'il rencontre. Quand dōcques quelqu'un se presentera à nous, blessé en quelqu'une de ces parties avec fracture, ou brisement d'os, il faudra diligemment obseruer avec le doigt ou avec la sonde, en quelle façon l'os sera brisé: principalement si le coup est receu à l'auant bras, ou en la cuisse, d'autāt que

les playes faites en ces endroits, avec rupture totale de l'os, sont fort dangereuses, offensans par l'estension les muscles; & les parties nerveuses, & induisant par conséquent grandes inflammations, douleurs, & conuulsions, & autres grâds symptomes: d'où bien souuent la mort s'en ensuit, si on n'y remédie promptement. Or les moyens pour ce faire sont deux, l'un deplorable, mais toutefois necessaire pour conseruer le reste du corps, à sçauoir le retrenchement de la partie, lors qu'elle est tellement brisée, qu'il n'y a aucune esperance de guerison. Ce qui ne doit neantmoins passer par le iugement d'un ras de gens qui s'attribuent le nom de Chirurges, quand ils sçauent deschirer, inciser, couper, ou plustost bourreler en mille façons les corps des personnes: & qui n'ont pour tous remedes qu'une sie, quelques cauterres, & une assurance & hardiesse qu'ils appellent, laquelle i'estime trop dangereuse, quand elle n'est conioincte avec la prudence & entier iugement, ainsi qu'à la verité i'en ay veu aduenir bien souuent d'estranges effects.

fe&s. Mais quand la grandeur du mal aura esté bien considérée, & d'impossibilité de pouuoir iamais restituer la partie en son premier estat par autres reme- des, cela induira à bon droict ceux qui sont munis de bonne raison, discretion & certaine experience à passer outre, deuant mesme que l'inflâmentation & autres symptomes y suruiennent, & d'extirper le membre, s'il se peut faire, pour conseruer la vie, après auoir fait les protestations à ce necessaires. Et ne faut douter, quand les os de la cuisse & de l'auant-bras seront tous brisez (comme il peut aduenir par les coups de poictri- nals & mousquets) & ce avec vne grande dilaceration des muscles, des nerfs, & autres parties, d'où les subites cōuul- sions, les inflammations, gangrenes, & la mortification totale peuuent s'ensui- ure, que la diligence ne soit autant re- quise au retranchement, que le danger est eminent. Car si entre les Anciens Medecins, les vns defendoient de met- tre aucunement la main à la fracture de ces os : les autres commandoient de re- trancher la partie totalement, mesme

*Voyez
ce qu'es-
crit P.
Æg. de
Hippoc.
en son
liure 6.
ch. 7.
Cor. Cel.
en sō li.
8. ch. 10.*

les os ne faifans que sortir quelque peu dehors , que diroient-ils aujourd'huy, fils voyoient les brisemens eſtranges qui aduiennent par la malheureuſe inuention de ces inſtrumens diaboliques, aufquels on en adiouſte de iour en iour, afin qu'il n'y ayt plus ny armure pour reſiſter, ny medicament qui y puiſſe remedier? Or quant à ce remede deplorable, à ſçauoir à l'extirpatiō, i'en parleray au chapitre de la gangrene, & ſphacelle : car il faut maintenāt que ie vienne à l'autre moyen plus vtile, lequel on recherche par l'operation manuelle, & par les remedes, & qu'on doit tenter iuſqu'à l'extremité, ainſi que deſ-ja ie l'ay touché au commencement de ce Traité des fractures. Or pour cet eſſect, les Chirurgiens ordinairement ſe propoſent double intention : l'vne qui a eſgard à la fracture, & qui commande de remettre les grandes pieces des os brifez en leur place le mieux que faire ſe pourra, & eſtans remis les y retenir avec des comprefſes & bandages à ce appropriez , trempez & munis de medicaments neceſſaires, pour preuoir aux ac-

eidents qui y pourroient suruenir, & y
 adiouter en fin les attelles, que certains
 approuuent, dès le premier appareil,
 pour rendre la liaison plus ferme : la-
 quelle ils ne desfont entierement, mais
 la ferment, ou la laschent, suivant l'exi-
 gence du cas, iusqu'au quaratième iour,
 si ce n'est à cause de la demangeson, de
 l'inflammation, douleur, & autres acci-
 dens, auxquels neantmoins ils taschent
 de remedier par vn bon regime, par la
 mission du sang reuulsue, par la pur-
 gation, & par les medicamêts topiques
 qui y sont propres. L'autre intention a
 esgard à la playe, qui defend qu'elle ne
 soit bouchée par les bandages de ladite
 fracture, d'autant qu'elle requiert d'e-
 stre pensée bien souuent, afin que les
 excrements, & que les choses estranges,
 que nature reiette, puissent auoir issuë.
 Et pour cet effect, les vns appliquent les
 setons incontinent, si on les peut passer
 par la playe, lesquels ils oignent avec
 des medicamens cōuenables: les autres
 se contentent de l'vsage des tentes, &
 amplifient les orifices de la playe, s'il est
 besoin, & principalement l'inferieur,

à fin d'en faire sortir tant plus aisément tout ce qui y est superflu & inutile, & que par ce moyen lefdites playes soient rendues plus traittables: lesquelles tentes ils appetissent, à mesure que la playe se remplit de chair: vñs au reste des remedes propres pour les arcbusades; qui sont avec fracture, desquels nous auons desia parlé en nostre premier traité. Et ont seulement cet esgard pour leur derniere intention, d'ordonner durant le temps que le pore sarcoide se fait, des viandes de bonne nourriture, & d'une substance glutineuse, principalement la playe estant en bonne disposition, pour aduancer la totale consolidation desdits os. Or voila comme les communs praticiens d'aujourd'huy procedent en la cure de ces playes avec fracture: ce que ie ne pourrois que biẽ approquer (veu qu'ils s'accordent avec tant d'excellens personnages, qui vsent de cette procedure) si l'experience ne m'auoit fait voir à l'œil plusieurs fois les inconueniens qui s'ensuiuent, par le moyen desdits attelles & liaisons fortes, qui induisent le plus souuent les

symptomes, comme les douleurs, les inflammations, & les phlegmōs, auxquels ces playes sont plus suiettes. Et empeschent d'auantage l'exhalation des humeurs qui y abondent, & suffoquent le plus souuent la chaleur naturelle, & empeschent mesme la cognoissance de si grands symptomes, & gardent qu'on n'y puisse remedier, comme il seroit necessaire: si ce n'est bien tard, quand on est contrainct le plus souuent, de desfaire tous ces bandages circulaires & obliques, lors que les susdits accidens auront pris si grande possession à la lōgue, qu'à grand peine pourrōt-ils estre domtez par les remedes, comme ils eussent esté, si on y eust donné ordre de bonne heure. Voulant inferer par ces choses, que les ligatures communes aux fractures sans playe, ne peuuent estre faictes sans danger, principalement aux playes des arquebusades, bien qu'elles soient jointes avec fracture, pour les raisons susdites: à quoy le Chirurgiē doit prendre vne soigneuse garde, pour ne rien faire imprudemment, & dequoy il se puisse (mais trop tard) repentir. Trou-

uant bon quant au reste, qu'on remette les os en leur place dès le commencement, & deuât que l'inflammation possède le membre (sans auoir esgard ny au venin ny à la brulure qui n'insinuent rien pour cet effect) & qu'on le mette en sa deuë figure, & en celle qui le tourmentera le moins, & qu'on vse des vrais remedes qui pourront seruir à l'vne & à l'autre affection, à sçauoir à la playe & à la fracture. Et d'autant que i'ay veu pratiquer cela fort heureusement, & en Allemagne, & aux autres lieux où i'ay voyagé, par de grands personnages & bien experimentez, ie n'ay voulu taire leur maniere de proceder en telles maladies. Laquelle, comme i'estime, peut estre aussi cōuenable aux arquebusades, veu qu'ils ne reprouuēt pour autre raison ces ligatures fortes & communes aux playes avec fracture, si ce n'est à cause des douleurs, inflammations, & gangrenes qui s'en ensuiuent, auxquelles lesdites arquebusades sont plus suiettes, que toutes autres. Apres doncques que les os auront esté remis en leur place, & la partie sera bien située, & la playe pen-

fée, comme il est requis, il faudra estendre le cerat qui s'ésuit sur du linge (trépé dans vn oxyrhodin fait de vinaigre rosat, & huile rosat, ou pour le mieux d'huile de guy de pommier) & l'appliquer sur la partie blessée, d'autant qu'il sert beaucoup à toutes fractures.

Pr. résine, cire, de chacun vne liure: poudre de til, trois onces: suc de geranium, quatre onces. Cuisez le tout en forme de cerat: vous l'appliquerez sur la partie rompue avec la ligature ordinaire des playes pour le faire tenir avec tout l'apprest.

Autre duquel i' vse fort heureusement.

Pr. la gomme extraite de la confire, & du guy de pommier, & du fruiet de peuplier, de chacun quatre onces: du suc de geranium, six onces: de la pierre sablonneuse du Rhin, ou en defaut d'icelle de l'argille ou du bol, trois onces: de la poudre de l'escorche du til, deux onces: vingt moyeux d'œufs, terebéthine, demie liure: huile de vers de terre, trois onces. Cuisez le tout bien meslé ensemble iusques à la cōsistence de ce-

*Remede
de cata-
gmatic
de Du
chesne.*

rat, qui sera fort propre pour les playes avec fracture, & pour empescher la douleur, l'inflammation & autres symptomes. Il le faudra remuer de vingt-quatre heures en vingt-quatre heures, pour les premiers appareils, & vous verrez en peu de iours vn merueilleux effect, quant à la consolidation de la fracture. Cependant il faudra appliquer dans la playe & aux enuirs d'icelle des remedes conuenables & defensifs, desquels nous auons desia traitté: & les compresses & bandages serōt trempez dans l'oxyrhodin, cōme on vse ordinairement aux playes. Or il faudra tousiours auoir cet esgard de bien situer la partie, & l'enuelopper d'une lame de plomb, repliée en forme d'un arc, & selon qu'il sera de besoin, ou bien de cuir bouilly, où des coutroyes seront attachées pour mieux tenir les os fermes, qu'on aura ioincts auparauant, & lesquels il ne faudra esbrâsser de leur lieu, que le moins que faire se pourra, lors qu'on pensera le malade, & qu'on desfera lesdits bandages. Cependant, qu'on vse des potions vulneraires fort propres à

cet effect, & par lesquelles i'ay veu guerir des fractures, apres que les os auoiēt esté seulement remis en leur place. Ce que sur tout i'ay veu pratiquer en Allemagne, où les habitans de Reystat, près du Rhin, ont eu la cognoissance d'une pierre qu'on trouue aux enuiron de leur ville, qu'ils appellent, à cause de sō effect, Beinbruch, de laquelle ils donnent vne drachme avec du vin rouge, dans lequel on aura premierement fait tréper de la peruenche, & ce par quatre ou cinq matins : par ce moyen ils ostent les douleurs, & les grieux symptomes, & guérissent les fractures dans quatre ou cinq iours, au grand estonnement d'un chacun : ce que ie peux asseurer pour l'auoir veu experimenter. Dequoy aussi Mathiole fait mention en ses commentaires. Ils vsēt aussi de ladite pierre meslée en forme de cataplasme avec du geraniū pilé, & de l'huile d'oliue ou rosat, avec si heureux succez que sans que quelque inflāmatiō ou douleur suruiēne à la partie, l'vniō des os se fait. Ce qui sēbleroit incroyable, si mille ne le pouuoient tesmoigner avec moy. Qui me

*An 5.
lin. cha.
109.*

meut aussi de croire que ce medicamēt ne peut estre que tres-vtile pour les coups des arquebuses faits avec fracture. Car c'est gagner plus de la moitié de sa cause, que de guerir les os brisez si facilement, & en si peu de tēps, sans provoquer aucun symptomes : & sans que cela nous empesche aucunement de traiter la playe d'arquebuse, comme contuse, & comme il appartient : nous ouurant plustost vn chemin de parfaite guerison, bref & incōparable, pour le soulagement du malade. Mais d'autant qu'on ne trouue par tout de ceste pierre à propos, de laquelle toutefois les Apoticares deuroient faire provision, plustost que de tant d'autres choses, qui ne seruent que de parade dans leurs boutiques : on vsera de la potion propre pour les playes avec fracture, laquelle ie descriray au chapitre des potions vulneraires, d'autant que i'en ay veu de merueilleux effects. Cependant il sera bō d'vser de mon Catagmatic qui y est fort propre, auquel on adiousterā (lors qu'on ne craindra plus l'inflammation) de la gomme, ou du ius

d'aristologie, de la serpentinaire, du borras & du crocus Martis, pour endurcir le cal, & fortifier la partie. Que s'il y auoit quelques petites pieces d'os, qu'il fallust reietter, qu'on se serue avec la syringue de l'iniectiō qui s'ensuit: dans laquelle aussi on trempera les tentes, & plumaceaux.

Pr. suc d'aristologie, de serpentinaire, d'iris, de peruenche, de chacun quatre onces: vin blanc, six onces: eau de vie, trois onces: myrrhe, sarcocolle, mastic, bois de guayac raclé, de chacun vne once: aloës hepatic, mumiē, de chacun demie once: girofles, vne drachme. Le tout soit mis à circuler dans vn alambic par quatre iours au bain Marie, ou bien qu'il boüille iusques à la consommation de la troisieme partie. Le tout soit coulé, & gardé pour en vser en temps & lieu avec la syringue ou bien autrement, ainsi qu'il sera besoin. Ceste iniectiō outre ce qu'elle est excellente pour les os, elle nettoye aussi fort bien la playe, & la remplit de chair, & est fort conuenable pour aduancer la totale guerison. Que si d'auenture l'os se vient

*Iniectiō
pour les
fra-
gments
des os.*

à alterer & carier (comme il aduiét souvent à cause de l'air qui entre par la playe, & qui est fort nuisible aux fractures) il faudra vser du remede qui s'esuit, combien que cestuy-la que nous auons escrit cy dessus, y soit fort conuenable.

Pr. huile de myrrhe distillé *per descensum* & purifié par l'eau de vie, demie once: huile de girofles, deux drach. huile du souffre distillé avec le colchotar, vne drach. & demie. Meslez le tout, & quand vous en voudrez vser, touchez seulement deux ou trois fois vostre os carié avec du cotton trempé dedans ce médicament, qui sera attaché au bout de vostre esprouvette, & l'os s'exfoliera, & ce qui est gasté tombera en bref.

Ou bien.
Pr. huile de tartre, ou lie de vin seche, distillée par la cornuë: huile de guaiac, de chacun demie once: huile de souphre & de vitriol, de chacun vne drach. meslez le tout, & faites comme dessus.

Ou.
Pr. du baume de mercure, demie on-

ce: huile d'antimoine, trois drach. sel de plomb, deux drach. mēsez le tout. Il ne se peut desirer vn medicament plus excellent pour cette intention. Il guerit aussi tous les vlceres malins & desesperez. Cependant vous mettrez cet emplastre sur la playe & aux enuiron d'icelle, lequel est fort propre pour attirer les os corrompus, & aduance aussi la totale consōlidaion de ladite playe.

Pr. huile de guy de pommier, trois onces: huile de laurier, deux onces: litharge, mastic, myrrhe, de chacun vne once: mumie, & de la pierre Calaminaire, de chacun deux drach. terebenthine, deux onces: cirē, vne liure. le tout mis au feu, soit fait en forme d'emplastre.

Au reste, si vous attendez d'auenture quelque fragmēt d'os, qui doīue sortir, & que l'orifice de la playe s'amoindrisse par trop, & se ferme, vous l'agrandirez avec des rentes faites de gentiane, ou d'esponge preparée, pour euitter la douleur & l'inflāmaion, quād il le faudroit faire sortir par force: vo⁹ n'y épargnerez aussi l'operation de la main, cōme l'incisiō, la raclure de l'os carié avec

des ferremens conuenables, & meſme le cautere actuel pour le dernier & extreme remede.

Des Arquebuſades qui trauerſent les autres parties du corps ſans fracture.

CHAP. IIII.

MAIS aduenant que le coup ſoit donné au trauers du corps, ou bien de la poictrine, ou du ventre inferieur, il faudra regarder ſi la playe entre dans la cavit  , & entrant ſi elle offense quelque principale partie, afin d'en faire le pronostic requis, ſuiuant ce que nous en auons dit au chap. des ſignes & iugemens. Car ſi elle ne penetre point, elle ne requiert autre procedure pour eſtre traitt  e, que celle de laquelle nous auons deſia parl   en general: que ſi le contraire aduient, il y a quelques particularitez dignes d'eſtre obſeru  es. Car ſi la bale donnant dans la poictrine n'a point paſſ   outre, vous taſcherez de la mettre hors, comme toutes autres choſes qui ſeront

estranges: & mesme il faudra sur tout
 prēdre garde s'il y a du sãg qui soit cou-
 lē dans la capacitē, lequel il faudra fai-
 re sortir tant en accommodant le mala-
 de en la facon propre pour cet effect,
 que par tous autres moyens à ce ne-
 cessaires, & conuenables: amplifiant
 l'orifice de la playe, & le laissant ouuert
 quelque temps quand il en seroit de be-
 soin, à fin de luy donner issuē plus faci-
 le: & ce pour preuoir aux grands incon-
 ueniens qui suruiendroient par vne tel-
 le retention, à laquelle ces playes en
 particulier sont suiettes. Or en ce cas
 les potions vulneraires seruent de beau-
 coup: car elles pourront dissoudre le
 sang caillé, & mesme empescher qu'il
 n'aduienne: desquelles vous en baille-
 rez au patient dēs le premier iour, soir
 & matin, comme vous le pourrez veoir
 cy apres au chapitre des potions vulne-
 raires. Quand au reste, vous poursui-
 urez la cure avec les mesmes moyens &
 remedes requis pour les autres arcbu-
 sades: obseruant seulement vne chose,
 que les medicaments ne pouuans estre
 portez iusques au fōd de la playe pour

faire leur operation, si ce n'est en forme liquide, il faudra diuersifier leur forme, & vser d'iniections propres pour chacune intétion qui sera requise, lesquelles vous preparerez des medicaments que desia i'ay enseignez en nostre premier Traitté. Lesdites iniections se font avec les syringues, que ie trouue plus propres que tous les autres instrumēt, d'autāt qu'elles attirent derechef à soy ce qu'elles aurōt ietté, ainsi qu'il est expedient de le faire. Vous lierez les tentes avec vn filet, lesquelles vous mettrez dans ladite playe, qui seront d'une longueur conuenable pour entretenir tousiours l'orifice ouuert, afin que l'interieur ayant esté biē purgé & mōdié, il se remplisse de chair, deuant que le reste se ferme, ce qui empescheroit l'issuë de la pourriture. Vous fuirez en pēsant vostre blessé, l'air froid, qui luy est fort nuisible. S'il y a ouuerture des deux costez, vous mettrez vne tente en tous les deux, & entretiendrez plus longuement l'orifice ouuert, par lequel la pourriture pourra auoir pl^s facile issuë. Que si quelque callosité y suruient, vous au-

rez recours à ce que i'en escry cy apres. Quant au regime, il sera tel que celuy des autres playes, à sçauoir froid, sec, & tenu: il est vray qu'il se faudra garder des viandes aigres & astringentes, mesme dès le commencement: d'autant qu'elles esmeuuent la toux & sōt cōtraires à la courte haleine, de laquelle les patiens sont tousiours tourmentez en ces playes: au cōtraire les choses pectoriques y sont fort conuenables, comme les figues, les raisins, l'orge mondé, & semblables. La mission du sang est fort requise, comme aussi l'euacuation par clysteres & par autres medicaments, quand le corps est cacochyme. Au reste vous aurez les mesmes considerations pour les playes du vêtre inferieur, que des susdites, desquelles la cure n'est differēte de la generale des autres arc-busades: si ce n'est que les potions vulneraires leur sont plus requises, d'auar qu'elles monstrent mieux leur efficace & vertu en ces parties, où elles paruiēnent, qu'aux autres: lesquelles potions il faudra composer suiuant les intentions requises, & y adiouster tant plus

de corroborans, quand quelque partie de la nutrition, cōme le foye, ou la rate, sera offensée, laquelle il faudra fortifier par fomentations exterieures. On pense aussi ces playes avec des clysteres cōuenables, quand elles sont vers les parties plus basses. Que si elles passent au trauers, & blessent l'os de l'espine, vous vserez des medicaments que i'ay descrit pour les playes de la teste, & en ferez vn mesme iugemēt (s'il aduenoit que la moëlle sortist de l'espine) que des autres. Or d'autant qu'il aduiant souuent que les coups sont donnez du haut en bas, & lesquels penetrent si auant dans quelque partie sans que la bale sorte, tellement que la pourriture ne peuta uoir issue: il faudra lors aduiser si vous pourrez sans danger faire vne contre-ouuerture plus bas. Ce que ferez plus aisement recontrant la bale avec les doigts, laquelle vous tirerez par mesme moyen plus facilement, cōme nous l'auōs desia dit, parlans de l'extraction des choses exterieures. Or s'il aduiant que cela ne se puisse faire, vous vserez de plus fortes compressees & li-

gatures, afin que par ce moyen la pourriture sorte plus aisément eſtât comprimée vers la partie ſuperieure. Les iniections ſont fort conuenables pour ces playes ſinueuſes, d'autant que les autres medicaments ne peuuent eſtre portez iuſqu'au fond d'icelles. Et faudra aduiſer d'y laiſſer le moins que pourrez, d'icelles, mais les retirer avec la meſme ſyringue, de laquelle vous aurez fait l'iniection. Les tentes d'eſponges preparées ſont fort bonnes en telles playes, d'autant qu'elles attirent & ſ'emboiuent de la pourriture, & deſſechent d'autre part la playe. Et d'autant que bien ſouuent les bords de ladite playe ſe rendent durs & calleux (ce qui empeſche la totale conſolidation) vous vſerez des remedes qui ſ'enſuiuent, propres pour cet effect, & pour la guerison de toutes fiſtules, ſans l'application du fer, qui eſt l'extreſme remede des Chirurgiens communs.

Vnguent pour les calloſitez, ou pour les fiſtules.

Pr. huile de miel diſtillé par expreſſion de feu, deux onces: huile de plomb

& de mercure sublimé, de chacun vne drach. huile de petrole & de girofles, de chacun vne drachme & demie. meslez tout avec de la terebenthine en forme de liniment, duquel vous oindrez les tentes qui toucheront la callosité.

Huile pour cet effect.

Pr. Antimoine cru, trois onces: mercure sublimé, vne once & demie: miel cru, six onces. le tout meslé soit mis dās vne cornuë à distiller à feu mediocre, selon l'art. Il en sortira huile fort excellent pour guerir tous vlceres calleux & malins: sera bon aussi pour les fistules, les chancres & gangrenes.

Pour subuenir aux symptomes.

C H A P. V.

L E S Medecins accordent franchement, qu'il faut sur tout subuenir diligemment aux grands symptomes, laissant mesme la cure du mal, d'autant qu'ils dissipent par trop les forces & la vertu du malade. Et pource

aussi on les guerit premierement, non pas en ce qu'ils sont considerez simplement: mais bien comme estans cause, ou que les forces se dissipent & diminuent (à quoy il faut principalement auoir esgard) ou que quelque plus grande maladie ne suruienne. Car d'autant que la douleur vehemente, l'inflammation, le phlegmon, la fièvre, la conuulsion, la paralytie, la gangrene, le sphacelle sont symptomes tres mauuais & dangereux, lesquels accompagnent communément ces playes, ils doiuent estre appeaisez & ostez, toutes autres choses delaissees, par ce (comme i'ay desia dit) qu'ils amoindrissent les forces, & peuvent engédrrer des maladies plus extremes. Or alors, il faut changer de methode, & auoir recours à d'autres indications, que celles que la simple playe nous insinüe, de peur que par la violence dangereuse desdits symptomes le malade ne meure, ou pour le moins ne soit tourmenté plus cruellement. Et faudra commencer la cure par le symptome le plus dangereux, à la guérison duquel le Medecin doit employer toutes

ses forces. Car ces playes ne pourront iamais estre entierement gueries, si premieremēt les symptomes ne sont ostez. Partant i'ay estimé estre conuenable de traiter de la curation d'vn chacun d'iceux à part, & escrire les remedes qui me semblent leur estre les plus propres; & ce par le meilleur ordre & le plus methodiquement qu'il me sera possible.

De la douleur.

On appaise la douleur, ou par médicaments anodins & paregoriques, qui sont temperez & fort approchans de nostre température, ou par d'autres chaus au premier degré, & de substance subtile, & ce par fomentations & linimens. Les fomentations se font de la decoction des racines de guimauues, d'une teste de mouton, des mauues, des fleurs de bouillon blanc, de chamomille, de melilot, de semences de lin, fenegré meslez & cuits avec du lait. Mais les linimens se composent des mucilages de la semence de l'herbe à puces, fenegré, lin & de guimauues, de beurre, de graisses de chappon, & de res-

fon, d'œſſype, & d'huile de guy de pommier.

Les narcotiques auffi appaiſent les douleurs, d'autant qu'ils oſtent le ſentiment à la partie, & la rendent aſſoupie, tellement que la cauſe vrgente de la douleur ne ſ'apperçoit nullement. On en vſe lors qu'une trop grãde douleur diſſipe les forces, & nous menace de quelque ſyncope, ou deſaillance de cœur, prouenant d'une trop grande inflammation.

Pr. racine de iuſquiame & de liſ de eſtang, de chacun demie liure: mettez les infuſer & confire dans du vinaigre roſat, & huile de liſ d'eſtang, les expoſant par quelques iours au ſoleil: puis les eſpreignez, & de ce qui ſera coulé, vous en eſtuerez (eſtât vn peu chaud) la partie offenſée.

En apres vous oindrez du liniment qui ſ'enſuit.

Pr. du ſuc des fueilles de iuſquiame, & de ioubarde, de chac. deux onces: de l'huile de guy de pommier, & de liſ d'eſtang, de chac. vne once & demie: du beurre frais, deux onces: de la cire neu-

ue, vne once. meslez le tout, & en faites liniment.

Cependant le Medecin doit sur tout estre soigneux d'appaiser les douleurs au plustost que faire se pourra : car elles signifient tousiours quelque chose de mauuais. Ce qui suffira pour le present, touchant la douleur, d'autant que nous auons desia par cy deuant declaré plusieurs remedes pour cette intention.

De l'intemperie.

S'il y a quelque inflammation en la partie offensée, ce qui se cognoistra aisément par la douleur & eleuation des vessies, il la faut rafraeschir avec l'vnguent nutritif, ou avec le blanc de Rasis, auquel on aura adiousté du camphre, ou avec l'vnguent dit Populeum, ou avec celuy qui s'ensuit,

P. fucs de plâtain, morelle, & ioubarbe, de ch. vne once: bol armenië, demie once: litarge lauée avec eau de plantain, & tuthie preparée, de cha. vne once: huile rosat omphacin, & de lis d'estag, de ch. deux onc. vinaigre rosat, & cire, de c. vn peu. soit formé en vnguet.

Au reste si l'intemperie est froide (ce

que la mollesse de la partie monstrera) il la faut corriger avec quelque fomentation faite avec du vin, dans lequel on aura fait boüillir de l'anet, de la semence de lin, & des fleurs de chamomille, & de romarin. Desquelles choses on pourra aussi faire vn cataplasme.

Quât au flux de sang ie n'en fay nulle mention; d'autant que i'en ay parlé cy dessus bien amplement.

De la fièvre.

Il faut obuier dès le commencement, que la fièvre n'entreuienne, & l'empescher par vne maniere de viure cōuenable, & tenuë & refrigerente, par l'ouuerture de la veine, & par medicamēts qui purgēt les humeurs mauuaisēs, qui abondent. Que si le mal estant en vigueur (comme il est aduenü maintefois deuāt mes yeux) la fièvre saisit les blefsez, il faudra cuire les humeurs par quelque apozeme bien propre, & encore derechef les purger. A quoy le Medecin doit mettre tout soin & diligence, & aider le malade en toutes façons, de peur que la mort ne s'en ensuiue, causée par la grandeur du mal.

Tous les Medecins sont d'accord, que la conuulsion se fait en trois façons : c'est à sçauoir par inanition (qui aduient, tât à cause des grandes & superflues euacuations, que par l'haimorrhagie immodérée) laquelle selon Hippocr. Aphor. 3. liu. 5. est dangereuse. Secondement elle aduient par repletion à cause des tumeurs contre nature qui aduiennent en ces playes, & lesquelles se passent soudainement : ou bien par vne extreme froidure qui reserre les nerfs & les remplit, ce qu'Hippocr. a remarqué en son liure 5. Aphor. 17. Tiercement elle se fait par consentement, le cerueau estant offensé, à raison de la douleur, lors que ou quelque nerf a esté piqué, ou quand les humeurs acres, mordicantes & venimeuses changent & corrompent leur nature : d'où aussi selõ Hippo. naissent de grandes douleurs, desquelles par la force du sentiment, la cõuulsion se fait. Or pour guerir vne conuulsion causée par vne inanition, il faut premierement ordonner vne maniere de viure humectante, nourrir le mala-

*De la
cõuulsio
par in-
anition.*

de de laiēt d'amande, & d'orge mondé, ou de quelque bouillon propre. Luy faire vn bain cōposé de quelques humectāts & lenitifs, cōme sont les sommittez du bouillon blāc, la racine de guimaues & les fueilles des mauues, violettes, & guy de pōmier, auquel le malade entrera, si la playe n'y dōne empeschemēt, ou au moins la partie blessée en soit fomentée. Apres il faudra l'oindre d'huile de guy de pōmier, & de violettes, ou de quelque vnguent fait des susdites choses. Mais d'autant que ce mal est incurable, lors qu'il est enraciné & ioinēt avec vne siccité des nerfs selon Galiē au liure septiesme de sa Metho. il faudra auoir recours à des medicamēts plus excellēts, cōme à la taincture de l'or, & à celle du baume naturel: car s'il y a quelque esperance de guerison, elle gist en ces deux remedes. Que si la *De la* conuulsion se fait par la plenitude, il la *conuul-* faudra guerir principalement durant *son par* les premiers iours avec vne maniere *repletiō.* de viure tenuē, exsiccatīue & eschaufante: & faudra euter sur tout l'vsage du vin, d'autant qu'il esmeut les deflu-

xiōs, & est nuisible aux parties nerueuses: mais en lieu du vin, on pourra presenter de l'hydromel, ou de l'eau de canelle. Aprescela on y dōnera ordre par les euacuations conuenables, cōme par la seignée & par la purgation vniuerselle: en partie aussi en attirant de la partie qui endure conuulsion: ce qui se fera par les vnguens dits d'Agrippa, Aregon, & Martial, par les huiles de castorée, de renard, de laurier, & semblables: desquels (le corps ayant esté bien purgé) il faudra oindre le col, & toute l'espine du dos, & la partie blessée. Mais les remedes suiuaus me semblent plus propres.

Pr. graisse de cerf, de tesson, d'ours, de chacun vne once: huile laurin, vne once & demie: huile de renard, de castorée, de terebenthine, de geneure, de vers de terre, de chac. demie once: de l'vnguent d'Agrippa & Dialth. de cha. deux onces: terebenthine lauée avec eau de lis blancs, vne once, d'euphorbe, vn scrupul. & avec vn peu de cire vous en ferez vn vnguent.

Pr. resine, poix de nauires, de chacun

vne once: colophone, & cire neuue, de chacun deux onces: encens masse, mastic, & ceruse, de chac. demie once: sel nitre, sang de dragõ, terebẽthine, huile rosat, sel ammoniac, huile de iaunes d'œufs, de cha. deux drach. camphre, vne drach. de la mere-perle, vne once: ambre iaune, vne drachme & demie: de la pierre d'aimant, demie onc. vitriol blac, deux drach. Reduisez le tout en forme d'emplastre selon l'art. On

Pr. du baume de la gomme elemi, & de lierre: de cha. deux onces: huiles de cire, de terebenthine, & de geneure, distillez à la maniere Chymique, de chac. demie once: huile de girofles, & de bẽioin; de cha. deux scrup. Mettez le tout en forme de liniment, duquel vous oindrez l'espine. du dos, & la partie malade: On

Pr. du baume de guy de pommier, de lierre, & de mille-pertuis, de chacun deux onces: huiles de sauge & de terebenthine, de chac. vne once: huile de geneure, demie once: huile puant tiré de tartre, trois drach. graisse de tesson, trois onces. Meslez le tout, & en vsez,

comme il a esté dit.

Cependant qu'il prenne par le dedans les medicaments suiuans.

Pr. eau de grand muguet, & de genre, de chacun vne once: huile d'ambre iaune, demy scrupul. meslez les & en faites vne potion: Ou

Pr. eau de canelle, & de fleurs de tillet, de chacun vne once: huile de genre, tiré par l'ebullition de l'eau, quatre gouttes. faites vostre potion.

*De la
conuul-
sion par
consen-
tement.*

Mais si la conuulsion, esmeuë par la sympathie, se fait à cause de la douleur, il la faudra seder par les remedes escrits au chap. de la douleur. Et quand elle est causée par l'acrimonie & vitulence du venin, ce qui aduient aussi le plus souvent, qu'on se serue des choses que i'ay ordonnées pour les playes enuenimées. Que si elle aduient à cause de quelque pointure, ou incision de nerf, ainsi que ie l'ay veu aduenir quelquefois, non pas par le moyen du coup premieremēt receu, qui froisse plustost & meurtrit les nerfs qu'il ne les point: mais biē par l'insuffisance des Chirurgiens, qui se travaillent par trop avec grande incom-

modité à rechercher la bale, ou autres choses externes, & par leurs incisions offensent les nerfs bien souuent, d'où la conuulsion s'en ensuit, principalement s'ils rencontrent quelqu'un de ceux, qui paruiennent aux muscles, qui sont les instruments du mouuement volontaire. Lors pour subuenir à tel inconuenient, il faut vser des medicaments, lesquels estans d'une substance tenue puissent penetrer iusqu'aux extremités du nerf, ainsi que Galien nous admoneste, & qui digerent & apaisent, les douleurs: & au contraire, qu'on s'abstienne des astringens, des froids, & qui resserrent & empeschent la respiration. Ledit Galien reiette mesme l'usage de l'eau tiede en ce cas (combien qu'elle mitigue les autres phlegmons) comme estant contraire & ennemie aux nerfs vulnerez, leur substance estant faite d'une matiere humide, refrigerée & coagulée, qui est par consequent résolue & putrescée par des choses qui eschauffent & humectent tout ensemble, ainsi qu'il l'enseigne au 6. de sa Metho. cha. 2. Or i'ay allegué recy, d'autant que ie

souhaite qu'il serue d'aduertissement à ceux, qui vsent de ce remede indifferement pour la curation de ces playes. Voila pourquoy au cōtraire, il approuue les huiles de iasmin, & principalement celuy de sauinier, qui ne soit recent, comme remedes fort propres aux piqueures des nerfs. Il approuue aussi la terebēthine, avec laquelle il mesloit de l'euforbe, & de la resine: & au mesme liure, il estime que le soulfhrē vif seroit fort vtile à ces playes, d'autant qu'il est de parties fort tenues: mais les huiles de terebenthine, de resine, de cire, de soulfhre, & de sauinier, & semblables tirez par le moyen du feu, sont tant plus profitables, que par la distillation ils sont rédus d'vne substance plus tenuë, & par consequent ils dessechent mieux. Ce qui doit estre obserué, quād les nerfs sont naurez, selon Galien audit liure, parlant ainsi: La curation dudit nerf nauré demande des medicamēts, qui ayēt vne chaleur tiede & moderée, & qui dessechent bien fort, & ce sans faire douleur: & lesquels de la nature de leur substāce puissent attirer, & soiēt
de

de parties tenuës & subtiles, obseruant tousiours cela, à sçauoir d'appliquer les plus forts remedes aux corps robustes, & les plus doux aux corps imbecilles & debiles.

Il sera doncques conuenable d'vser des suiuan remedes fort propres pour la susdite affection.

Pr. huile de souphre tiré par le moyë de la terebenthine: huile de sauinier, & de terebenthine, de chac. deux drach. huile de iaune d'œufs, demie once. meslez le tout, & en appliquez sur la partie malade: *On*

Pr. huile de beurre, de resine, de cha. deux drachmes: huile d'euphorbe, distillé à la maniere Chymique, & huile des fruiëts de geneure, de cha. demie drach. huile de terebenthine, vne drac. & demie: huile de iaunes d'œufs, vne once. meslez le tout.

Mais si d'aduenture tous ces medicaments ne peuuent de rien profiter pour la cure de ladite cōuulsion, il faudra couper entieremēt le nerf nauré: selon l'aduis de Galien car lors'il n'y aura plus de crainte ny de danger, si ce

n'est que la partie en restera debile.

De la Paralyfie.

Il faut guerir la Paralyfie ou resolution des nerfs, laquelle aduient fort souvent en ces playes, & par medicaments pris par le dedās, & appliquez exterieurement comme par fomentations, cataplasmes, liniments, vnguens, & semblables choses. Les vns prisent fort les huiles de iasmin, de sauge, de castorée, de briques, de renard, & autres semblables. Mais le malade sera fort soulagé, s'il vse des remedes qui s'ensuiuent preparez à nostre façon.

Pr. de l'eau de grand muguet, & de fleurs de lauāde, de chac. 4. onces: de sucre, demie liure: faites les cuire iusques à ce que le seaux soient consommées, & que le sucre soit assez espez: puis les ayant retirés hors de dessus le feu, adioustez y de l'huile d'ambre iaune, distillé par le descens, & rectifié, vn scrup. & demy: de l'huile de canelle, & de l'essence de sauge, de cha. demy scrupule. faires en des tablettes selon l'art.

L'huile suiuant est approuué pour estre appliqué exterieurement sur le

lieu douloureux.

Pr. de l'huile de mille pertuis, vne li- *Huile*
 vre: de la terebenthine, demie liure: de *sonue-*
 l'huile laurin, quatre onces: de l'huile *rain cõ-*
 d'aspic, vne once & demie: fruiçts de *tre la*
 geneure, demie liure: de castorée, vne *paraly-*
 once: d'euphorbe, deux onces: girofles, *sie, &*
 macis, noix muscade, canelle, de chac. *nerfs re-*
 vne once & demie: fleurs de lauande, *tirez.*
 de fauge, & de grand muguet, de chac.
 deux poignées: mastic, myrrhe, encens,
 de chac. deux onces: mumie, vne once
 & demie: graisse de tesson, trois onces.
 mettez digerer le tout ensemble par vn
 mois sous le fien, puis les faites distiller
 en alambic de cuiure, selon l'art. Il fau-
 dra oindre avec cet huile les membres
 paralytiques & retirez. C'est vn reme-
 de fort souuerain.

De la defaillance de cœur.

La defaillâce de cœur n'est à mespri-
 ser, ains il y faut remedier bien prõpte-
 ment, comme à symptome bien grand
 & mortel, & auquel les blesez sont fort
 suiets, tant à cause de quelque grande
 effusion de sang qui en sera procedée,
 que pour la vehemençe de la douleur

qui les tourmente. Et pour cet effect, il est decent de remettre les esprits, & les forces abbatuës avec de bons aliments donnez en petite quantité & par interualle, comme avec des pressis, gelées, du vin, & avec les choles aromatiques. Les anciens prisoient fort les poudres cordiales faites de perles oriëntales, santal, camphre, de l'os du cœur du cerf, ambre, rasure d'ivoire, de fueilles d'or, & de petites pieces de pierres precieuses, lesquelles ils donnoient dās du vin, ou les mesloient avec quelque syrop à ce conuenable, ou bien avec quelque cōserue cordiale. Mais i'estime qu'il sera meilleur d'vser de la teinture de l'or, & de celle de couraux, ou des essences de toutes les pierres fufdites, comme ie l'ay desia monstré par raison en mon liure de la preparation des medicamēts minéraux: dās lequel mesme i'ay enseigné toute leur preparation, & pourtant il y faudra auoir recours pour cet effect.

De la gangrene & sphacele, ou totale mortification.

I'ay dit cy dessus qu'il aduient à ces playes diuers symptomes & infirmitiez,

entre lesquels toutesfois, il n'y en a de pire & plus déplorable que la gangrene d'autant qu'il est vn indice de corruption qui commence à se faire, laquelle prend son commencement selon Paulus, ou par ce qu'on n'oste l'inflammation, & qu'on ne la fait chager en apostume: ou selon les autres, quand par l'adondance des humeurs (ce qui aduient aux grandes inflammations, & par vne grande obstruction faite par les emplastiques, ainsi que ie l'ay démontré cy dessus, laquelle empesche la respiration, & par vne veneneuse & maligne qualité) la chaleur enclose dans la partie est esteinte & suffoquée; dequoy la sanie fort puante est vn tresgrand indice. A laquelle si on ne remédie soudainemēt, il est à craindre que la partie desia esteinte & morte par la corruptiō ne saisisse les parties prochaines, & se chage en vne mortificatiō qu'on appelle sphacele, ou fideratiō: laquelle on co-

*Signes
du Spha
cele.*

gnoist, lors que la partie est liuide, noirastre, enflée, molle, & pourrie, sans aucun battement des arteres, douleur ny sentiment, en telle façon qu'on y peut

planter la lancette bien auant, sans sentir aucune douleur. Or alors il faut couper entierement cette partie syderée, ou morte bien pres de la chair viue, & ce le plustost qu'on pourra, & guerir la gangrene hastiuement. Ce qui se fera si par le moyē de la lancette on fait escouler beaucoup de sang de la partie malade, en y appliquant des medicaments propres aux putrefactions, ainsi que l'escriit Paulus. Les Chirurgiēs cōmuns apres les scarifications & sections lauent la partie bleffée avec de l'eau salée, ou vinaigre salé. Les autres se seruent de l'vnguent *Ægyptiac*, duquel le Apōticaires sont tousiours fournis. Que si la force du mal n'est appaisée par ces medicaments, ils ont leur recours à des plus vehemens, comme aux caustiques, & qui font yne crouste, c'est à sçauoir aux *Trochisques d'Andrō*, & à l'arsenic, ou si la necessité le requiert, ils retréchant la partie corrópuē d'avec la seine, avec quelque ferrement. Au reste les suiuanz medicaments sont fort profitables aux gangrenes. Mais il sera plustost expedient de tirer avec la lan-

cette beaucoup de sang corrompu de la partie, sur tout le maladuenant par inflammation & abondance d'humeurs: & puis la lauer du lauemēt qui s'ensuit.

Pr. de la fuye de cheminée, quatre onc. du miel, deux onc. de fort bon vinaigre, vne liure: faites les cuire, iusques à ce que la moitié soit consummée: ou,

Pr. suc de reforts & d'esclaire, de chacun deux onces: huile de miel, demie once: du phlegme d'alun aigrēt, quatre onces: salpêtre, deux drachmes: sel de fuye de cheminée, vne drachme & demie. Faites en vostre lauemēt: ou,

Pr. du phlegme de vitriol, & d'alun, de cha. quatre onces: du vinaigre, deux onces: de la poudre de la racine d'aristolochie, vne once & demie: sel de tartre, vne once: myrthe, vne once & demie: camphre, demie once: faites bouillir le tout ensemble iusques à la cōsompction de la moitié, & en la lauez souvent la partie: ou,

Pr. du tartre calciné tant qu'il soit bien blanc, deux onces: cendre de coquilles d'œufs & de racines d'aristolochie, ou de farnens, de chac. vne once

& demie: salpêtre, camphre, de cha. demie once: phlegme de vitriol & d'alun, de chac. vne liure. faites bouillir le tout iusques à la consommation de la moitié, & faites en vn capitel, duquel vous vſerez comme deſſus: mais faudra premierement ſcarifier la partie, ſur laquelle puis apres on appliquera le cerat ſuiuant.

Pr. de la cire & poix de nauires, de chac. trois onces: liqueur de myrrhe, deux onces: colophone, vne once & demie: de l'huile de froment & d'œufs, de chac. demie once. faites voſtre cerat ſelon l'art: *On*

Pr. du miel, deux onces: du crocus Martis, & du crocus Veneris, de chac. demie once: poudre de myrrhe & d'ariſtoloche, ronde, de cha. deux drach. cāphe, drach. & demie: phlegme de vitriol aigret, quatre onces. cuiſez le tout en conſiſtence d'vnguent, & y adiouſtez du precipité, demie once. Vous en engraiſſerez les tentes & charpis: *On*

Pr. du beurre d'arſenic fixé, deux onces: mercure precipité, demie once:

huile de myrrhe, trois drach. Incorporez le tout avec du miel lauë aupara-
uant avec du suc d'esclaire.

Il ne se peut trouuer meilleur medi-
camēt, ou qui opere mieux que cestui-
cy pour la guerisō de la gāgrene, pour-
ueu qu'on aye osté premierement tout
le venin, & l'esprit malin, vilain, & puāt
de l'arsenic: ce qui se fera par sa fixatiō,
ainsi que ie l'enseigneray cy apres en
mon Antidotaire. Car autrement ie ne
puis approuuer l'opiniō de ceux-là, qui
sont d'aduis d'appliquer de l'arsenic nō
preparé pour la guerison de la gangre-
ne, puis que c'est vn medicament septi-
que & pourrissant: & lequel par sa qua-
lité maligne & venimeuse corrompt la
substāce de la chair qu'il aura touchée,
& la tourne en pourriture, laquelle
mesme est pire que celle qui est faite
par la gangrene. Et pourtāt (sauf l'hon-
neur de plusieurs) i'estime son vsage
tres-dāgereux, s'il n'est biē preparé, ain-
que desia ie l'ay dit cy dessus. Cependāt
il sera bon d'appliquer sur toute la par-
tie quelque cataplasme fait de farine de
lupins, de vesse noire, de lentilles, & de

feues, qu'on pourra cuire avec de l'oximel, ou avec le capitel décrit cy dessus. Que si on apperçoit que tous ces medicaments sont inutiles, & que la gangrene se change en sphacele, ce qui se cognoistra par les signes susdits, il faudra couper le membre ainsi mort iusques au vif le plustost qu'on pourra; en telle façon que rien ne demeure de la chair pourrie. Ce qu'aucuns executent sans faire aucune douleur avec vn filet d'alun de plume imbu d'huile de mercure sublimé, que les autres nomment eau infernale, l'y laissant par l'espace de vne ou de deux heures. Les autres vsent de la scie, y appliquans puis apres le fer rouge, d'autant que par ce moyen selon l'opinion de Galien au deuxiesme liure à Glaucus, ils arrestent le flux de sang incontinent, chassent la putrefaction, & fortifient la partie malade. Et apres que la pourriture est ostée, & que le sang ne coule plus, ils vsent de medicaments ostés la crouste, comme du Macedonic, de beurre, & semblables, & apres ils suivent la methode de guerir les vlcères communs. Cependat il ne faut oublier

la maniere propre de viure, à ſçauoir tenuë & refrigerante, ny la miſſion du ſang reuulſiue, ny les medicaments purifiants le ſang, ſi on eſtime qu'ils ſoient neceſſaires. Il faut auſſi donner au malade les choſes qui contre-gardent le cœur (qui eſt la fontaine de la vie) de cet eſprit pourry, puant, & malin, qui ſortira de la partie ſyderée & morte.

ANTIDOTAIRE
SPAGIRIQUE:

On

LA MANIERE DE PRE-
parer & composer les medicaments pro-
pres pour les Arquebusades.



EST à bon droit, que le poëte Comique pronôce cette sentence, laquelle est digne d'estre tousiours bië obseruée: à sçauoir qu'il n'y a, rië pl^e de raisonnable que l'hōme ignorât, lequel ne trouue rien bon que les choses qu'il fait, & desquelles seulemēt il a cognoissance. Ce que i'ay bien voulu mettre en auant, à cause d'un tas de gens qui sont si presomptueux, que d'oser mespriser par leurs escrits les remedes extraits des simples metalliques: lesquels toutesfois ont esté approuuez par les anciens Medecins, ainsi que nous l'auons suffisamment demonsté en nostre liure de la

preparation des medicaments: & de-
 quels aussi ils reprouuent l'vsage. Et fōc
 ces choses pour cette seule occasion: à
 sçauoir pour autant qu'ils ignorent (cō-
 me ils le confessent publiquemēt) leur
 vraye preparation spagirique. En quoy
 ils me font souuenir d'vne tref-belle sē-
 tence de Fabius: Que les arts seroient
 heureux, s'il n'y auoit que les sçauans,
 & bons ouuriers d'iceux, qui en don-
 nassent leur iugement. Qui fait que par
 le cōtraire l'on pourroit estimer cet art
 infortuné, veu que tant d'ignorans en
 osent dōner leur aduis si leger & teme-
 raire. Or quoy qu'il en soit, cetuy-cy a
 esté appellé par les bons & experts ou-
 uriers de deux mots Grecs Spagiriques:
 d'autant que par iceluy on tire, & puis
 on reserre & congele vne substāce plus
 subtile & spirituelle, en laquelle prin-
 cipalement gist la vertu & efficace du
 medicament. Ce qu'on experimentera
 beaucoup plus heureusement, ainsi que
 j'espere avec l'aide de Dieu, en la gueri-
 sō de ces playes, avec les huiles & autres
 preparations, tirées tant des simples
 vegetaux, que des animaux, & metalli-

ἀπὸ τοῦ
 αἵματος καὶ
 ἀγλυπέρου.

ques, que s'ils n'estoient preparez : & mesmement des essences, huiles, & autres preparatiōns du mercure, antimoine, souphre, vitriol, arsenic, plōb, litharge, & autres plustost que de leur terre, qui est comme morte, & de laquelle les effects ne peuuent estre si grās : dequoy toutesfois les Anciēns se sont seruis pour la cure des playes, & des vlceres, ainsi que leurs escrits en font foy. Que si ces Messieurs les enuieux me viennent dire, qu'il se faut cōtenter de ce que ceux là ont escrit, sās ainsi rechercher des preparatiōns nouuelles & incognuēs aux Apoticairez : l'vsage du mercure precipité, duquel n'aguerez ils se seruēt (oultre vne infinité d'autres medicaments) tāt propre à la guerison de ces playes, & de tous vlceres malins, sera suffisāt pour condamner leur ignorance, & abbatre leur caquet. Je pourrois aussi me seruir icy de l'autorité d'un Gesner, d'un Andernach, d'un Seuerin, tous grans & excellēs Medecins, & cognus assez par leurs escrits: qui tous ont approuuē ces preparatiōns, que telles personnes mesprisent: desquels toutesfois ils seroient

heureux d'estre simples escholiers. l'alleguerois d'auantage plusieurs autres doctes personnages tant d'Allemaigne que d'Italie, si ie ne pensois le renom & autorité de nos calomniateurs estre si petite : & d'autre-part, leurs escrits si friuoles & mal à propos, que chacū peut assez cognoistre leur insuffisance, & cōbien ils sont plustost propres à tracer vn coq à l'asne, que quelque chose profitable au public. Car quelle occasion y a il, que traittant de la cure des gouttes, de venir vsfer de longues inuectiues contre certains grans & excellens personnages, & de digressions touchant les trois principales, l'origine des metaux, & du suiet de la grāde œeuure? cōme si c'estoient deux choses biē accordātes, l'vne avec l'autre. Quāt aux remedes spagiriques qu'ils estimēt si pernicieux (& à quoy nous leur respondrōs biē tost, Dieu aidant, afin qu'ils ne chātēt le triōphe deuant la victoire) nous leur alleguerons qu'vn aueugle ne peut point iuger des couleurs : & que c'est mespriser les choses, desquelles ils n'ont aucune cognoissance, & s'auantager.

plus qu'on ne doit. Leurs escrits aussi pleins de calomnie portent suffisant tesmoignage contre eux, de quel esprit ils sont poussez à reietter ces preparacions Spagiriques: à sçauoir vne enuie ioincte avec vne extreme ignorance: ensuiuans en cela le Prouerbe qui dit, qu'il n'y a plus capital ennemy de la science que l'ignorant, Tellement que ie pourrois dire encore derechef avec Fabius, que bien heureux est l'art, duquel il n'y a que le bon artisan, & ouurier expert, qui en iuge. Et me semble que la façon de faire de telles gens est par trop differente de celle des anciens Philosophes: lesquels dès qu'ils entendoient qu'il y auoit en quelque partie du monde aucuns qui sçauoient quelque chose à eux incognüe, n'espargnoient la peine & le traual, tant de leur esprit comme de leur corps pour les rechercher, & apprendre d'eux ce qu'ils ignoroient. Chacun sçait comme Platon laissa pour cet effect son pays de Grece, passa en Ægypte, afin d'apprendre des Ægyptiens les secrets de nature, qu'ils auoient obseruez de longue main.

main. Cōme de là il se trāsporta à Tarē-
te vers Architas, & ailleurs en Italie,
vers les Philosophes Pythagoriques,
pour apprēdre d'eux ce qu'il ne sçauoit.
Et puis que dirons nous d'Apollonius
Tyaneus, qui passa en Perse vers les Ma-
ges: trauerfa le mōt Caucaſe, viſita les
Albanois, les Scythes, les Maſſagetes,
courut par les opulens royaumes d'In-
die: depuis passa iuſqu'aux Brachmanes,
pour ouyr le docte Iarchas, lequel aſſis
en ſa chaire d'or, enſeignoit à ſes diſci-
ples les grans & merueilleux ſecrets de
nature: De là trauerſāt le païs de Baby-
lone, de Chaldée, Mede, Aſſyrie, Ara-
bie, & Paleſtine; retourna en Alexan-
drie, & de là passa en Æthiopie, pour
apprēdre des Gymnoſophiſtes, ce qu'ils
auoient obſerué des ſemblables ſecrets
de nature. Ce ſont exēples rares, & di-
gnes d'eſtre imitez, & non pas ceux-là
de ces delicats: leſquels n'ayās iamais riē
veu que le foyer de leur grand pere, cō-
damnant, ſans ſe vouloir enquerir plus
auant, & informer de la verité, cet art
ſpagirique qu'ils ignorēt: & qui toute-
fois nous monſtre à l'œil les plus rares

& admirables secrets de nature. Aussi telles personnes sont à bon droit méprisées & dédaignées de ceux qui ont par leur travail & voyages acquis la connoissance des secrets d'icelle. Et de fait quels precepteurs de Médecine sont ceux, qui demandent pourquoy nous ne nous contentons des enseignements & traditions de nos Ancêtres. comme est vn Hippocr. & vn Galien: & à quelle raison nous cherchons des médicaments nouveaux & inusitez, & dont les Apoticairez n'ouyrent oncques parler? Cōme si la seule Rhabarbe ne leur fermoit la bouche (me contentant de cet exemple des médicaments qui ont esté incognus aux Anciens) laquelle est auourd'huy plus en vſage & a plus la vogue, qu'autre médicament qu'il y ayt. D'auantage ils nous mettent en auant, que nous maniōs le ſouphre, l'antimoine, le vitriol, le mercure, l'orpin, & ſemblables choſes, qu'ils appellēt infettes, & lesquelles meſme eſtouffent, comme ils eſcriuent impudemment, ceux qui entrent dans les cauernes de ces Cyclops. Voyla le terme duquel ces meſ-

disans vsent en mespris & dedain de si grands personnages qui recherchent les effects de Nature: & le labouratoire desquels est mesme admiré des plus grâs Princes, pour les singularitez qu'ils y voyent. Mais d'autre part ignorent ils que les anciens ne se soient seruis quasi de toutes choses, viles, sales, & puantes, & n'en ayēt fait des medicaments: cōme pour exemple, de l'ordure des oreilles, du crachat, des sueurs, de l'vrine, de la fiente humaine & d'une infinité d'autres bestes, de leurs ongles, des mouches, des souris, des vautours saoullez de la chair des corps morts, des menstrues des femmes, des vers d'un arbre pourry, & du farcin des mulets, ainsi que les escrits de Galien, d'Aëce, Paul Æginete, Dioscoride, Marcel, Pline, Serapio, & plusieurs autres nous le tesmoignent. Qui est cause que considerant vn peu l'arrogance de tels dedaigneux, qui se mocquans de nos Alembics, des Bains Marie, de nos soufflets, & autres choses qui nous sont necessaires, ne daignent apprendre ny pour eux, ny pour les autres, les gran-

*Galien.**au 10**des sim-**ples cha**1. 8. 9.**10. 12. 13**Aëce**Tetr. 1.**serm. 2.**cha. 110**Ægin.**liu. 7.**Diosco.**liur. 2.**chap.**90.**Mar-**cell. cha**4. & 26.**Pline**liur. 28.**chap.**415.**Serapio**des sim-**chap.**453. &**466.*

des singularitez de cet art spagiriq^{ue}.
Ils me font souuenir d'une hilttoire
dont, comme ie croy, ils ont peu ouyr
parler. L'on raconte que Heraclitus
Ephefien fort grand personnage, mais
dedaigneux de la Medecine & des Me-
decins (qui sont contrains de sentir, &
de manier beaucoup de choses assez vi-
les) estant surprins d'une hydropisie, ne
voulut point vser de leur conseil: &
s'estant fait frotter tout le corps de fien-
te de bœuf, se fit porter au Soleil, afin
que son humeur s'y desechast: mais
qu'auint-il? le pauvre corps s'endormit,
& soudain quelques matins le saisirent,
le deschirerēt en pieces, & le māgerēt.
Or laissant là telles personnes qui n'e-
stimēt rien bon, que ce qui leur est cō-
mun: ie viendray maintenant à mōstrer
quelle est mon intention, pour laquelle
i'adiouste cet Antidotaire des arquebu-
sades, qui n'est autre, que pour escrire,
non ce qui est vulgaire & cognu d'un
chacū (veu que ce ne seroit que rhapso-
dier à l'exemple de quelques vns, sans
aucune vtilité) mais bien les prepara-
tions des medicaments, lesquelles i'e-

stime incogneues à la plus part des Medecins & Chirurgiēs de nostre France: qui sont toutefois & necessaires, & tres-profitables pour la cure des arquebuses. Et puis protester sainement, qu'en escriuant, ie ne suis induit que de deux choses: à sçauoir d'un desir que i'ay d'inciter les autres à faire mieux: & pour le deuoir que ie doy au biē public, & mesmement à ma patrie, qui a grand besoin de ces remedes, principalement en ce temps calamiteux, auquel les guerres ciuiles regnent de si long temps au milieu d'elle. Mais afin que ie puisse euitier la calomnie de ceux qui alleguent que ces remedes sont non seulement de difficile & lōgue preparation, mais aussi si chers que les commoditez de tous en general ne permettront qu'on en puisse vser: i'ay biē voulu mettre en auant en premier lieu, & parler plustost des remedes vulgaires, & de facile preparatiō, pour ceux qui s'en voudrōt seruir, & puis venir aux autres, que i'estime sans comparaison beaucoup plus excellens: comme il sera aisē de le iuger par leur preparation, & mieux en-

core par leur vsage: me voulant accom-
moder en cela aux facultez & des sim-
ples soldats (pour lesquels i'enseigne
des moyens fort communs & faciles) &
de ceux qui ont mieux dequoy, suiuant
ma premiere methode.

LES Chirurgiens doncques qui sui-
uront le camp & qui ne pourront
prendre le loisir de preparer les medi-
caments propres pour les archbusades,
seront pourueus des remedes qui s'en-
suient: & lesquels aussi les Apoticaire
ont tousiours prests en leurs boutiques.

Et premierement pour supputer.

Le Basilicon grand & petit.

Le Macedonic.

Le Tetrapharmac. de Galien.

Le resumptif.

L'emplastre des mucilages qu'on
pourra dissoudre avec l'huile d'oliue,
s'il en est besoin.

Le Diachilon simple & composé.

Pour nettoyer.

Le Diapompholygos de Nicolas.

L'vnguent vert d'Andromacus.

L'Apostolicō d'Apicē. & sō Ægypt.

L'emplastre diuin.

Pour incarner.

L'vnguent Cerafeos de Mefué.

L'vng. dit Aureü & l'épl. Grat. Dei.

Pour cicatrizer.

L'vnguent de Minio.

L'exficcatif rouge.

L'emplastre de Cérufe

Pour attirer le venin.

L'vnguent dit Fufcum de Nicolas.

Pour les bruflures.

Les vnguens Magiftrals des Medecins de Floréce defcrits par Vvec Kérus.

L'vnguent de chaux viue.

Pour repouffer & reftreindre.

L'vnguent du bol.

Et l'vnguent Rosat de Mefué.

OV bien l'on pourra compofer des medicaments pour les fufdites intentions, lesquels n'ont befoin d'autres preparacions, que de celles qu'on fait communement.

Pour fuppuver.

Pr. beurre frais, & huile d'oliue, de chac. deux onces: farine de fromét pafée, demie once: eau commune, quatre onces. Reduifez le tout en forme de bouillie ou cataplafme, & en vfez: Ou,

Pr. fueilles de pas d'asne & de mau-
ues, de chac. deux poignées: faites les
cuire souz les cendres chaudes, & puis
les meslez avec du beurre: Ou,

Pr. suc des racinés de lis, cuites pre-
mierement souz les cendres, quatre on-
ces: graisse de poule, ou d'oye, ou de
porceau, deux onces. Faire en vnvn-
guent avec huile de lin, ou d'oliue, y ad-
ioustant vn iaune d'œuf, & vn peu de
cire.

Pour mondifier.

Pr. miel, trois onces: farine de febues
& d'orge, de chacun deux drac. faites
cuire le tout dans du vin, tant qu'il de-
uienne en forme d'vnguent: Ou,

Pr. fueilles de plantain & d'ache, de
chac. vne poignée: roses rouges, deux
pugill. vin rouge, huit onces: faites cui-
re le tout iusqu'à la moitié. Et apres
auoir coulé icelle decoction, adioustez
y du sucre rouge, deux onc. tereben-
thine, vne once: farines de lupins &
d'ers, de cha. vne drach. aloës, myrrhe,
de chac. demie drach. faites cuire de-
rechef le tout, y adioustant de cire au-
tāt qu'il en faut pour former vn vnguet:

Ou,

Pr. suc de plantain & d'agrimoine, de chac. deux onces: miel rofat, quatre onces: racines de flambe, & farines de fèves, de chac. demie once: meslez le tout, & sur la fin adioustez y vne once de terebenthine.

Pour incarner.

Pr. manne, encens, de cha. deux dra. farine de senegré & d'ers de chac. vne drach. Meslez le tout avec du miel, & vn iaune d'œuf:

Ou,

Pr. sarcocolle dissoute dans du lait, trois drach. mastic, encens, de chac. vne drach. poix liquide & terebenthine de chac. vne once. Meslez le tout & en faites vnguent.

Pour cicatrizer.

Pr. croye blanche, deux onces: cendres de cuir brulé, trois drach. meslez les avec huile rofat:

Ou,

Pr. chaux viue, lauée tant de fois qu'elle ait perdu toute son acrimonie, deux onces: terre d'armenie, vne once: meslez le tout avec huile de myrtilles.

On pourra aussi preparer des medemens du plomb brulé, d'antimoine

brulé, de calamine & de tuthie, fore propres & conuenables à cette intention.

Contre le Venin.

Pr. suc de mouron masle, & de cyclamen, de chac. vne once, soulfhre vif meslé avec de la saluie d'hommes, vne once. meslez le tout : *Ou,*

Pr. litharge, deux onces : galbanum. demie once : poix Grecque & terebenthine, de chacun vne once : d'huile autant qu'il en faut : *Ou,*

Pr. huile, quatre onces : sagapenum, mumie, & ambre iaune, de cha. trois drach. encens, mastic, de chacun deux drach. terre sigillée & couraux rouges, de cha. vne drac. poix, deux onces : cire autant qu'il en faut pour faire vn vnguent : *Ou*

Pr. deux oignons, fueilles de peruenche, de paume-dieu, & de scabieuse, de cha. vne poignée : faites cuire le tout sous les cendres : puis adioustez y demie once de theriaque, & vne de terebenthine : faites en vn vnguent.

Pour la brulure.

Pr. suc d'oignons, cuits sous les cen-

dres, deux onces : huile de noix, vne once: meslez le tout: Ou,

Pr. fueilles de lierre noir, pilées avec de l'eau de plantain, deux poignées: huile d'oliue, vne liure: faites cuire le tout iusqu'à ce que l'eau soit consumée: ce faict passez le, & y adioustez de la cire autant qu'il en faut pour faire vn liniment: Ou,

Pr. graisse de pourceau fraiche, quatre onc. fueilles de ioubarbe & de sauge, de cha. demie poignée: broyez le tout ensemble: & le cuisez avec quatre onc. de vin blanc, iusqu'à ce qu'il soit consumé. Vsez de cette mixtion avec des fueilles de noyer, ou de choux, que vous appliquerez sur la brulure: Ou,

Pr. lard fondu à la flambe, & lauë avec suc de betes, & de ruë, deux onces: creme de laiët, vne once: mucilages de la semence de coings, & dragagant, de chacun demie once: meslez le tout.

Defensifs & restrinctifs.

Pr. suc des fueilles de cheurefueil, & de chesne, de chac. vne once: roses rouges, vne drac. bol armenien, & sang de dragon, de chac. deux drach. huile

rosat, trois onces : cire, autant qu'il en faut. cuisez le tout & en faites vnguent :

Ou,

Pr. de la chair de pommes cuites dās du lait, trois onces : mucilages de la semēce de l'herbe à puccs, & de coings, de chac. demie onc. suc de tabouret & de renouée, de chac. vne once : d'accacia & sang de dragon, de chacun trois drach. terre sigillée, demie once : huile de myrthilles, quatre onces : cire blanche, autāt qu'il en faut pour former vn vnguent.

AV reste les remedes qui s'ensuiuent, ne sont si vulgaires à tous les Apoticaire & Chirurgiens, toutefois fort vtils & profitables aux playes des arquebusades & à tous autres : desquelles en partie l'art Spagirique enseigne la vrāye preparation.

Pour supputer.

Pr. racines de guimaues, & de lis, de chac. quatre onces : des betes avec leur racine, vne poignée : huile de beurre, six onces : vers de terre preparez avec le vin, trois onces : huile de iaunes d'œufs, mouëlle de veau & terebenthi-

ne, de chacun cinq onces : huile d'olive purifié, vne liure. Le tout bien meslé ensemble vous le mettrez à digerer dans du fumier de cheual bien chaud, l'espace d'un mois : puis exprimez le tout & le cuisez à feu de cendre, iusques à ce qu'il acquiere la forme d'unguent : *On,*

Pr. suc des herbes de pas d'asne, & d'ozeille, de cha. trois onces : vingt figues grasses : d'encens, deux onces : resine, vne once & demie : graisse d'oye & de poule, de chac. deux onces : beurre frais, demie liure : huile de guy de pommier composé, vne liure. Apres que le tout sera bien meslé, faites le cuire dans vn double vaisseau bien luté, par l'espace de six heures, à feu mediocre : puis le coulez pendant qu'il sera chaud & derechef cuisez le au mesme feu, ou bien l'exposerez au soleil, iusques à ce qu'il ait prins forme conuenable. Ce médicament auãce la bouë en peu de temps, & oste la douleur, & est fort conuenable aux playes d'arquebusades.

Pour mondifier.

Pr. suc de centauree, & d'esclaire, de

cha. quatre onces: miel, trois onces. fleurs de bouillon blanc, deux pugilles: encens, myrrhe, mastic, de chac. demie once: huile de terebenthine, six onces: vin blac, vne liure. faites digerer le tout dans le fumier bien chaud, par sept ou huit iours: puis le cuisez cōme dessus, tant que le vin & les sucz soient cōsumez, & le reduisez en forme d'vnguet. Adioustez à vne once de cet vnguent, vne drachme de Mercure precipité, s'il est besoin de mondifier d'auantage:

Ou,

Pr. de la gomme de sanicle, de pyrole, d'aristolochie, & de peruenche, de chac. deux onces: terebenthine lauée, quatre onces: crocus veneris, demie once: baume de tartre, deux dra. souphre d'antimoine, vne drac. & demie. Mettez le tout sur le feu de cendres, & l'y tenez tant qu'il acquiere forme d'vnguent.

Pour incarner.

Pr. mucilage de la semence de fenegré, deux onces: de la gomme des herbes de cynoglosse, curage & grāde confire, de chac, vne once & demie: huile

d'encens & de myrrhe, de chac. trois
drach. huile de mille pertuis, deux onces:
terebenthine lauée avec du vin blanc,
deux onces: laissez les au soleil, ou sur
le feu de cendres tant qu'il s'espais-
sissent: *Ou,*

Pr. suc de Petum, vne liure: tereben-
thine cinq onces: huile de mille pertuis *Vn-*
composé, huit onces: fort bõ vin blac: *guent*
demie liure. Que le tout trempe par *du petū.*
l'espace de huit iours, & le faites cui-
re, iusqu'à ce que le vin soit consumé:
puis adioustez y de la colophone, de la
cire, de cha. trois onces: mumie: ambre
jaune, de chac. deux drach. faites dere-
chef fondre le tout au feu, & le redui-
sez, selon l'art, en forme d'vnguent:

Ou,

Pr. de la gomme du petum, & de la
grande confire, de chac. quatre onces: *Vn an-*
huile de terebenthine, vne liure: fleurs *tre de*
de mille-pertuis & de bouillon blanc, *nostre*
de chacun deux poignées: vessies d'or- *descrip-*
meau, trois onc. fruits de peuplier, qua- *tion.*
tre onc. eau de vie, vne liure & demie.
Que le tout pourrisse dās le fumier, ou
soit tenu sur le feu lent, dans vn vais-

seau de verre bien bouché, l'espace d'un mois entier. Puis exprimez le tout & le coulez: adioustez y apres d'encēs, mastic, myrrhe, de chac. deux onces: sang de dragon, demie onc. mumie, six drac. terebenthine, demie liure: bēioin, vne once. Faites circuler le tout dans vn pellican, l'espace de huit iours. Puis tirez en l'eau de vie par distillation, à feu lent: & au fond du vaisseau vous demeurera vn baume fort exquis.

Pour cicatrizer.

Pr. alun brulé, vne once: croye de vitriol, trois drac. crocus martis, crocus veneris, de chac. deux drac. reduisez le tout en poudre, de laquelle vous pourrez vser sans autre additiō, ou bien mellez la avec du miel. Ou,

Pr. bol Armenien preparé à nostre maniere, deux drac. chaux de coquilles d'œufs, demie once: suc de prunes non meures, trois onces. Cuisez le lent au feu, tant qu'il soit de bonne forme.

Contre le Venin.

Pr. huile d'amble iaune, & de terebenthine, de chac. vne once: huile de geneure, deux drac. semence d'ortie & racine

racine de gentiane, de chac. vne drac.
& demie: couraux rouges, vne drac.
meslez le tout: ou,

Pr. suc de quintefueille, scabieuse &
ruë, de chacun deux onces: huile de
sophre simple, vne once: huile de myr-
rhe, deux drac. colophone & gomme
de lierre, six drac. meslez le tout & en
faites vn vnguent.

Contre la brulure.

Pr. du lard fondu & fort laué avec
eau de morelle, deux onces: huile de
plomb, demie onc. meslez le tout: ou,

Pr. de la gomme de iusquame & de
fleurs de pavot rouge, de chac. vne on-
ce, sel nitre, vne drach. mucilag. de la
semence de coings, trois drac. meslez
les avec huile de camphie & en faites vn
liniment.


Pour repousser & estreindre.

Pr. bol Armenien préparé selon l'art
Spagirique, deux onces: crocus Martis,
crocus Veneris, de chac. vne onc. mes-
lez les avec huile rosat: ou,

Pr. du colcothar dulcifié, cendres de
grenouilles brulées, de chacun demie
once: meslez les avec vn blanc d'œuf.

On peut composer beaucoup d'autres remedes pour les susdites intentiōs, desquels nous auons desia baillé les descriptions, là où ils estoient conuenables & vtilés, & desquels l'expert Chirurgien vsera selon qu'il verra estre expedient: il reste maintenant à traiter des potions propres aux playes, deuant que nous venions à parlet de la preparation Spagirique des medicaments.

Des potions Vulneraires.

 Ombien que ces potiōs ne vuident les humeurs par le bas, si sont elles conuenables à nettoyer les playes de toutes les humeurs superflus, & purifient le sang de toutes impuritez: & par leur grande faculté recollent les os brisez, & guerissent les nerfs. Bref aident en telle façon nature, qu'en peu de temps les playes sont incarnées & cicatrisées, mesme sans y appliquer autre remede. Or d'autant que j'ay veu de merueilleux & comme incroyables effects de ces potions, & sur tout en Allemagne, mesme pour la guerison des vlceres desesperéz: il m'a semblé que ce ne seroit hors de propos

d'en toucher quelque chose, principalement d'autant que leur vſage a eſté approuué anciennement, & lequel a eſté preſque enſeueſy & du tout meſpriſé par les Medecins & Chirurgiens modernes. D'auantage ce ſont medicaments alimentaires & fort propres pour ſubuenir aux ſymptomes & à toutes les infirmitéz, auſquelles les playes ſont ſuiettes.

*Les ſimples deſquels on les compoſe,
ſont ceux-cy.*

<i>Cyclamen.</i>	<i>L'herbe dite langue de</i>
<i>Conſire grande.</i>	<i>Serpent.</i>
<i>Conſire moyenne, que</i>	<i>Betoine.</i>
<i>aucuns nomment</i>	<i>Aristolochie.</i>
<i>Sophie.</i>	<i>Veronique.</i>
<i>Sauinier.</i>	<i>Agrimoine.</i>
<i>Verueine.</i>	<i>Pyrole.</i>
<i>Serpentaire.</i>	<i>Sperme de baleine.</i>
<i>Curage.</i>	<i>Cancres de riniere.</i>
<i>Armoysé.</i>	<i>Noix vomique.</i>
<i>Grand muguet.</i>	<i>Eſcreuiſſes.</i>
<i>Zedoaire.</i>	<i>Mumie.</i>
<i>Galange.</i>	<i>Macis.</i>
<i>Peruenche.</i>	<i>Bol Armenien.</i>
<i>Centauree.</i>	

Or vous pourrez beaucoup mieux tirer la vertu de ces simples, que ne fait le commun, si vous les mettez dans vn vaisseau plein de moust blanc, & qu'ils y trempent par deux mois: ou si apres auoir couppé menu les herbes vertes, ou tiré leur suc, vous les mettez circuler par l'espace de quatre iours au bain Marie, dans vn pellican, ou vaisseau bien bouché, Car cette derniere façon est propre pour ceux, auxquels le vin est contraire, principalement si la playe est en la teste. Les eaux aussi tirées de ces simples par distillation, leur seront vtils, s'il en prennent tous les iours, matin & soir: ou si le vin desblesez en est trempé, quand il leur est permis d'en boire.

Les potions qu'on doit bailler les sept premiers iours, à ceux qui sont blesez.

S'ensuyuent les descriptions des potions propres aux playes.

Pr. des deux confires, veronique, cyclamen, de chac. vne poignée: quatre escreuiffes, deux mesures de vin blanc. faites circuler le tout au bain par trois iours, & de cette decoction estant coulée vous en presenterez vne cueillerée

le matin: Ou,

Pr. yeux de cancrs, reduits en poudre, demie once: mumie, deux drach. bol Armenien vne drach. & demie: des herbes d'aigremoine, langue de serpēt, veronique, & cyclamen, de chac. vne poignée: semence de balaine, vne drachme. Que le tout trempe dans du vin blanc, vne nuit au bain Marie. faictes prendre au malade deux cueillerées de cette infusion, le matin & le soir, s'il est besoin. Elle dechasse les inflammations, & est propre aux brûslures.

Pr. macis, yeux de cancrs, zedoaire, de chac. trois drach. mumie, petite galange, de chac. deux drach. noix vomique, vne drach. & demie. Apres que le tout aura esté broyé grossieremēt, mettez le dans vn vaisseau de verre, & versez dessus vne mesure & demie de vin blanc. Laissez tremper le tout par l'es-

*Les po-
tions
pour les
autres
iours.*

pace de deux iours. La dose de ce vin est, vne cueillerée le matin & vne autre le soir. Cette potion a telle efficace, qu'elle ne peut estre assez prisee.

*Potion
propre
aux
playes
des ar-
busades
enueni-
mées.*

Pr. fleurs de peruenche & de grand muguet, de chac. vne pugille: galange,

zedoaire, de chacun deux drac. mumie & bol Armenien vray, de chacun vne drac. sperme de baleine, demie drac. vin blanc, deux mesures. Que le tout trempe & se circule au bain par quatre iours. La dose est d'une cueillerée le matin & le soir.

Potion pour la playe faite avec fra-cture Pr. aristolochie, cyclamen, serpentaire, des deux confires, & du geranium, de chac. vne poignée: de fauinier, demie poignée: macis, zedoaire, & yeux de câcres, de chac. demie once: mumie & petite galange, de chac. vne drac. & demie. Apres que les herbes auront esté coupées menu & pilées & le reste reduit en poudre grossieremēt, le tout cuise dans vn double vaisseau quatre heures durant avec vne mesure de vin. Le malade en prendra le matin & le soir. Ce seul remede est plus profitable, que tant de ligatures fortes, desquelles on vse bien souuent assez mal à propos.

Potion pour les playes faites en la teste. Pr. fleurs de grand muguet & de betoine, de chac. vn pugille: galāge, macis, de chac. trois drac. curage, esclaire, perueche, veronique & centaurée, de chac. demie poignée. Que le tout trempe

comme dessus, & puis soit gardé pour en vser en temps & lieu.

Pr. suc de verucine, betoine, veronique, de chac. deux onces: eau de canelle, vne liure. Laissez tremper le tout. *Potion pectorale.*

Pr. bol Armenien, demie once: des deux confires, de chac. vne poignée: galage deux drac. Le tout trempé dans du vin comme dessus, lequel soit gardé pour s'en seruir, quand il sera besoing. *Potion pour les playes du ventre inferieur.*

On pourra faire plusieurs & diuerses potions des simples susdits, la description desquelles ie laisse au Medecin expert & bien aduisé. I'adiousteray seulement cecy, que leur visage est fort propre aux playes faictes par les archufades, comme aussi à tous vlceres phagedeniques, chancreux, malins & desesperes. Desquelles potions le Medecin cognoistra mieux la vertu quand il vsera de l'essence desdits simples vulnerraires au lieu des infusions: laquelle essence se tire par l'art Spagirique, ainsi que nous l'auons enseigné en vn autre lieu.

*Table des seuls medicaments Spagiriques
propres pour les archusades.*



R d'autant qu'il reste que nous enseignons par cy après la preparation Spagirique des simples propres pour la curation de ces playes, nous y procederons (afin de traiter le tout plus clairement) par la mesme methode, de laquelle nous auons vsé cy dessus.

Pour suppu-
rer & appai-
ser les dou-
leurs.

{ Huile d'œufs.
| Huile de beurre.
| Huile de resine.
| Huile de guy de pommier
| composé.
| Huile de mille pertuys sim-
| ple.

{ Huile de myrrhe.
| Huile de mastic.
| Huile de terebenthine.
| Huile de miel.
| Gomme de centaurée.
| Gomme de peruénche.
| Gomme d'aristolochie.
| Sel de lye, ou fondrilles de

Pour mon-
difier.

} vinaigre.
 } Baume tiré du fer.
 } Crocus Veneris.
 } Précipité commun.
 } Précipité dulcifié.
 } Baume de Venus.
 } Baume de Saturne.
 } Baume de tartre.

Pour incar-
ner.

} Baume de mille-pertuys.
 } Huile de sarcocolle.
 } Huile d'encens.
 } Huile de manne.
 } Gomme des deux confires.
 } Gomme de cynoglosse.

Pour cica-
triser.

} Chaux de coquilles d'œufs.
 } Chaux de coquilles de li-
 maçons.
 } Bol Armenien préparé.
 } Crocus Martis.
 } Croye de vitriol iaune.
 } Huile de sel de }
 tartre. } propres aussi
 } Huile de talc. } pour embel-
 } lir les cica-
 } trices.

} Huile de guy de pommier
 } simple.

Pour re-
pousser & re-
streindre le
sang.

Huile de Mars.
Crocus Martis.
Crocus Veneris.
Colcothar simple.
Colcothar dulcifié.
Bol Armenien préparé.
Chaux de coquilles d'œufs.
Chaux de coquilles de li-
maçons.

Contre le
venin.

Beurre d'arsenic fixé.
Precipité dulcifié.
Baume de tartre.
Huile de Mercure corpo-
rel.
Huile d'antimoine.
Huile de soufre vitriolé.

Contre la
brûlure.

Huile d'œufs.
Huile de lard.
Huile de beurre.
Eau d'escreuisses.
Eau de semence de gre-
nouilles.
Eau de fleurs de pavois rou-
ge.
Gomme de racines de ius-

quiame.

Huile de Saturne & son sel.

Huile de litharge.

Gomme d'aristolochie.

Pour attirer } Gomme de la secōde escor-
ce du tillet.

Ambre jaune preparé.

La pierre d'aymāt preparée.

Huile de myrrhe.

Huile de girofles.

Huile de tartre puant.

Huile de vitriol.

Huile de souphre simple.

Pour les os cor-
rompus. } Huile de souphre vi-
triolé.

Huile d'antimoine.

Souphre rouge d'anti-
moine.

Huile de sel.

Huile de Mercure su-
blimé.

Davan-
tage il y
a quel-
ques vns
d'iceux
sim-

Huile de cire.

Huile de genceure.

ples qui-
sont pror-
pres pour
certaines
parties
offensées
comme

Pour les
nerfs
sez.

Huile d'euphorbe.
Huile d'œufs.
Huile de terebenth.
Huile de souphre fait
avec la terebent.

Sel de fuye de chemi-
née.

Sel d'vrine.

Sel de tartre.

Sel de miel.

Huile de froment.

Huile de miel.

Huile de soulfhre ai-
gret.

Phlegme de vitriol
aigret.

Phlegme d'alú aigret

Baume de Mars.

Baume de Saturne.

Baume de Mercure.

Baume de tartre.

Côtre la
chair
pourrie
& corró-
puë.

Mais pource qu'il faut principale-
ment auoir soin des parties nobles, de
l'action desquels la vie despend, il y en
a aussi d'aucuns, qui leur sont fort pro-
fitables: comme.

	Le cer- veau.	Huile d'ambre iaune.
		Huile de sauge.
		Huile de giroffes.
Pour for- tifier.	Le cer- veau.	Esprit de vitriol.
		Or de vie.
		Teincture de l'or.
	Le cœur.	Essence de perles.
		Teinture de Baume naturel.
	Le foye	Teinture de couraux.
		Huile de Mars.

LES PREPARATIONS SPA-
giriqves des susdits medicaments.



E AITES distiller du tartre par la cornuë, donnant feu par degrez, ainsi qu'on fait quand on pousse l'eau forte. Il vous rendra grande quantité d'esprits blancs, qui se tournent en eau & en huile espais & puant. Vous separerez l'huile par vn entonnoir, & le garderez pour vous en seruir au besoin.

*Huile
puant.*

Au reste, vous tirerez le sel des feces qui seront restées en la cornuë, les fai-

*Sel de
tartre.*

sans dissoudre d'as de l'eau chaude, puis les filtrant deux ou trois fois & faisant euaporer, par ce moyen le sel se congelera, & restera au fond du vaisseau: lequel si on dissout derechef, & puis le cōgele, reiterant cela par plusieurs fois, on le purifiera en telle sorte qu'il deviendra crystallin.

*Huile
du sel de
Tartre.*

Mettez ce sel crystallin dans vn vaisseau de verre en quelque lieu humide, & il se refoudra en huile en bien peu de iours, lequel sera clair, & fort propre pour ôster les taches du visage, & nettoyer les vlcères.

*Baume
de Tartre.*

P. Tartre, deux liures: salpestre, sel de fuye, & de fèces de vinaigre, de chac. quatre onces: chaux viue, six onces. Apres que le tout aura esté mis en poudre, mettez le dans vn vaisseau de terre non vitré & qui soit bien bouché: calcinez ces matieres par l'espace de douze heures: apres faites les dissoudre en eau chaude: filtrez les & les congelez, reiterant cela par trois fois. Puis mettez le tout dans vn alébic, & versez dessus du vinaigre distillé, tant qu'il surpasse de quatre doigts la matiere: tirez en le vin-

aigre par le bain, & il en sortira doux. Mettez y derechef d'autre vinaigre, & le distillez comme dessus, reïterant cela iusques à ce qu'il en sorte autant aigre, que vous luy auez versé premierement.

Quoy fait, mettez toutes les feces dans vne cornuë, & les poussez en façõ d'eau forte, & il en sortira vn huile bruslant, duquel la vertu ne peut estre assez prisee. Par ce mesme moyen tout le sel de tartre (autrement fixe) passera par le corps de l'alëbic, duquel se fera vn huile excellent à beaucoup de choses.

LA lie ou le marc qui demeure quand on a distillé le vinaigre, soit bien desseiché, qu'on le pousse apres dans vne cornuë à grãd feu, & il en sortira vn huile rouge & violët, propre pour les gangrenes. Que si vous dissoluez derechef les feces dãs de l'eau chaude, les filtrez, & euaporez, il vous demeurera au fond vn sel merueilleusement propre pour lesdites gangrenes, & pour tous vlcères phagedeniques.

Mettez la suye puluerisee à dissoudre dans du vinaigre distillé en vn vaisseau & feu conuenable: distillez le tout

*Sel de
vinaigre*

*Sel de
suye &
õ huile*

par filtre, & le congelez: reiterez cela tât de fois iusques à ce que le sel deuienne fort blanc, lequel se resoudra en huile, en vn lieu humide. Il est propre pour les gangrenes, & tous malins vlceres.

*Preparation
du bol
Armenien.*

FAites dissoudre le bol Armenien, mis premierement en poudre, dâs le phlegme aigret de l'alup: separez le phlegme par le bain: versez en dessus derechef, reiterant cela par trois fois. Alors le bol se conuertira comme en huile, ou beurre: lequel dessecherez à feu lent, & il se reduira en poudre, laquelle est propre pour arrester le sang coulant de toutes pars.

*Huiles
des aromati-
ques li-
queurs,
gömes,
et herbes.*

PR. girofles puluerisez, vne liure: eau simple, ou pour le mieux, eau de vie, six liur. Ayât mis le tout dans vn vaisseau de verre, mettez le à digerer au bain, ou au fumier par 4. iours: puis distillez le par l'alembic accommodé avec son refrigeratoire. Separez l'huile d'avec l'eau par vn entonnoir, & le gardez pour vous en seruir au besoin. Par cette mesme voye vous tirerez les huiles de sauge, geneure, ambre, terebenthine, myrthe, encens, sarcocolle, mastic, euphorbe

phorbe & de guaiac rapé : lequel se peut aussi distiller par vn descensoire. Or vous trouuerez vne plus belle & meilleure façon de tirer les huiles dessusdits en nostre liure de la preparation Spagirique des medicaments.

FAITES digerer par l'espace de huit iours le froment conquassé & mis dans vne cornue avec l'esprit du vin, & ce dans le bain : puis poussez le à grand feu : remettez sur le marc ce qui sera distillé, & le digerez derechef, & le distillez. Si vous faites ainsi par trois fois, il en sortira vn huile excellent pour la gangrene.

*Huile
de froment.*

P fleurs de mille-pertuis coupées bien menu, deux liures: huile de terebenthine, vne liure: vingt jaunes d'œufs: eau de vie, demie liure. Apres que le tout aura esté bien meslé, faites le pourrir au fumier chaud, l'espace d'un mois entier: puis le pressurez & le mettez au soleil deux mois durant.

*Baume
de mille
pertuis
simple*

Si Le baume de guy de pommier se fait en la mesme maniere que le precedent: ou bien avec le simple huile d'oliue purifié premierement au bain.

*Baume
de guy
de pommier
simple*

*Baume
de mille
pertuis
compose*

Pr. fleurs de mille-pertuis, vne liure : racines de grande consfire, quatre onc. fleurs de camomille, & bouillon blanc, de chac. trois onc. huile d'œufs, & de terebēthine, de chac. demie liure : cau de vie, vne liure : encens, myrrhe, mastic, mumie, de chac. deux onc. sucre rouge, six onces. Le tout soit mis dans vn vaisseau bien bouché à digerer au fumier l'espace d'un mois : puis apres exprimez le tout & le circulez par trois iours, au bain. Apres vous le mettrez sur les cendres tiedes, iusques à ce qu'il acquiere consistance de baume.

*Baume
de guy
de pom-
mier
compose*

Pr. guy de pōmier haché menu, deux liures : & le mettez dans vn matras de verre, y adioustant des fruiçts de peuplier, demie liure : huiles de graisse de tesson & de beurre, de chac. quatre onces : huile de vers de terre, deux liures & demie : vin blanc excellent, deux liures. Que le tout se digete au fumier, deux mois durant, dans vn vaisseau bien bouché, puis exprimez le tout par le pressoir, & le mettez à circuler par quelques iours : & puis cuisez le au feu lent iusques à la consommation des liqueurs.

Il ne se peut trouuer médicament plus excellent pour appaiser les douleurs.

Filtrez le suc des herbes & de leurs racines, tant qu'il soit purifié & bien clair: puis après versez y dessus autant d'eau de vie: & qu'ils se digerent au bain, dans vn vaisseau de verre, par l'espace de quinze iours. Séparez l'eau de vie par l'alembic, iusques à ce que le tout s'espaississe au fond, comme miel, ce que nous appellons gomme ou guy.

Pour tirer la gomme des herbes & des racines.

Faites tremper dans l'eau commune filtrée, ou bien, & qui sera meilleur, d'as du vin blanc, les herbes ou racines bien nettes & hachées menu, par l'espace de huit iours, & ce entre deux pots de terre bien clos, que vous tiédrez tousiours au feu lent. Ce faict, exprimez bien fort le tout, & le cuisez au mesme feu, tant qu'il acquiere deuë consistance.

Autre façon.

Des fueilles du pauot rouge vous tirerez vne eau par l'alembic, qui est fort propre (bien qu'elle ne soit gueres en vsage) pour rafraischir toutes inflammations.

Sel tiré de l'urine.

LE sel tiré de l'urine de l'homme est vn médicament fort propre pour

nettoyer tous vlceres & specialement pour la gangrene. Il faut premieremēt qu'on filtre l'vrine, puis qu'on la congele au feu, & il residera au fond vn sel, lequel on dissoudra avec du vinaigre distillé, puis on le congelera derechef: & en reiterant cela plusieurs fois, on le rendra plus crystallin & de plus grande efficace. A l'humide il se resout en vn huile fort excellent.

*Huile
de cire.*

FAites cuire la cire sur le feu avec du vin, tant qu'il soit consumé, & qu'elle ne petille plus. Prenez de cette cire ainsi preparée, vne liure: alun calciné, demie liure: fueilles de sauge, vne poignée. Mettez le tout dans vn alembic de cuiure ayant son recipient, & luy donnez le feu mediocre. Il sortira premierement vn huile aucunement espais, qu'il faut distiller vne autre fois: & reiterant cela par trois fois, vous aurez vn huile de cire excellent pour les maladies des nefs, & appaisant toutes douleurs prouenant de cause froide. Par la mesme voye vous ferez l'huile de la resine & de la poix.

Distillez du miel par l'alēbic au bain *Eau &*
bien chaud ou sur les cēdres, & en *huile de*
fortiravne eau qui est propre à plusieurs *miel.*
effets: puis vous adiousterez aux feces
du sable, ou des caillous calcinez, la
moitié pesāt de vostre matiere, de peur
qu'elle ne regorge par la cornuē où vo⁹
la mettrez, donnant le feu par degrez.
Il sortira premierement vn huile elair
& iaunastre: & puis par plus grande ex-
pression de feu, distillera vn huile es-
pais & impur. Mettez le tout à dige-
rer au bain, par quatre ou cinq iours,
puis le distillez dērechef par l'alembic
dans le sable, & il en sortira vn huile
pur & rouge nageant sur son eau. Cē-
te eau est aigre, quasi comme vinaigre
distillé: & est fort propre contre la gan-
grene. Mais l'huile qui brusle comme
l'eau de vie, a de grandes vertus: princi-
palement si on le met à circuler avec
l'esprit du vin par quelques iours: d'au-
tant que par ce moyen son menstrual
estant separé, il demeure au fond du
vaisseau vn huile doux & fort plaisant
au goust & merueilleusement propre
pour la guerison des arquebusades &

tous vlceres malins.

*Sel de
mict.*

Calcinez au feu de reuerbere les feces qui demeureront au fond, tant qu'elles soient blanches, lesquelles vous distillerez dans leur propre eau distillée premieremēt, ou bien dans de l'eau cōmune, filtrant & congelant le tout par trois fois. Vous en tirerez vn sel clair & propre pour tous vlceres putrides. Qui meslera ce sel en deuē proportion avec son huile, & les mettra digerer au fumier, puis les distillera suiuant l'art, il rendra son huile propre à beaucoup de grandes choses.

*Autre
huile de
mict.
fort ex-
cellent.*

Pr. miel avec sa cire, deux liures: tartre puluerisé, vne liure. Mettez le tout dans le fumier chaud, en vaisseau conuenable, afin qu'il pourrisse quinze iours durant: puis le distillez par la cornuē, il en sortira premierement vne eau blanchastre, puis iaunastre: mettez la derniere sur ses feces, & les mettez dans le fiens derechef par quinze iours: puis poussez les par la cornuē, reiterant cela par trois fois: & par ce moyen vous ferez vn huile tres-precieux.

LE beurre fondu & préparé si vous voulez, avec du vin blanc, soit mis dans vn alembic de cuiure, sur les cendres, à distiller: il en sortira d'vne liure, dix onces d'huile fort anodyn & propre pour appaiser toutes douleurs. Vous ferez en la mesme façon l'huile de lard, & de toutes les graisses. Lesdits huiles se peuuent distiller par la cornuë, y adioustant du grauiier: mais il faut estre bien aduisé à donner le feu.

*Huile
de beurre
et de
lard.*

CVisez vne grande quantité d'œufs tant qu'ils soient durs, desquels vous tirerez les jaunes, & les mettrez dans vne cornuë de verre: & donnant le feu par degrez, vne eau sortira la premiere, puis vn huile jaunastre, nageant sur son eau: & donnant plus grand feu, en sortira vn huile plus espais. L'eau est bonne à toutes taches, & les huiles propres pour appaiser les douleurs.

*Huile
de jaune
d'œufs.*

FAites bouillir les escreuisses ou cancrez avec de l'eau de grande ioubarbe, dans vn double vaisseau bien bouché, vn iour entier: puis les distillez à feu de cendres. Remettez par trois fois cette eau sur ses feces, & puis la gardez.

Eau d'escreuisses & cancrez.

Elle est propre aux inflammations & brûlures.

*Eau de
semence
de gre-
nouilles.*

Quant à la semence de grenouilles elle se trouue au mois de Mars par les marests, és lieux où elles habitent. On la distille par vn alembic de verre, au feu de cendres. Il en sort vne eau fort vtile aussi aux brûlures, & inflâmatiōs.

*Chaux
de co-
quilles
d'œufs
& des
limaces.*

Faites reuerberer les coquilles d'œufs, ou de limaces à bien grand feu, trois iours d'atant, iusqu'à ce qu'elles soient du tout reduites en chaux bien blâche. Si cependant qu'elles se calcinent vous les arrousez de vinaigre, la chaux en deuiendra plus subtile, & plus propre à faire ses effects. Vous la pulueriserez dans vn mortier & garderez la poudre pour ses vsages.

*Mer-
cure
precipi-
té selon
le vul-
gaire.*

Il faut faire dissoudre vne partie de Mercure, preparé & bien laué cōme Geber le commande, dans deux parties d'eau de depart. Le tout estant dissout suyuant l'art, vous distillerez l'eau de dessus ses feces par trois fois, augmētāt le feu à la derniere fois, en telle maniere que tous les esprits de ladite eau sortent, & il vous demeurera vne pou-

dre rouge au fond, laquelle vous reuerbererez encore, pour en tirer tât mieux tous les esprits de la susdite eau: lesquels autrement engendrent de grandes douleurs & autres inconueniens. Mais ce sera le meilleur que vous lauez ladite poudre avec le phlegme d'alun, le vinaigre distillé, & l'eau de blancs d'œufs: car par ce moyen on oste la mordacité & venin du Mercure precipité.

Sublimez le Mercure suyuant l'art, par quatre ou cinq fois le reuiuifiant à chaque fois: & apres l'auoir purgé de toute sa terre noire & puante, & luy auoir consommé son eau superflüe, vous le fixerez avec l'eau, laquelle nous auons desia descrite en nostre liure de la preparation Spagirique des medicaments. Mais d'autant que tous ne pourrôt pas entendre sa description, à cause des mots de l'art vn peu obscurs, desquels i'vse pour ne vouloir profaner choses si grandes: on pourra se seruir de l'eau forte commune, laquelle fixera aucunement ledit Mercure, si on la passe par trois fois dessus ses feces. Par ce moyen

*Mercuri-
reprecipi-
té, dul-
cifié &
fixé forte
propre
pour
guairir
ces
playes.*

le Mercure se precipitera & serendra en poudre rouge, de laquelle vous tirerez l'acrimonie prouenant de l'eau forte avec le feu, comme est dit cy dessus. Ce qui se fera beaucoup plus commodément par le moyen qui s'ensuit.

*Moyen
pour
dulci-
fier le
Mer-
cure
precipi-
té.*

Pr. vinaigre distillé, deux liures: phlegme d'alun, demie liure: chaux de coquilles d'œufs, six onces: distillez le tout à siccité. Prenez de cette eau, trois liures: Mercure precipité comme dessus, vne liure: apres que le tout aura esté bien meslé & putrefié selon l'art, distillez l'eau par l'alembic, la remettant sur ses feces par trois fois: finalement donnez grand feu, tant qu'elles demeurent bien seches: puluerisés les, & les mettez derechef d'as l'alembic, versant dessus l'eau dessus écrite, autant que deuant: laquelle vous repasserez trois fois encore ainsi que dessus. Ce fait, circulez le Mercure precipité avec l'alcool du vin par l'espace de vingt quatre heures au bain: puis le distillez à siccité, & en y versez derechef dessus de nouveau, le circulant & distillant ainsi par quatre ou cinq fois: & lors vous aurez

la vraye preparation du Mercure, duquel la proprieté & vertu ne peut estre assez prisee pour guairir beaucoup de maladies, & sur tout la verole: soit qu'on le prenne par la bouche, (car ainsi preparé il n'esmeut que les sueurs) soit qu'on l'applique sur la partie blessée, meslé avec du beurre, ou autre medicament.

Faites vn amalgame de quatre onces de Mercure cru, & vne once de Iupiter de cornuaille. Estendez le sur vne lame de Mars accommodée pour cet effect, & le mettez en lieu humide avec son recipient. Il se dissoudra entierement en huile, en peu de iours. Le simple Mercure estendu sur vne lame de Iupiter bien battuë se dissout pareillement en huile excellent pour toutes fistules, callositez, & pour tous vlceres prouenans de la verole.

Apréz que le Mercure aura esté sublimé trois fois à la façon accoustumée, avec du yitriol & du sel commun, meslez le à la derniere fois avec autāt de sel ammoniac, & le sublimez derechef trois ou quatre fois. Tout ce sublimé se resout en huile facilement, duquel vous

*Huile
corporel
de Mer-
cure.*

*Huile
de mer-
cure su-
blimé.*

Tirez l'esprit du sel ammoniac par le moyen de l'eau & en circulant & distillant le tout avec l'essence du vin tât de fois que l'huile ne soit plus mordicant ny acré. Le sublimé bié préparé se réduit aussi tout seul en huile, si vous le mettez au feu d'un Athanor à cuire par une longue espace de temps.

*Baume
de mer-
cure.*

Sublimez le Mercure avec la simple chaux de coquilles d'œufs bien préparée, tant de fois qu'il en soit amorty & esteint. Versez puis apres dessus du vinaigre distillé alcolisé, qui surpasse de quatre doigts la matiere. Tirez en l'eau quatre ou cinq fois, tant que le Mercure soit réduit en poudre tres-rouge, laquelle vous ferez circuler avec l'alcool du vin, dans un pellicā huit iours durāt. Et iceluy estāt séparé, il restera au fond le baume du Mercure fort exquis & doux. Il guerit tous les vlcères desesperez & mesme les carnositez qui viennent au col de la vessie: & est fort propre à ces playes desarebusades. Au reste vous pourrez voir d'autres preparations du Mercure, & la maniere d'en vser en nostre liure de la preparation de ces medi-

camens n'agueres mis en lumiere.

PR. de la limaille de Mars, laquelle vous laueriez plusieurs fois avec eau *Baume de Mars.* salée, puis versez dessus du vinaigre bié fort, qui surpasse de quatre doigts: mettez le tout sur les cendres chaudes huit iours durât, remuant cette matiere deux ou trois fois le iour: ostez par inclination le vinaigre qui s'eteindra, & y versez derechef d'autre nouveau vinaigre, iusques à ce qu'il ne s'esteigne plus. Et apres l'auoir fait euaporer, prenez la poudre qui sera restée au fonds, & la sublimez avec autât de sel ammoniac: remettez la tant de fois sur son marc & la sublimez, qu'à la fin elle deuienne rouge cōme vn rubis. Iettez puis apres le tout dans l'eau bouillante, afin qu'elle se fonde: & à l'instant versez dessus de l'eau froide, & lors le baume de Mars demeurera au fond comme chaux de sel. Ostez en l'eau & en remettez d'autre dessus, afin qu'il deuienne doux & que le sel ammoniac se separe.

Vous ferez de ce baume de Mars vn *Huile* huile rouge avec l'esprit du vin alcoolisé *de* par plusieurs circulations, lequel est *Mars.*

fort excellent pour les haimorrhagies internes & fortifie les parties naturelles si vous meslez vne goutte d'icelle avec la conserue de roses, ou de grandes confire, ou bié si vous la baillez dans du vin.

*Crocus
Martis*

Aprés que vous aurez bien laué la limaille de Mars avec de l'eau simple, vo⁹ la calcinerez, comme il faut, avec fleurs de souphre, ou la ferez dissoudre en eau forte : puis versez dessus du vinaigre, & le laissez en vne chaleur tiede par quelques iours. Reuerbererez après le tout suiuant l'art, par vn iour entier : & cueillez tousiours les fleurs qui s'eleueront au dessus, continuât le feu iusques à ce que vostre limaille soit reduite en vne poudre fort rouge & bien legere.

*Baume
huile,
crocus
& vitriol de
Venus.*

ON pourra par la mesme maniere tirer le baume, l'huile & crocus Veneris. Et le repliât en forme d'oublie, & versant dessus du phlegme de vitriol aigret & préparé comme il faut, vous en tirerez vn vitriol excellent, transparent & de couleur d'esmeraude : & ce par le moyen des circulations. Le vitriol est fort propre à beaucoup de choses : de la propriété duquel nous auons parlé en

nostre liure de la préparatiō spagirique
des medicaments.

A Pres que vous aurez calciné le Sa-
turne, cōme il faut, vous en tirerez
vn sel douçastre par le moyen du vin-
aigre distillé, & ce dans le bain, en l'y
versant tāt de fois qu'il n'attire plus au-
cune douceur. Faites exhaler vostre
mēstrual, & il vous demeurera au fonds
vn sel, lequel vous rēdrez crystallin par
solutions & coagulations reiterées,
comme l'art le commande.

*Sel de
Saturne*

Ce sel se resout facilement en vn lieu
humide & se conuertist en huile fort
douçastre. Au reste si vous circulez le
fusdit sel crystallin dans vn pellicana-
uec le spirit du vin par quinze iours: &
que vous separiez par distillation le mē-
strual, & en y versiez de nouueau, y ad-
ioustant de sel de tartre bien purifié, au-
tant qu'il en faudra, vous ferez vn bau-
me beaucoup plus doux que le sucre, &
fort excellent pour la guerison de tous
vlcères malins, & mesme fort propre
pour les ophthalmies, & autres mala-
dies des yeux.

*Huile
de sel de
Saturne*

*Baume
de Sa-
turne.*

*Souphre
d'anti-
moine.*

IL faut faire bouillir l'antimoine esleu & mis en poudre, vne heure durât ou plus, avec vn capitel fait de tartre calciné & chaux viue. Ce fait tirez vostre matiere du feu & la laissez refroidir, y versant bien peu de vinaigre: vous verrez vne rougeur qui nagera par dessus vostre capitel, laquelle vous tirerez à part, & puis la ferez derechef bouillir au feu comme deuant & la laissez refroidir: sèparez encore la rougeur qui apparoiſtra: reiterez cela iusques à ce qu'il n'apparoisse rien d'auantage de rouge, qui est le souphre de l'antimoine, lequel vous dessecherez, & le garderez pour en vser, quand il sera de besoin, comme ie l'ay enseigné.

*Huile
d'anti-
moine.*

Pour tirer l'huile de l'antimoine, il vous le faut eslire & le mesler avec du sucre & de l'alun bien calciné: mettez le tout dans vne cornuë avec son recipient, & donnez bien petit feu au commencement, puis l'augmentez suiuant l'art, & vous verrez sortir vne huile plus rouge que le sang, si vous sçauuez gouverner le feu. Il est merueilleusement propre pour tous vlceres.

Il se

Il se tire aussi vn huile de l'antimoine par le moyen du Mercure sublimé, propre à plusieurs effects : mais il faut que l'artiste soit soigneux à donner le feu tel qu'il est requis.

FAITES cuire le souphre, bien préparé au parauant par le moyen d'un capitel conuenable, avec de l'huile de lin & ce en feu fort petit, iusques à ce que le souphre se reduise en vne masse rougeastre: puis mettez cette matiere apres estre refroidie, dans la cornue à distiller, luy donnant feu par degrez, il en sortira vn huile rouge fort excellent.

*Huile
de sou-
phre.*

Il se peut faire aussi, si vous meslez du son avec le soulfhre, & que vous distilliez le tout.

Pr. vne liure de souphre vif, meslez le avec autant de vitriol Romain liquéfié: & du tout faites vne masse, laquelle vous poufferez par le descensoire & en tirerez vn huile rouge, que vous reseruez.

*Huile
de sou-
phre vi-
triolé.*

Si vous mettez à dissoudre vne liure de fleurs de soulfhre dans trois liures d'huile de terebenthine distillée à nostre façon, elles se dissoudront dedans bien

*Huile
de sou-
phre te-
reben-
thine.*

peu de iours, en vn huile de couleur de rubis. Separez le menstrual suiuant l'art, tant que vostredit rubis de souphre demeure pur. Apres vous le circulerez avec l'alcool du vin, par huit iours entiers: & par ce moyen vous ferez vn huile fort precieux, ayant les vertus du baume vray & naturel en la guerison de tous vlceres & autres maladies.

*Huile
aigret
de sou-
phre.*

Le souphre puluerisé & abbreuue d'eau de vie, si on veut, soit mis dās vne escuelle de terre: puis mettez y le feu avec vn charbon de saule bien allumé, & pendez dessus vne cloche de verre, ou de terte, ou chose seblable, qui puisse retenir les vapeurs dudit souphre, & qui ait les bords repliez pour receuoir l'huile qui se resoudra desdites vapeurs.

*Phle-
gme de
vitriol.*

Mettez le vitriol dās vne cornue lutée avec son recipient accommode comme il est requis: donnez feu du second degre, & il en sortira vne eau aigrette, que nous appellons le phlegme du vitriol.

*Huile
de vi-
triol.*

Les feces qui demeurent au fond, apres que cette eau est distillée, se nomment colcothar, lequel vous pousserez

par expressiõ de feu deux ou trois iours durant, & il en sortira vne grãde quantité d'esprits blancs, qui se resoluent en huile rouge. Cet huile se fait mieux par rencontre: & bien plus tost encore si à vne liure de colcothar on mesle demie liure de petiscaillous calcinez. Au reste vous rendrez cet huile de vitriol doux, par le moyen des circulations reiterées avec l'esprit du vin.

Si on dissout le colcothar dãs de l'eau chaude & que la rougeur, qui furnagera, soit separée, & ladite eau exhalée, il se dulcifiera. Ce qui demeure au fond est ce qu'õ appelle la croye: de laquelle encore se peut tirer par les dissolutions & coagulatiõs vn sel blanc cõme neige.

*Colco-
thar
dulcisé,
& la
croye de
vitriol.*

Au reste pour faire l'esprit du vitriol, il le faut distiller par neuf diuerses fois, changeant autant de fois de nouveau vaisseau, versant tousiours ce qui sera distillé sur ses feces, & chasser à chacune fois les esprits, tant que faire se pourra: en fin il faut circuler le tout par l'espace de quinze iours, ou d'auantage. Et en cette maniere se fait l'esprit du vitriol, duquel i'ay escript les vertus en au-

*Esprit
de vi-
trio.*

*Phleg-
me d'a-
lun.*

trè lieu.

LE phlegme de l'alun se fait tout ainsi que celui du vitriol.

*Prepa-
ration
de l'a-
lun.*

Or il se prépare & est rendu plus epulotique, & moins mordicant, si vous remettez le phlegme dessus ses feces cinq ou six fois, donnant feu extreme à la dernière fois.

*Huile
de sel*

POUR faire l'huile du sel, il le vous faut reduire en murie, laquelle vous ferez toute boire à la poudre de briques bien calcinée & ardantes, ou à du grauiet calciné, les esteignant dedans icelle murie: puis apres vous mettrez le tout dans vne cornue, & luy donnerez le feu comme pour faire de l'eau forte, & il en sortira vn huile violët & iaunaistre.

*Beurre
fixe
d'arse-
nic.*

Nous auons fait grand cas du beurre fixe de l'arsenic pour les playes veneneuses, & pour tous vlceres chancreux & phagedeniques & de difficile curation: or il se prepare en cette maniere.

Sublimez premieremēt l'arsenic crystallin avec le simple colcothar (qui a vertu de retenir sa plus grande venenosité) & le meslez avec autant de sel

de tartre bien préparé, & de salpêtre: le tout soit mis entre deux creusers lutez ensemble comme il faut, laissant en l'un d'iceux vn respirail, & le fixez, donnant feu par degrez l'espace de vingt-quatre heures: Vous trouuerez le tout reduit en vne masse blanche & de couleur de perles, de laquelle vous tirerez l'alkaly par le moyen de l'eau chaude, suiuant l'art. La poudre qui demeurera au fôd, soit dessechée & puis imbibée d'huile de tartre (ou de talc pour le mieux) & derechef dessechée, reiterant cela par trois fois, en vn vaisseau & feu conuenable. Dissoluez derechef cette matiere dâs de l'eau de vie, pour en tirer tout le sel, & en fin vous restera vne poudre d'arsenic blanche & fixe, qui se resoudra à l'humide, en huile espais, que nous disons beurre d'arsenic, pour estre blâc, de la consistence d'iceluy & fort anodyn.

LE talc, bien qu'il soit de difficile calcination, se calcine neantmoins facilement par le moyen du tartre préparé comme il faut: iceluy doncques estât calciné en poudre biē menuë, vous en tirerez vne ame ou essence avec du vin.

*Huile
de talc.*

aigre distillé, laquelle se resout facilement à l'humide en huile tres-precieux, & fort propre pour la decoration du visage.

*Preparation
de la
pierre
d'aimant*

PRenez suc d'aristolochie ronde & de sauinier, de chac. quatre onces: de serpentaire deux onces: de l'esprit du vin, vne liure. faites circuler le tout par 24. heures, puis le distillez. Pr. de ceste eau, vne liure: d'aymant esleu, & reduit en poudre, 4. onc. Circulez le tout derechef & le distillez par trois fois dessus ses feccs, & ainsi il sera préparé.

*Pour
cōforter
les parties
nobles.*

OR d'autant qu'il faut tousiours auoir esgard de conformer & fortifier les parties nobles, & principalement le cœur, qui est la fontaine de la vie, les preparations qui s'ensuiuent y seront conuenables.

*Eau
theriacale.*

Pr. theriaque d'Alexandrie, deux onces & demie: myrthe bien choisie, vne onc. & demie: saffran, deux drac. essence vin, six onces. meslez le tout & le distillez par vn alembic à feu lent: apres circulez le tout par huit iours, & le distillez derechef. Cette eau est excellente contre tous venins, cōtre la peste, &c

conforte merueilleusement le cœur.

Nous auons enseigné en nostre liure de la preparatiō spagirique des médicaments, comme il faut faire la teincture de l'or, des couraux, du baume naturel & des margarites, & auons ample-ment escript en iceluy toutes leurs vertus : il reste que nous parlions de l'or de vie, comme du plus souuerain médicament qu'on sçache imaginer pour guerir mesme la lepre, entre toutes les maladies la plus grande & extreme.

*Tain-
cture de
l'or, &c.*

Or l'or de vie se fait en plusieurs for-tes. Car l'or estant tellement calciné, suiuant l'art spagirique, qu'il ne se puisse plus reduire en corps, & tellemēt at-tenué qu'il soit rendu fort spongieux & leger, vous en tirez vne semence ou germe avec du vinaigre distillé & pré-paré comme il faut, pour cet effect, au Bain Mar. Et ce médicament acquiert telle vertu par le moyen des circulatiōs avec l'esprit du vin, que son vsage est admirable en la cure de plusieurs ma-ladies.

*l'Or de
vie.*

*Vn au-
tre or de
vie meil-
leur &
plus par-
fait.*

Calcinez les fueilles de l'or d'une calcination Philosophique avec le sel

commun préparé, iusques à ce qu'elles se rendent en vne chaux impalpable. Separez le sel par solutions, comme il est requis, & le calcinez derechef avec le sel pollucide & sucrin. Adioustez à cette mixtion de l'esprit de vin alcoolisé avec son propre sel suiuant l'art, tant qu'il surnage quatre ou cinq doigts. Faites brusler & euanoüir l'alcool du vin, reiterant cela tant qu'il sera de besoin. Ce fait adioustez y encore de nouveau alcool de vin, & le faites circuler par 4. ou 5. iours ou d'auantage, s'il est requis. Et en fin separez le menstrual par le bain: & en y mettez encore de nouveau, reiterant cela iusques à ce que toute la substance de l'or passe par le bec de l'alembic. Separez le menstrual suiuant l'art & il vous demeurera vn or de vie, le plus rare & le plus précieux de tous les secrets.

F I N.